


河防一覽

葉恭綽題





運 航

力 水

洪 防

溉 灌

水 給

上海图书馆藏书



A541 212 0005 7374B

# 河防一覽

【三】

明·潘季馴



第一輯

第四種

據明萬曆刊本及清乾隆刊本參校

封面題簽：葉譽虎先生

中華民國二十五年四月出版  
中國水利工程學會藏版

校對者 徐 硯 農

句讀者 汪 胡 楨

河防一覽卷之七

河臣潘季馴著

南旺分司主事王元命  
濟甯兵河副使曹時聘校訂

運同陳昌言編次

【奏疏】

兩河經略疏

臣潘季馴謹題爲遵奉明旨陳愚見議治兩河經略以圖永利事。據管理河道工部郎中余毅中施天麟張譽管河兵備等道參政龔大器副使林紹張純章時鸞僉事朱東光水利道僉事楊化各曾呈蒙臣劄付備仰職等躬歷各該地方逐一查閱要見徐沛豐場縷水及太行長隄衝決者作何築塞茶城正河變遷由小浮橋出果否成河崔鎮等決黃水泛溢正漕淤阻作何堵築徐邳一帶長隄應否加幫宿桃以南應否接築老黃河故道應否開復高家堰應否修築新城外一帶老隄是否低薄或原基短促相應接築草灣既開復淤作何濬治或應棄置仍復雲梯關故道黃浦口見今水從東決一望瀾漫以致高寶揚州一帶淺阻因何不行築塞高寶一帶隄岸有無足恃逐一詳議虛心講求或應修復舊河或應別求利涉勿拘成案勿避煩勞上裨國計下奠民生以圖久安長治之策畫圖貼說具由通詳等因蒙此隨該職等前往徐沛

淮揚等處。督同淮安府知府宋伯華。揚州府知府虞德燁。管河同知王瑛。蔡玠。劉順之。并各州縣掌印管河等官。逐一細加查勘。從長計議。看得水性就下。以海爲壑。向因海壅。河高。以致決隄。四溢。運道民生。胥受其病。故今談河患者。皆咎海口。而以濬海爲上策。則誠然矣。第海有潮汐。茫無著足。不得已而議他關。豈知海口。視昔雖壅。然自雲梯關四套以下。濶七八里。至十餘里。深皆三四丈不等。縱使欲另開鑿。必須深濶相類。方便注放。則工力艱鉅。必不能成。矧未至海口。乾地猶可施工。及將入海之處。則潮汐往來。亦與舊口等耳。且海之舊口。皆係積沙。人力雖不可濬。水力自能衝刷。乃若新關之地。則土壤堅實。不特人力難措。而水力亦不能衝。故職等竊謂海無可濬之理。惟當導河以歸之海。則以水治水。即濬海之策也。然河又非可以人力導也。欲順其性。先懼其溢。惟當繕治隄防。俾無旁決。則水由地中。沙隨水去。即導河之策也。顧頻年以來。無日不以繕隄爲事。亦無日不以決隄爲患。何哉。卑薄而不能支。迫近而不能容。雜以浮沙而不能久。隄之制未備耳。是以黃決。崔鎮等口。而水多北潰。爲無隄也。淮決。高家堰。黃浦等口。而水多東潰。隄弗固也。乃議者不各制之未備。而各築隄爲下策。豈得爲通論哉。又有所未盡者。上流既潰。隄以旁決矣。至於下流。復或歧而分之。其趨於雲梯關正海口者。譬猶強弩之末耳。蓋徒知分流以殺其怒。而不知水勢益分。則其力益弱。水力既弱。又安望其能導積

沙以注於海乎。職等故謂今日濬海之急務，必先塞隄以導河，尤當固隄以杜決，而欲隄之不決者，必真土而勿雜浮沙，高厚而勿惜鉅費，讓遠而勿與爭地，斯隄於是乎可固也。如徐邳桃清沿河各隄固矣，崔鎮等口塞矣，則黃不旁決而衝漕力專，高家堰築矣，朱家口塞矣，則淮不旁決而會黃力專，淮黃既合，自有控海之勢，又懼其分之則力弱也，則必暫塞清江浦河而嚴司啓閉，以防其內奔，姑置草灣河而專復雲梯，以還其故道，仍接築淮安新城長隄，以防其末流，盡令黃淮全河之力，涓滴悉趨於海，則力強且專，下流之積沙自去，下流既順，上流之淤墊自通，海不濬而關河不挑而深矣。此職等所謂固隄，即所以導河，導河即所以濬海也。猶慮伏秋水發，暴漲傷隄，職等查得呂梁上洪之磨臍溝、桃源之陵城、清河之安娘城等處，土性堅實，可築滾水石壩三座，若水高於壩，任其走洩，則水勢可殺，而兩隄無虞矣。至若寶應石隄之當復，與夫下流支河之當疏，揚州運河之當濬，皆今時之切務，所宜次第併舉，而不可緩者也。但前項工程，自豐沛徐淮以至海口，共長千有餘里，自清江浦以至儀真，共長三百餘里，地勢遙遠，工程浩大，一時錢糧未措，人夫難集，除前請發銀二十萬兩，并截留漕糧八萬石，一面先將豐沛縷隄、太行遙隄及徐邳一帶縷隄酌量幫築，桃清南隄併接淮安新城長隄，乘時創築高家堰兩頭，水勢稍緩，先行築塞，寶應湖先用椿笆修築土隄外，其餘各項工程，相應大加修舉。

者一面請發錢糧調集官夫買辦物料次第興舉務保無虞等因并將應做工程列款呈詳到臣據此該臣查得接管河道卷內先准工部咨爲竭愚忠陳末見以裨安攘事該御史柴祥題請勘彭城淮邳等處某處河身淤塞作何疏濬某處隄岸窄狹作何展築某處下流可開支河則滌爲數河以分水勢某處海口果有束隘則多方開通以達於海等因又准工部咨爲敷陳末議懇乞聖明亟賜舉行以裨將來糧運大計事該御史陳世寶題開三義鎮引入清河縣北或出大河口或出清河縣西另開一河何者爲便從長定議又准工部咨爲河患頻仍運道艱阻懇乞聖明亟賜議處以裨國計以奠民生事該南河郎中施天麟題要停運斷流大挑河身該部覆題動支官銀製造平底方舟長柄鐵爬躬親試驗如果挑濬有效先於淤墊最高處逐段濬去或大興工役應不停運仍將高家堰并朱家等口築塞至於高郵寶應隄間多建減水大閘隄下多開支河俱聽從宜處置其黃浦口可塞則塞如另爲入海一路可疏下流亦宜建減水大閘水漲則任其外流水消則儘閘而止等因又准工部咨爲河患愈深經治鮮效懇乞聖明特彰宏斷案機宜以圖匡濟事該工科都給事中劉鉉題疏海口洩下流或濬草灣之口使之開廣或疏雲秘關之淤使之和舊應開海口去處如鹽城安東五港金城一帶孰爲利便并查小浮新衝之口可否濟運如有淺阻亦要設法開濬等因又准工部咨爲披謁愚衷敷



陳治河事宜。以備採擇。以安國計事。該戶科給事中李涑題。要見安東金城雲梯關等處某處地方堅實。可以另開一河。以洩河淮下流。興化鹽城沿海廟道口新興場牛園舖等處某處。可以多濬十餘口。以導射陽諸水入海。相度計議的確。陸續修舉。其徐呂而下河身淤高之當疏。老黃河故道之當復。高家堰潰決之當築。高寶湖平水閘分水河之當修。俱聽詳估等因。又該臣欽奉敕諭。內開。備查草灣口何爲既開復淤。及今作何開通。全淮水何爲南徙不復。及今作何疏導。徐邳河身高並州城。何以疏之使平。黃浦崔鎮等口久塞無功。何以築之使固。及查諸臣歷年建議。有行奏疏。逐一勘議。要見老黃河故道。應否開復。清桃正河。應否挑濬。高家堰寶應隄。應否修築。小浮橋新衝口。可否濟運。應否加挑。又徐邳以上地形南昂北下。恐隄防一潰。勢必奔流北徙。將爲闡河之梗。亦要審其孰爲正河。孰爲支河。孰爲合河。或正而當厚其防。或支而當殺其勢。或合而當分其流。一併勘議詳妥。奏聞區處。欽此。又准工部咨爲新開海口復淤。河患不測。乞敕當事。臣工多方計處。以圖永濟事。該工科都給事中王道成題行。臣親詣雲梯關踏勘。果否原係黃河入海之口。從前何以通流。今日何以一綫。詳相其勢。明求其故。仍自海口而上。逐處講求。及備查草灣何時復淤。作何開濬。或另擇堅實之地。多開數口。以爲通海之路。金城以下。何以久不疏通。崔鎮決口。何以築之使固。桃源長隄。應否修築。高家堰應否修

理老黃河應否開復。大端委官之言。決不足憑。務必躬親。庶有真見。合用錢糧。應於何處動支。原題請各官。何以處之。使得効力。一一籌畫。委妥等因。准此。案照前事。已經會案。劄行各該司道。逐一勘議。誠恐轉委屬官。不足憑信。該臣會同漕運巡撫右侍郎江一麟。躬親督率。沿河荒度。南迥維揚。看得儀真東關。歷石人頭。楊子橋。三汊河。直抵高廟止一帶。運河淤淺。寶應一帶湖隄圯壞。黃浦決口。淹及數邑。高家堰水射淮揚。清江浦長隄卑薄。柳浦灣至高嶺。無隄障禦。西窮鳳泗。看得全淮不下清口。日益南徙。北抵清桃。看得崔鍾諸決。水從旁洩。一望瀰漫。正河上。崔家口新河滲阻。北陳一帶。水行陸地。僅盈尺餘。東抵海口。看得新挑草灣。尋復淤塞。今自淤淺。徐沛以清口至西橋一帶。河流復通。但不及故河十分之一。自安東以下。河身漸廣。雖有淤淺。未復全河。然河水東下。亦無阻礙。隨處患害。一一查閱。明白去後。今據前因。該臣會同右侍郎江一麟。議照事師古者罔愆。智不鑿者乃大。孟子論智一章。首以禹之治水爲喻。而論爲政。則曰爲政不因先王之道。可謂智乎。是大智者事必師古。而不師古則鑿矣。故治河者必先求河水自然之性。而後可施其疏築之功。必先求古人已試之效。而後可做其平成之業。黃水來自崑崙。入徐濟運。歷邳宿桃。清至清口。會淮而東。入於海。淮水自洛及鳳。歷盱泗。至清口。會河而東。入於海。此兩河之故道。即河水自然之性也。胡元歲漕江南之粟。由揚州直北。出廟灣。

入海至永樂年間平江伯陳瑄始隄管家諸湖通淮河爲運道然慮淮水漲溢東侵淮郡也故築高家堰隄以捍之起武家墩經小大澗至阜甯湖而淮水無東侵之患矣又慮黃河漲溢南侵淮郡也故隄新城之北以捍之起清江浦沿鉢池山柳浦灣迤東而黃水無南侵之患矣尤慮河水自閘衝入不免泥淤故嚴啓閉之禁止許漕艘鮮船由閘出入匙鑰掌之都漕五日發一放而官民船隻悉由五壩車盤是以淮郡晏然漕渠永賴而陳平江之功至今未斬也後因剝食既久隄岸漸傾水從高家堰決入一郡遂爲魚鼈而當事者未考其故乃謂海口壅塞遂穿支渠以洩之蓋欲亟拯淮民之溺多方規畫以爲疏導之計其意甚善而其心良亦苦矣詎知旁支暫開水勢陡趨西橋以上正河遂至淤阻而新開支河濶僅二十餘丈深僅丈許較之故道不及三十分之一耳豈能容受全河之水下流既壅上流自潰此崔鍾諸口所由決也今新開尋復淤塞故河漸已通流雖深濶未及原河十分之一而兩河全下沙隨水刷欲其全復河身不難也河身既復面濶者七八里狹者亦不下三四百丈滔滔東下何水不容若猶以爲不足而欲另尋他所別開一渠恐人力不至於此也以臣等度之非惟不必另鑿一口即草灣亦須置之勿濬矣故爲今之計惟有修復平江伯之故業高築南北兩隄以斷兩河之內灌而淮揚昏墊之苦可免至於塞黃浦口築寶應隄濬東關等淺修五閘復五壩之工次第舉之

則淮以南之運道無虞矣。堅塞桃源以下崔鎮口諸決。而全河之水可歸故道。至於兩岸遙隄。或舊工。或剏新址。或因高岡。或填窪下。次第舉之。則淮以北之運道無虞矣。淮黃二河既無旁決。並驅入海。則沙隨水刷。海口自復。而桃清淺阻。又不足言矣。此以水治水之法也。若夫扒撈挑濬之說。僅可施之於閘河耳。黃河河身廣濶。撈濬何期。捍激湍流。器具難下。前人屢試無功。徒費工料。但恐伏秋水發。滌潦相仍。不免暴漲。致傷兩隄。故欲於崔鎮口陵城安娘城等處再築滾水壩三道。萬一水高於壩。任其宣洩。則兩隄可保。而正河亦無淤塞之患矣。徐州以南之工。如此而已。或有難臣者曰。臣等欲順水性。今淮水欲東而乃挽之使北。黃水欲北而乃挽之使東。無乃水性之未適乎。臣曰。水以海爲性也。決水乃過額在山之水也。非其性也。或者又曰。昔禹治河。播九河同爲逆河入於海。今臣等乃欲塞諸決。併二瀆而不使之少殺耶。縱有滾水壩。僅去浮面之水百一耳。亦烏能殺其勢也。臣應之曰。九河非禹所鑿。特疏之耳。蓋九河乃黃河必經之地。勢不能避。而禹仍合之同人於海。其意蓋可想也。况黃河經行之地。惟河南之土最鬆。禹導河入海。止經郟縣孟津鞏縣三處。皆隸今之河南一府。其水未必如今之濁。今自河南府之閿鄉縣起。至歸德之虞城縣止。凡五府。河已全經其地。而去禹導河之時。復三千餘年。流日久。土日鬆。土愈鬆。水愈濁。故平時之水。以斗計之。沙居其六。一入伏秋。則居其八矣。以

二升之水載八升之沙。非極湍急。即至停滯。故水分則流綏。流緩則沙停。勢所必至者。臣等不暇遠引他證。即以近事觀之。草灣一開。而西橋故道遂淤。崔鎮一決。而桃清以下遂澀。去歲水從崔家口出。則秦溝遂爲平陸。此眼前事也。又何疑哉。所據司道諸臣款議前來。臣等復加參酌。似應允從。伏望敕下該部。再加查議。如果臣等所言不謬。俯賜俞允。行臣等遵照。及時興舉。除工程夫役錢糧數目。另本具陳外。謹題請旨。

計開

一議塞決以挽正河之水。竊惟河水旁決。則正流自微。水勢既微。則沙淤自積。民生昏墊。運道梗阻。皆由此也。臣等查得淮以東。則有高家堰朱家口黃浦口三決。此淮水旁決處也。桃源上下。則有崔鎮口等大小二十九決。此黃水旁決處也。俱常築塞。但伏秋之水。相繼而至。非惟地爲水占。無處取土。抑且波濤洶湧。爲工不堅。除將決口稍窄者。見在分投興築外。其決至數十丈以上者。一面鳩集工料。相時興舉。伏候聖裁。

一議築隄防以杜潰決之虞。照得隄以防決。隄弗築。則決不已。故隄欲堅。堅則可守。而水不能攻。隄欲遠。遠則有容。而水不能溢。累年事隄防者。旣無真土。類多卑薄。已非制矣。且夾河束水。窄狹尤甚。是速之使決耳。合無力鑿前弊。凡隄必尋老土。凡基必從高厚。又必繹賈讓。

不與爭地之旨。倣河南遠隄之制。除豐沛太行隄原址遙遠仍舊加幫外。徐邳一帶舊隄。查有迫近去處。量行展築。月隄仍於兩岸相度地形最窪。易以奪河者。另築遙隄。桃清一帶南岸多附高岡。但上自歸仁集以至朱連家墩。古隄已壞。相應修復。下抵馬廠坡。地形頗窪。相應接築。以成其勢。北岸自古城至清河。亦應創築遙隄一道。不必再議縷隄。徒糜財力。及查清江浦外河一帶。至柳浦灣止。爲淮城北隄。除掃灣單薄量行加幫外。但原基短促。防護未周。仍自柳浦灣至高嶺。創行接築四十餘里。以遏兩河之水。盡趨於海。自清江浦運河至淮安西門一帶舊隄。相應再行幫厚。勿致裏河之水走洩妨運。如此則諸隄悉固。全河可恃矣。伏候聖裁。

一議復閘壩以防外河之衝。查得先該平江伯陳瑄創開裏河。仍恐外水內侵。特建五閘。設法甚嚴。鎖鑰掌於漕撫。啓閉屬之分司。運畢即行封塞。一應官民并回空船隻。悉令車壩。此在嘉靖初年。尙爾循行故事。制非弗善也。奈何法久漸弛。五閘已廢。其一僅存四閘。亦且坍塌殆盡。漫無啓閉。是以黃淮二水。悉由此倒灌。致傷運道。合無議復舊制。將見存四閘。俱加修理。嚴司啓閉。俟二月前後。糧運過完。即行封閉。惟遇鮮貢船隻。方許啓放。仍行查復五壩。以便官民船隻。照舊車盤。毋致曲徇使客。致壞良規。伏候聖裁。

一議。勗建滾水壩以固隄岸。照得黃河水濁。固不可分。然伏秋之間。淫潦相仍。勢必暴漲。兩岸爲隄所固。水不能洩。則奔潰之患。有所不免。今查得古城鎮下之崔鎮口。桃源之陵城。清河之安娘城。土性堅實。合無各建滾水石壩一座。比隄稍卑二三尺。濶三十餘丈。萬一水與隄平。任其從壩滾出。則歸漕者常盈。而無淤塞之患。出漕者得洩。而無他潰之虞。全河不分。而隄自固矣。伏候聖裁。

一議。止濬海工程。以免糜費。照得海口爲兩河歸宿之地。委應深闊。但查海口原身。自清口至安東縣面濶二三里。自安東歷雲梯關至海口。面濶七八里。至十餘里。深各三四丈不等。止因去年旁決之後。自桃清至西橋一帶淤塞。尋復通流。今雖未及原身十分之一。而兩河之水。全歸故道。並流洗刷深廣。必可復舊。至云相傳海口橫沙。并東西二尖。據土民李真等吐稱。並未望見。潮上之時。海舟通行無滯。潮退沙面之水尙深二尺。况橫沙并東西二尖。各去海口三十餘里。豈能阻礙河流。故臣等以爲不必治。亦不能治。惟有塞決挽河。沙隨水去。治河即所以治海也。別鑿一渠。與復濬草灣。徒費錢糧。無濟於事。伏候聖裁。

一暫寢老黃河之議。以仍利涉。照得黃強淮弱。每每逼淮東注。故議者欲復老黃河故道。冀使黃水稍避。高堰民墊可瘳。斯亦得策。但勘得原河七十餘里。中間故道久棄。無論有水無

水之地。詢之居民。俱失其真。無從下手。一不便也。且已棄故道。欲行開復。必須深廣。與正河等。乃可奪流。今見存大河口窄狹。不及桃清三分之一。而三義鎮入口之處。背灣徑直。猶恐水未必趨。二不便也。及其中流。如魚溝鐵綫溝葉冢口陰陽口等處。地勢卑窪。諸決之水。漫流至此。一望瀰茫。築隄費鉅。且恐難保。三不便也。况今桃清遙隄議築。則黃水自有容受。崔鎮等決議塞。則正河自日深廣。高家堰議築。則淮水自能會黃。清江浦等閘議嚴啓閉。新城北隄議行接築。則淮安高寶興鹽等處。自無水患。此河雖不必復可也。伏候聖裁。奉聖旨。工部看了來說。

### 工部覆前疏

題爲奉明旨陳愚見議治兩河經略。以圖永利事。該總理河漕都御史潘季馴。題前事。奉聖旨。工部看了來說。欽此。臣等看得治河之說。紛紛持議。並以深濬河身。多開海口。謂得上策。不知海口本自深廣。而不必開。河身撈濬甚難。而不可開。皆終未嘗親歷其地。而徒得諸遙聞。故聽其言。則美施之事。則泥古人云。千聞不博一見。正謂是也。今都御史潘季馴。侍郎江一麟。足遍口訊。僉議詳酌。而爲是六說。曰塞決。曰築隄。曰復閘壩。曰剏滾水壩。曰止濬海口。寢開老黃河。



其所修置其所寢格俱自擊利害而非道聽之言庶同則繹而非勿詢之謀蓋隄防既固塞決又審水無旁駛而正流自急沙隨水刷而海口自復此正以水治水而不爲穿鑿之論迂漫之談頃來治河之說未有逾於二臣之議者也再照黃淮之性變遷靡常機會之來間不容髮臨時酌處又存乎人如有善後未盡事宜亦勿拘原議勿狃目前事小者徑自舉行事大者奏請定奪務求至當以期永賴所有條請事宜相應開立前件議擬上請定奪通乞聖裁

### 計開

一議塞決口以挽正河之水前件臣等看得今日水患所以爲民生運道之蠹者則由河水旁決以致正流之漸微而流沙由此日積故塞決之工誠治河者切近之議也今都御史潘季馴等議要淮以東將高家堰等諸決口桃源以上將崔鎮等諸決口其在稍窄而工易者分投興築其或決濶而工鉅者一面鳩役集料相時聿舉良有補於河務相應依擬伏乞聖裁

一議築隄防以杜潰決之虞前件臣等看得隄所以防決防不固則決不止此勢之必然者然築隄之議甚久築隄之工常興而不見築隄之利者則以其失之單薄或非眞土及過於狹隘耳乃不察築隄之非善而遂病築隄之非計不已過乎今都御史潘季馴等建議築

隄而有欲堅欲廣欲尋老土之論。誠有見矣。至於徐邳桃清歸仁集馬廠坡古城清江浦至淮安西門一帶。或葺舊工。或剏新址。或因高岡。或填窪下。或應幫厚。或應接築。諸所等工。皆經荒度所宜。籌畫具審。相應依擬。令其次第舉行。庶諸隄悉固。而全河可恃矣。伏乞聖裁。

一議復閘壩以防外河之衝。前件臣等看得右都御史潘季馴等所議。爲邇來淮河二水內侵裏河。以致運道有礙者。其原則在五閘圯廢。漫無啓閉所致。要將修復一節。爲照先臣平江伯陳瑄特建五閘。正以防外水之反灌。故舊制特嚴鎖鑰。不時繕治。懼有今日之患。爾今議要修舉。蓋洞察其故。恭候令下本部。備行右都御史潘季馴等。將坍塌四閘。即行修復。查照鎖鑰啓閉舊規。俟二月終糧運過完。即行封閉。如馮鮮貢船隻。方許開放。仍查復五壩。令一應官民。并回空船隻於彼車盤。如有勢豪恃強擅開者。即便指名參究。伏乞聖裁。

一議剏建滾水壩以固隄岸。前件臣等看得秋水淫漲。兩岸爲隄所固束。其橫濤怒浪。靡得宣洩。其勢不至於他潰不已也。今都御史潘季馴等條議於崔鎮口陵城安娘城土性頗堅地方。要各建滾水石壩一座。倘遇伏秋水與隄平。任其從壩滾出。可免他潰之虞。於河渠隄防。兩有便益。相應依議。伏乞聖裁。

一議止濬海工程。以免糜費。前件臣等看得濬海之議。節該科道等官題疏本部。覆行踏

勘爲是說者。蓋信於傳聞。謂海口隘窄。復橫沙淤梗。不能容衆水之洩。以致上流溢墊。此得於遙度者也。今右都御史潘季馴等足履口訊。與得於臆說者殊異。謂海口尙頗深廣。橫沙遠不爲害。但得上流無滯。沛然下趨。刷洗日深。衝突日廣。舊口自復。何水不容。何必爲是澇口之說。以圖難措之功。另開一渠以滋無益之舉乎。此所謂舛也。相應議止。伏乞聖裁。

一暫寢老黃河之議。以仍利涉。前件臣等查得先該直隸巡按陳世寶條議復老黃河故道。本部覆行會勘。今右都御史潘季馴等條稱有三不便之說。且稱諸工旣以議行。黃水自有容受。正河自日深廣。淮水自能會。黃水亦自不爲患。以此自有四利。較彼三不便。故要行暫寢。良於利害大較。酌之審矣。相應依擬。伏乞聖裁。奉聖旨。這治河事宜。旣經河漕諸臣會議停當。依擬都准行。着他們悉心著實。興建永利。各該經委分任人員。如有玩愒推諉。虛費財力者。許不時拿問參治。其未盡事宜。及臨時事勢。或與原議不合的。也着陸續奏聞。務求有益。應用錢糧。你部裏會戶部。上緊議來。

### 河工事宜疏

臣潘季馴謹題爲條列河工事宜。乞恩俯賜俞允。以便經理事。該臣會同漕運巡撫右侍郎江

一麟議得工役繁興。料理宜預。官夫蝟集。調度須周。若不先爲申明。未免臨時舛錯。除兩河疏梁之議。另行具陳外。所有一二事宜。不得不上煩聖聽者。敬列條款。擬議上請。伏望敕下該部。再加查議。如果臣言不謬。俯賜施行。臣等不勝感幸。

計開

一議支放。照得鳩工聚材。出納甚瑣。收掌銷算。頭緒頗多。稽覈不嚴。必滋冒破。臣與撫臣百責攸萃。兼以閱視不常。無暇躬親經理。合無比照昔年邳工事例。將請發銀兩。俱解淮安府貯庫。各工應給工食。應買物料。府佐等官開數。赴各該分督司道官覈實給票。赴兩淮巡鹽衙門覆覈掛號。方許關支。每季終該府將票類送巡鹽衙門。比對號印數目相同。發回附卷。通候工完。類覈造冊奏繳。如有姦弊。按法追究。庶臣等得以專心河工。而錢糧亦易於清楚矣。伏乞聖裁。

一議分督。照得河工浩繁。道里遙遠。若非多官分理。不免顧此失彼。分工之後。錢糧出入。工程次第。皆其首尾。遇有降調等項。若聽其離任。則本官所分之工。又須另委補替。文移往來。便至逾月。及到工所。茫然無措。何以望其竣事而底績也。合無俯念河工重大。如遇前項相應離任官員。容臣等暫留完工。稽其勤惰。別其勤罪。請旨處分。方得離任。庶人心專定。覲覲

不萌而事易責成矣。伏乞聖裁。

一議責成。照得州縣正官職專親民。故民易驅而事易集也。奈何相沿之弊。視河患如秦越。視管河官如贅疣。即以分司部屬臨之。蔑如也。妨工債事。實由於此。目今大工肇興。諸務叢挫。若非責成各掌印官。鮮克有濟。合無興工之後。一應派撥夫役。買辦物料。俱以責之各掌印正官。躬親料理。仍選委賢能佐貳。管押夫役赴工。不許將陰醫等官搪塞。如有仍前玩愒。派辦失宜。以致夫役逃散。物料稽遲。該工司道官即時參呈。以憑奏治。事完之日。仍與管理河工諸臣一體分別題請施行。庶事權歸一人。無推避。而大工自易矣。伏乞聖裁。

一議激勸。照得各工委官。除府佐縣正外。其州縣佐貳。府衛首領。及雜職陰醫義民等官。或管領人夫。或措辦椿埽。或運取甄石。或打造器具。業務紛紜。如臂使指。但各官出入泥淖。櫛沐風雨。艱辛畢萃。殊可矜憫。有功而薄其賞。誤事獨重其罰。此人心之所以懈弛。而事功之所以隳墮也。合無工完之後。容臣等逐一精覈。如有實心任事。勞苦倍常者。俯賜破格超擢。中間有劣陞王官等項。准與改擢。其陰醫等官。原有部劄冠帶者。厚加獎犒。如係義民。准照題給冠帶榮身。仍與陰醫等官一體免其本等差徭。庶人心爭奮。而百事易集矣。伏乞聖裁。

一議優恤各工夫役計工者每方給銀四分計日者每日給銀三分而本籍本戶幫貼安家銀兩有無聽從其便茲亦不爲薄矣但貧民自食其力衝寒冒暑暴風露日艱苦萬狀縱使稍從優厚亦不爲過合無每夫一名於工食之外再行量免丁米一年容臣等出給印信票帖審編之時許令執票赴官告免州縣官抗違許其赴臣告治如此則惠足使民民忘其勞矣伏乞聖裁

一議蠲免照得淮揚河患頻仍民遭昏墊稱最苦者如淮安所屬山陽清河桃源宿遷睢甯安東鹽城鳳陽所屬泗州揚州所屬興化寶應徐州所屬蕭縣十一州縣者一望沮洳寸草不長凋敝極矣適今大工興舉用夫頗多舍近取遠隣封未免有詞而此中流移貧民亦賴做工得食少延殘喘應派夫役既不容已應輸賦稅復加責辦實爲繁苦合無軫念災極民窮姑將前十一州縣本年見徵夏秋起運錢糧特蠲一半行臣等揭示通知俾催科少寬人樂趨役伏乞聖裁

一議改折照得大工肇興費用不貲帑藏空虛既難搜括閭閻窮困又難加派臣等反覆思惟無可爲處萬不得已輒有非分之請而非所敢必也臣等竊聞太倉之粟可備八九年之食積愈久則粟愈朽故官軍之情有不願本色而願折色者稍加變通未爲不可合無暫將

今歲漕糧。除淮北及河南山東照舊兌運外。其淮南并浙江等省。姑准改折。照例正兌每石連耗米輕齎折銀七錢。改兌每石連耗米折銀六錢。即以五錢給軍。正兌尙餘銀二錢。改兌餘銀一錢。兌運停止。官軍應得行月糧。俱可免給。以正額解京。而以餘銀并行月糧留發河工支用。總計可得九十餘萬兩。以運軍應得之數。而濟國家大工之需。在內帑無支發之煩。在閭閻無徵派之苦。在朝廷爲不費之惠。在河工免缺乏之虞。而在工諸臣。亦得悉心疏築。可無顧此失彼之慮。所謂兩利而俱全者也。臣等非不知近該科臣建議。奉有明例。但錢糧浩繁。時常詘乏。舍此則惟有請發內帑耳。故敢冒昧陳瀆。伏望敕下該部。再加查議。如可允行。河工幸甚。臣等幸甚。伏乞聖裁。

一議息浮言。臣等竊惟治河固難。知河不易。故雖身歷其地。猶苦於措注之乖舛。而况於遙度乎。但勞民動衆之事。怨咨易興。而往來絡繹之途。議論易起。至於將迎之間。稍稍簡略。則以是爲非。變黑爲白者。亦不可謂其盡無也。憂國計者。以急於望成之心。而偶聞必不可成之語。何怪乎其形諸草牘也。而不知當局者。意氣困而銷沮。官夫遂生觀望。少爲搖奪。墮敗隨之。勉強執持。疎遯難達。其苦有不可言者。伏望皇上。俯垂鑒照。容臣等殫力驅馳。悉心料理。寬臣以三年之期。如有不效。治臣以罪。伏乞聖裁。奉聖旨。工部知道。

### 工部覆前疏

題爲條列河工事宜。乞恩俯賜俞允。以便經理事。該總理河漕右都御史潘季馴題前事。奉聖旨。工部知道。欽此。欽遵。通抄到部。送司案呈到部。看得總理河漕右都御史潘季馴題稱。工役繁興。官夫蝟集。若不預爲申明料理之方。恐臨時舛錯。將河工八事條列前來。誠於漕計民生有裨。除蠲免一事。咨戶部徑自題覆。改折一事。會同戶部議覆。所有支放等六事。相應開立前件議擬上請定奪。伏乞聖裁。

#### 計開

一議支放 前件臣等看得大工所費不貲。出納之際。若不嚴加稽覈。則冒破之弊難保。必無。今右都御史潘季馴等要比照邳工事例。將銀兩貯之於淮安府庫。各工應給工料府佐等官。將數赴該督司道官覈實給票。仍赴巡鹽衙門掛號關支。每季終該府將原票類送巡鹽衙門覆覈。倘有奸弊。從重追究。則關防嚴而奸蠹革。河漕二臣不至分慮。而錢糧亦靡有虛冒矣。相應依擬。伏乞聖裁。

一議分督 前件臣等看得往年分督之官。往往遇有陞遷。則竟自代去。以致錢糧不明。勤



惰無稽。如是則人心任事多存規避之私。苟且塞責。曾無忠事之謀。因肆侵漁。所不可保。望其底績也難矣。今右都御史潘季馴等議爲河工浩大。要多官分督。倘本官遇有陞調。留待工完。將經手錢糧。并其勤惰稽查明白。方許離任。委于責成良使。恭候命下本部。備咨右都御史潘季馴侍郎江一麟。將見與河工畫地分官管理。本官自委之後。雖遇陞調。不許擅離。候工完之日。將經手錢糧稽覈明白。分別勤惰。奏請處分。方許離任。督撫衙門。仍將承委官員姓名。陸續移咨吏部。暫住陞調。候工完施行。伏乞聖裁。

一議責成。前件臣等看得潘季馴等議將河工料理物料。責之各州縣掌印官。管押夫役。委之賢能佐貳。如有玩愒。該工司道參呈奏治。事完之日。仍與管河諸臣一體分別題請一節。爲照國家以河務爲急。特設大臣。以總理于上。又設司道官。以分理于下。所以重其事權也。邇來有司以秦越視河患。以贅疣視管河之官。至如分司部屬。具奉有專敕。而有司視之蔑如。雖經屢次申飭。而故紙自若。即有案牘之行。輒置之閣束。其間部臣稍欲盡職。則有司羣然詈之爲生事。百爾阻頑。反欲假此以取風力之名。故本部輒差司屬。則輒苦于抑氣。含鬱。動有掣肘。爲慮夫號令不行。則施爲何展。無惑於妨工債事也。故責成之請。誠有洞於往轍。激於時態。而言之也。誠如所議。則事權不分。而推避靡容。相應依擬。合候命下。除本地方

兩司守巡官各有專職自行督責外部行令司屬官凡供事河工者倘縣掌印官照舊玩視於案牘之行置高閣不即奉行致誤工程者即一面呈本部一面呈督撫衙門以聽參奏處治決不姑息伏乞聖裁

一議激勸 前件臣等看得潘季馴等議稱在州縣佐貳府衛首領雜職義民等官要行激勸一節爲照國家所以鼓舞人心分趨事而不懈者以賞罰之明也故縣千金之賞令轉鉅石即僮夫亦超距而奔彼有激爾今在工各官其出入泥淖沐櫛風雨勞苦萬狀而不大騷賞格何以令其畢力而終事邪激勸之典似當亟議伏候命下本部備咨都御史潘季馴等候河工完日將供事官員查有効勞實蹟者分別等第題請超擢中間如有劣陞王官等項亦准改擢或從另議優處其陰醫等官重加獎犒如係義民給與冠帶榮身伊與陰醫等官一體免其本等差徭於激勸之大機良有得也再照管河之官惟隸於河渠諸所轄司道或怪其接見之不常而不諒其承委之甚急或怪其差遣之不趨而不諒其一身之難分往往是非柄鑿有此以爲極賢而彼以爲不肖者有此署上考而彼置諸劣等者以致輸勞竭力之輩俛首吞聲遲疑埋怨傍觀者徒付之不平而督河之臣亦有無如之何者以後凡一應管河之官其賢否悉以河臣爲主他轄上司其於考語不過註曰管河而已候河工既完仍

復照舊。如此庶毀譽不致失真。而從事者不至疑畏矣。伏乞聖裁。

一議優恤。前件臣等看得右都御史潘季馴等條稱各工夫役。冲寒冒暑。暴風露日。艱苦萬狀。要每夫一名於工食之外量免丁米一年。出給印票。遇審編之時告免。如有抗違。許其告治一節。爲照河工夫役。既備嘗艱辛。則從厚優恤。亦不爲過。今各官條議前來。蓋深得於惠足使人之義。相應依擬。伏乞聖裁。

一議息浮言。前件臣等看得往年治河。迄無成功者。雖由於措注之未盡協宜。亦本於議論之太多。以阻之也。蓋當局而任事者甚難。旁觀而論事者甚易。矧河變靡常。即身親其事者。方爾且暮。矛盾興置頓異。豈可得而遙度邪。且人情不一。是非未必得其公。所見不同。議論未必得其當。敢於任事者。不免於任怨。而言之出於怨口者。豈足聽也。謀不見用者。多幸其無成。而謗毀之言。將何所不至哉。轉相告語。熒惑聽聞。當事者奪於鑠金。過憂者搖於三至。則有神禹之智。恐亦難於展布矣。此右都御史潘季馴等有息浮言之論。誠爲有見。伏望皇上俯念河工重大。專委責成。勿惑於浮言。勿阻於羣議。以後除治河諸臣。倘有欺隱大弊。及推避不肯盡心。苟完目前。遺患於後者。許言官訪實。照常參劾外。其餘但有條陳治河利害之疏。雖各效其一得之忠。而衆言淆亂。要必折以眞實之見。本部未敢遽爲題覆。悉行河

漕二臣。斟酌可否。明白具奏。或有窒礙難行。聽行寢格。如此則治河之臣。可無臨事掣肘之虞。而本部亦免於濫聽聖聰之罪矣。伏乞聖裁。奉聖旨。河工事重。必須委任責成。乃可期效。今後分督司道及承委等官。都着潘季馴等開送吏部。暫停陞調。通候河工完日。總論功罪。大行賞罰。若有才幹不相宜的。即便遴選具奏更調。推諉誤事的。不時參奏處治。毋得避怨姑息。自誤大事。其各委官賢否。但以該管河道官爲主。別道俱不許干預。其餘俱依擬。

### 勘估工程疏

臣潘季馴謹題爲勘估兩河工程。乞賜早請錢糧。以便興舉事。據管理河道郎中余毅中施天麟張譽。管河兵備等道參政龔大器。副使林紹張純章時鸞。僉事朱東光。水利道僉事楊化。各會呈前事。蒙臣劄付。備行職等。親歷各該地方。逐一相度。除河患源委疏治事宜。先行具呈。訖今將職等估計過各項工程。合用錢糧。分理官員。派調夫數。逐一會計明白。及稱錢糧無處要得。題請破格蠲發等因。列款呈詳到臣。案照先爲前事。已該臣等會案劄行各該司道。勘議過疏。治兩河經略緣由前來。另本具題外。又經催行細估工程去後。今據前因。該臣會同漕運巡撫右侍郎江一麟。議得。北自豐沛。南抵瓜儀。螳蜭一千餘里。中間應築應塞。應建應復工程。不

遺尺寸。當此極敵大壞之時。欲爲一勞永逸之計。若非重費。豈能有成。所據司道估勘銀兩。官夫數目。臣等復加算覈。委不可已。伏望敕下該部。再加查議。題請速賜俞允。行臣等遵照施行。地方幸甚。

計開

一議錢糧。照得河工募夫。計土論方者。築隄方廣一丈厚一尺。爲四工。每工給銀四分。計日者。每日給銀三分。徭夫日給銀一分。風雨量犒。此歷年議工之成規也。但土有遠近。力有倍省。工難處所。量須加增。以均苦樂。至於合用料物。椿草。檠麻。柳梢。灰鐵之類。俱須查照時價。難以律論。但當嚴加稽察。勿滋虛冒。除徐沛。嶗山。行縷二隄。并徐邳。睢靈。宿遷兩岸。幫隄。幫築歸仁集。隄。桃清。接築新隄。高家。堰。與淮口支河。先共估銀二十二萬四千三百三十二兩三錢八分。已經工部題奉欽依。動發南京戶兵二部銀二十萬兩。并留漕糧八萬石。除前工支用外。約該剩銀一萬五千六百六十七兩六錢二分。相應聽作後工支用。今估計得崔鎮決口共長一百八十丈。中段水深一丈二尺。兩頭深淺不等。俱應築根濶二十丈。頂濶十丈。計用人工椿草。檠麻等料。該銀一萬兩。黃浦決口。先就上流斜築。計長六十丈。水深一二丈不等。應築根濶二十丈。頂濶十丈。計用工料銀六千兩。填塞原決長一百六十丈。該用工料

銀四千兩。應展月隄。自徐州玄黃二舖計長八百五十丈。根濶五丈。頂濶一丈四尺。高一丈二尺。每丈計三十八方四分。共三萬二千六百四十方。計工一十三萬五百六十工。該銀三千九百一十六兩八錢。應築遙隄。南岸自靈璧縣張字舖起至邳州果字舖止。長九十八里。北岸自呂梁山空連築至邳州直河止。長七十五里。桃源古城起至清河權墩止。長一百二十里。共長二百九十三里。計五萬二千七百四十丈。應築根閘六丈。頂濶二丈。高一丈二尺。每丈計土四十八方。共二百五十三萬一千五百二十方。計工一千一十二萬六千八十工。該銀四十萬五千四十三兩二錢。內查沙墊土難在邳睢各界約長二十里。桃清各界約長二十五里。二處計長八千一百丈。該土三十八萬八千八百方。每方量加二工。該加銀三萬一千一百四兩。加椿草等料。該銀八百九十兩。古城下崔鎮口桃源陵城清河安娘城三處各建滾水石壩一座。每座工料銀三千兩。共銀九千兩。淮城北隄自大王廟起至柳浦灣止。四十五里。零長八千二百五十二丈四尺。加幫根濶二丈二尺。頂濶一丈一尺。高六尺。每丈計土九方九分。該土八萬一千六百九十八方八分。計工二十四萬五千九百六十四工。該銀七千三百五十二兩八錢九分六厘。又自柳浦灣起至高嶺止四十餘里。實長六千四百九十六丈七尺。幫築根濶四丈五尺。頂濶一丈五尺。高六尺。每丈計土十八方。該土一十一

萬六千九百四十方六分。計工四十六萬七千七百六十二工四分。但取土甚遠。遍野虛沙。尋距五里。挖至丈餘者。若一概論方給銀。恐難濟事。共估銀三萬三千七百一十兩五錢五分。清江浦一帶運隄南岸自王鄉家起至壽州廠止長二千二百二十丈。北岸自月河口起至許嶺家止長八百八十丈。各加高三四尺。濶一丈四五尺不等。共計土二萬二千一十方。計工六萬六千三十工。該銀一千九百八十兩九錢。內北岸一帶缺口計用椿料該銀四百八十六兩。修復通濟閘并寒天妃閘。該用工料銀一千兩。修復板閘清江福興新莊等閘。各加石六七層不等。共該工料銀一千四百九十兩。四閘各開月河。打壩截流。該用銀五百兩。修復仁義等壩約用銀五千兩。寶應湖隄自六淺起至瓦店止長三十里。添石修補工料。該銀八萬九千五百七十兩。沿隄設減水閘六座。每座工價銀五百兩。共銀三千兩。下流應開支河。如興化縣白駒丁溪二場鹽城縣新河廟等處。各應挑深濶丈尺不等。共計夫工該銀二萬五千八百七十六兩。揚州河自高廟至楊子橋計長五千八百二丈。應挑深六七尺不等。共計夫工該銀一萬九千四百四十六兩五錢。儀真縣自東關至石人頭止計長四十五里。量加疏濬。該銀三千五百兩。舊例管工員役各有廩糧。府佐每員日給廩糧銀一錢二分。每員各帶書辦一名。日給口糧四分。州縣佐貳首領等官每員日給廩糧銀六分。省祭陰醫

義民老人每名日給口糧銀四分。約該銀二千兩。以上總括之數。大約如此。至於工程難易。料價低昂。哀多益寡。截長補短。容臣等隨時通融計算。要在節縮。不至虛糜而已。通共該銀六十六萬四千八百六十六兩八錢四分六厘。除前支剩銀一萬五千六百六十七兩六錢二分。衛夫減省工食銀一萬五千兩。揚州挑淺并白駒丁溪鹽場新河廟等處支河議動巡鹽衙門銀三萬五千八百七十六兩外。尙該銀五十九萬八千三百二十三兩二錢二分六厘。臣等查得河道歲額錢糧。山東南直隸原無餘積。每遇年例修築。東那西補。甚至縮手待敵。以至因循誤事。追悔莫及。止有河南一省。見貯銀一十九萬餘兩。而彼中河工繁鉅。如梁韓口黃陵岡孫家渡趙皮寨銅瓦廂等處。築隄防決。費用不貲。剝肉補瘡。勢難那借。合無俯念大工緊急。破格議處。准照臣等所請改折。將正額解京。餘銀留工支用。庶爲不費之惠。如有不可。乞照都給事中劉鉉題請內帑支發。通貯淮安府庫。聽司道官查覈。赴巡鹽御史處覆覈關支。伏候聖裁。

一議分督。照得工程浩大。道里遙遠。若非多官分理。畫地責成。不免顧此失彼。今議徐州北岸。自呂梁洪至邳州直河止一帶遙隄七十里。該海防道參政龔大器總管。自桃源縣古城以下遙隄六十里。并塞界內缺口。及建陵城滾水壩一座。該淮北分司郎中余毅中總管。自



桃源界至清河權墩止遙隄六十里。并塞界內決口及建安娘城滾水壩一座。該添註管河道副使張純總管自徐州南岸玄黃二舖月隄。并靈睢界內遙隄五十餘里。及建崔鎮口滾水壩一座。該徐州道副使林紹總管自睢寧界內遙隄四十餘里。并築歸仁集隄三十五里。該穎州道僉事朱東光總管修復淮安板閘至新莊閘共四閘。修築裏河兩隄。并新壩北一帶幫築新舊隄及塞黃浦口。該水利道僉事楊化總管外興鹽支河。先經該道呈允行各縣掌印官開挑。仍應該道查催。築高家堰中段。塞天妃堰朱家口。開復通濟閘。修築趙家口迤西隄岸。修復仁義等五壩。該添註管河郎中張譽總管修築寶應一帶土石隄。并建減水閘及挑濬揚州至儀真一帶河道。該南河分司郎中施天麟總管以上司道八員。均分八大工。每司道一員。分督府佐二員。計用府佐一十六員。每府佐一員。分督州縣佐貳首領陰醫省祭官十員。共用一百六十員。聽臣等於所屬地方。掄才調取。如員數不足。及各官間有經手要務妨占者。容臣等於附近省分。有司內查有幹濟素著者。另行具奏調用。分工之後。大小官員。俱要悉心經理。縱有應埋公務。止許工上幹辦。不得擅離工次。工完之日。通將效勞官員。分別等第。及怠玩誤事者。一併題請處分。以昭勸懲。伏候聖裁。

一議夫役。照得前項工程。一時並舉。約用夫八萬名。內除量調各處徭夫七千五百名外。今

議派淮安府所屬募夫二萬七千五百名。揚廬鳳三府各募夫一萬名。徐州所屬募夫一萬名。滁和二州共募夫五千名。內有災傷及衝繁州縣聽該道官酌議減免。應得工食照常支給。仍行各該掌印官按籍派募。如將無籍之徒應名塞責。以致臨工逃散者。容臣等指名參究。伏候聖裁。奉聖旨。工部知道。

### 工部覆前疏

題爲勘估兩河工程。乞賜早請錢糧。以便興舉事。該總理河漕右都御史潘季馴題前事。奉聖旨。工部知道。欽此。欽遵。通抄到部。送司案呈到部。看得右都御史潘季馴等議稱。北自豐沛。南抵瓜儀。約有一千餘里。欲圖久遠不拔。必須重費財力。今將勘估過銀兩。官夫數目。款列前來。誠爲一勞永逸之計。相應照款開立前件議擬。上請定奪。伏乞聖裁。

### 計開

一議錢糧。前件看得夫役工有難易之不同。物料時有消長之不齊。若一概取必而授之。值則虧苦者有不均之嘆。而人情競詭於趨避矣。今該右都御史潘季馴侍郎江一麟議夫役工難者加增。毋令苦樂不均。物料照時估價。仍要嚴稽冒破。委於國計民生有裨。相應依

擬除勘估崔鎮等處一帶寒決築隄諸項工程。合用工料。要留改折餘銀支用一節。臣等已經遵旨。會同戶部議覆。奉聖旨。這漕糧改折。不獨以措支河工費用。亦可因此以蘇息東南之民。還再議停當來說。欽此。欽遵。隨該本部移咨戶部。徑自再議外。伏候聖裁。

一議分督。前件看得右都御史潘季馴侍郎江一麟議將河工自徐州北岸起至儀真止。內一應築隄寒決諸各等項工程。分爲八大工。以司道郎中等官總管。每司道一員分督所屬府佐二員。每府佐一員分督州縣佐貳首領陰醫省祭等官十員。各行幹理工完之日。要將各官分別功罪。題請各一節。爲照河工浩大。北自豐沛。南抵瓜儀。延袤一千餘里。非多官分管。未免顧此失彼。今河漕二臣。將本工畫地。委官分管。條議前來。誠得專委責成之意。相應依擬。恭候命下本部。備咨右都御史潘季馴侍郎江一麟。將分工委官事宜。除原議總管官楊化施天麟奉聖旨拿降另行外。其餘各照議施行。如委官不足。并中間有要務妨占。難以離任者。即於附近省分。有司內查有幹才者。調用。自分工之後。大小官員。俱要實心幹事。務期底績。如有應理事務。止許就工幹辦。不許擅離工所。以致妨事。工完之日。將管工官員。查有勤勞實績及怠玩誤事。并賣放夫役者。分別等第。一併題請處分。伏乞聖裁。

一議夫役。前件看得前項工程浩鉅。必藉夫役之多。以集事。若不分投雇募。則恐一時短

少以致妨僭厥工。今右都御史潘季馴侍郎江一麟議所用夫約八萬名。除量調各處徭夫七千五百名外。議於廬鳳淮揚徐滁和各府州酌數雇募。內於災傷衝繁處所。則聽該道酌量減免。條議委當。相應依擬。伏候命下本部。咨行右都御史潘季馴侍郎江一麟。即將前項所派夫役。仍行各掌印官按籍雇募。工食照常支給。如有將無籍之徒搪塞。以致臨工逃散。或將老弱不堪者充役誤事。及不先時預爲募處。致臨時缺少。或虛冒夫役名色。志在侵漁者。司道等官不時查覈。呈請河漕衙開指名參奏。以憑重處。再照前項河工地里遙遠。夫役星散。若不嚴加點閘。則虛實無從稽考。合無行令募夫府州縣各掌印官。選委廉能官員。部押赴工。明開某官一員押夫若干名。每夫或三十名或二十名編爲一隊。如內有躲役影射者。令互相覺察。本隊夫役即時稟明押夫委官。委官具呈管工府佐追提。如有本隊互相容隱不舉者。查出并治。並不准工。伏乞聖裁。奉聖旨依擬行。

河防一覽卷之八

【奏疏】

恭報續議工程疏

臣潘季馴謹題爲遵奉明旨恭報續議工程以便查覈事據管理河道工部郎中余毅中張譽主事陳瑛管河兵備水利營田等道參政龔大器游季勳副使張純僉事朱東光史邦直會呈抄蒙總理河漕并漕撫衙門憲牌仰職等即查各工內有與原議不同工程會同類總開呈以憑覆覈奏聞依蒙隨將各工逐一查勘除兩河分合及應築應塞工程俱與原議無異又隄工各高濶丈尺各相度地形增減不等候通完之日冊報外所有隄岸閘壩勢當小更難拘原議者委應裁酌用圖經久以淮北言之如南岸遙隄原議自靈璧縣張字舖起至邳州果字舖止共長九十八里其張字舖以上原因河岸甚高故止議將元黃二舖掃灣處所展築月隄長八百五十丈今繕勘得徐州三山頭起至靈璧縣張字舖共五十餘里一帶河岸雖高然先年遇有異常泛漲亦往往漫決若止展築元黃二舖月隄尙有可虞相應一併接築遙隄計長九千

餘丈。庶成全隄。無復遺慮。其兀黃二舖止築順水壩。以遏水勢。不必另行展築。果字舖以下。原因縷隄頗遠。故未議築。遙隄續勘得。果字舖至李字舖。縷隄約四里餘。猶覺逼近。仍應增築。遙隄計長七百五十丈。北岸遙隄內。邳州各山并匙頭灣二處。俱有水溝。潞蓄積水。合行疏泄。今議各建兩洞一座。以便泄水。桃源縣古城起至李太口止。計六十里內。原議滾水壩三座。已經建完。今歲伏水漲溢之時。甚賴其減泄之力。但李太口至清河縣計五十餘里。未議建壩。恐水勢至此。尙致漲溢。勘得三義鎮地形原窪。衆水所趨。合增建滾水壩一座。其長濶丈尺。俱照前壩。庶分殺之路既多。則衝漫之患可免。此淮北工程所當續議者也。以淮南言之。原議修復清江等閘。今勘得通濟閘逼近淮河。直受衝齧。勢甚洶湧。且閘設年久。底椿朽爛。加石太重。不免坍塌。相應改建於甘羅城東堅實之地。仍改濬河口。斜向西南。使水勢紆迴。不至直射。庶使啓閉前閘既已改建。則新莊閘距此不及一里。難容多船。而關鎖太促。水勢湍急。不易啓閉。相應拆卸。福興閘上距通濟閘計二十里。下距清江閘止五里。遠近懸絕。且亦因年久圯壞。難以加石。今議改建於壽州廠適中處所。其清江一閘。仍照原議修復。至於板閘地窪水平。無庸啓閉。止須照舊。免行增高。又勘得原議修復五壩。內信字壩逼近淮城。且係黃河掃灣。先年久廢不用。今已將禮智二壩修復。見在車盤船隻。其仁義二壩原共一口出船。亦係黃河掃灣。又與清

江閘相鄰。恐有意外衝漫之患。見今築隄在上。以禦黃流。不便修復。查得舊有天妃閘。正與清河直對。相應建壩一座。於本閘之裏。則車盤尤便。而船隻無阻矣。其興鹽等處入海支河。原因高堰未築。黃浦八淺等決未塞。水勢浩蕩。故踵襲節年舊議。欲加挑濬。以洩積水。近勘得高堰築完。黃浦八淺俱塞。下流已乾。無水可洩。而海口之水。反高於內地。若復挑濬。則海水灌入。既傷民田。復損鹽利。正在勘議間。隨該巡鹽御史姜璧躬親踏勘。題請免濬。復經司道會勘。委應停止。夫興鹽等處。既以無水可洩。免濬支河。若寶應湖隄。仍照原議。於三十里之內。添建減水閘六座。又恐分流太多。興鹽難受。况建閘初意。祇因上流水溢。恐致傷隄。今高堰既築。通濟閘外。又經題准。每年水漲之時。築壩斷流。則寶應湖水。不甚盈溢。湖隄可保無虞。不必多建減閘。今議修復舊閘二座。創建一座。通共四座。庶運道民田。俱有攸賴。其開挑興鹽支河工費銀二萬五千八百七十六兩。原議於巡鹽衙門動支運司銀兩。仍聽該衙門作正支銷。此淮南工程所當續議者也。以上事宜。皆因地損益。隨時劑量。期於有濟。不敢執泥。俱經會議。僉同。陸續呈請舉行。詎今蒙行查。理合類報。轉奏施行等因。到臣。案照先准工部咨。爲奉明旨。陳燕見議。治兩河經略。以圖永利事。該臣等題議各項工程事宜。本部覆題奉聖旨。這治河事宜。既經河漕諸臣會議停當。依擬都准行。着他們悉心着實。興建永利。各該經委分任人員。如有玩愒推諉。

虛費財力者。許不時拿問參治。其未盡事宜及臨時事勢或與原議不合的。也着陸續奏聞。務求有益。應用錢糧。你部裏便會戶部上緊議來。欽此。備咨到臣。俱經通行司道。欽遵興舉。聞。續據郎中余毅中等議。將各工增損事宜。節次會呈前來。又經臣等親閱相同。批允舉行。訖。祇緣工程大體俱無更張。止於節目微有不同。事涉煩瑣。未敢屑屑瀆奏。茲當告成。伊邇合行通查。類報。今據前因。爲照兩河大工。延袤千里。臣等荒度之初。止詳於兩河分合大勢。而隄岸閘壩之遠近多寡。未須臨時再加斟酌。仰荷我皇上坐照萬里洞燭事機。假臣以便宜之權。開臣以續奏之路。所據司道陸續議報前來。在淮北則有徐州三山頭起至張字舖加築遙隄五十餘里。玄黃二舖止建順水壩一道。果字舖起至李字舖加築遙隄四里餘。谷山匙頭灘添建兩洞二座。三義鎮添建凌水壩一座。此皆原題未載。委應增益。在淮南則有通濟福興二閘從新改遷。新莊逼近通濟閘。勢難兩存。板閘止宜仍舊。信字壩逼近黃河。不便修復。仁義壩改建天妃閘以裹。至于興鹽等處入海支河。因高堰黃浦入淺隄。無水可洩。自宜停止。而寶應湖隄減水閘止須修建四座。此原備載。委當更易。因時審勢。隨地制宜。臣等固不敢惜勞以貽一簣之虧。亦不敢妄舉以滋無益之費。其應添錢糧。即於原議河工銀內通融裁節濟用。並無求益加派之事。除將各隄工高濶丈尺相度地形增減不等。通候查覈外。相應奏報。謹具題知。奉聖旨。



工部知道。

查復舊規疏

臣潘季馴謹題爲乞恩查復舊規以利漕渠事。臣等謬膺簡畀，肩厥鉅艱，日夕兢兢，惟恐一事未周，有負任使。茲幸廟堂主持，諸臣効力，導河防決之工，駸駸然有涓埃之驗矣。但於淮安一帶閘河，終有未安者。臣等初至地方，日擊淮安西門外直至河口六十里，運渠高墊，舟行地面。昔日河岸，今爲漕底，而閘水湍激，糧運一艘，非七八百人不能牽挽。過閘者，臣竊怪之。詢之地方，俱云自開天妃閘後，專引黃水入閘，且任其常流，並無啓閉。而高堰決進之水，又復鎖其下流，以致沙淤日積。萬歷五年，河渠堙塞，隨濬隨淤，不得已開朱家口引清水灌之，方得通舟。臣等乃決意開復通濟閘，以引范家湖清流，且請修舉陳瑄故事，嚴其啓閉。隨該工部覆奉欽依，咨行遵照。見由通濟閘引水濟舟，河身亦覺漸刷。數年之間，或可復故矣。但沙淤可免，而溜溜如舊，牽挽不易，而啓閉甚艱。且聞淮河暴發，亦有渾流。臣等求其善處之術，而未得也。隨行據司道等官郎中張譽等博訪志傳，查得永樂初年，原由海運，淮郡與黃淮二河隔絕不通。後因平江伯陳瑄疏清江浦之渠，引水以通淮安。東南運艘始得直達京師，復慮黃淮之水沉沙易

淤也。乃建清江福興新莊等閘。遞互啓閉。鎖鑰掌之。漕撫開放屬之分司。法至嚴矣。復慮水發之時。湍急難於啓閉。又於新莊閘外。暫築土壩。以遏水頭。水退即去壩。用閘如常。延至嘉靖八年。閘壩禁廢弛。河渠淤塞。該漕運都御史唐龍。河道侍郎潘希曾。題奉欽依。仍復舊規。載在簡冊者。班班可考也。數十年來。初議浸失。前患復滋。臣等詢之地方耆宿。皆云運渠卑隘。最易沙淤。淮地低窪。最易盈溢。若做古人之制。嚴啓閉於春冬之時。築外壩於伏秋之際。則非惟河身無壅墊之患。而田廬亦無浸潦之苦矣。臣等反覆思維。請復舊規爲便。及查每歲三月以前糧運俱過。六月初旬。鮮貢已盡。其餘船隻。皆可盤壩。並無妨礙。即如鎮江京口閘。遇冬築塞。入春方啓。其例固可援也。伏望敕下該部。再加查議。如果臣等所言不謬。每歲於六月初旬。一遇運艘并鮮貢馬船過盡。即於通濟閘外。暫築土壩。以遏橫流。一應官民船隻。俱由盤壩出入。至九月初旬。仍舊開壩用閘。庶於國計民生。兩利之矣。再照人情易玩。法禁易弛。勢豪人員。任情自恣者。難保不無。地方當事之臣。稍稍阿徇。輒至濫觴。懇望皇上。特降嚴旨。容臣等刻石金書。垂示各閘之上。庶幾人心有常日之警。而良法無久弊之患矣。謹題請旨。奉聖旨。工部知道。

工部覆前疏

題爲乞恩查復舊規以利漕渠事。該總理河漕右都御史潘季馴題前事。又該總督漕運右侍郎江一麟題同前事。俱奉聖旨工部知道。欽此。欽遵。送司案呈到部。看得總理河漕右都御史閉季馴等題稱。淮安一帶黃淮灌入。運渠高墊。且開水湍急。啓閉甚難。查得平江伯陳瑄建潘江福興新莊等閘。遞互啓閉。以防黃水之淤。又於水發之時。閘外暫築土壩。遏水頭。以便啓閉。水退即去壩。用閘如常。其法至善。議要修復舊規。并請特降嚴旨。垂示各閘。使勢豪人員不敢任情阻撓一節。爲照黃淮二河之入淮郡也。由先臣平江伯陳瑄疏濬清江浦始也。而其立法則甚密矣。慮黃淮灌入泥沙易淤。而建閘以慎啓閉。又慮水發湍急。難于啓閉。而築壩以遏水衝。自是渾流不入。閘河不壅。大爲運道之利。後來閘壩廢弛。淮安一帶河渠始日就墊塞。費區畫矣。况水發常在六月。此時糧運及鮮貢船隻。俱已過盡。築壩似無妨礙。雖官民船隻。盤剝未便。終不得因此而廢河漕大計也。且築壩止是水發時候。自六月至九月初旬。不過三月餘。即去壩用閘如常。不便於民船者無幾時。而便於漕渠者則甚大。所據都御史潘季馴等具題前來。似應依擬。恭候命下本部。備咨總理河漕右都御史潘季馴漕運侍郎江一麟。即查先年閘壩舊規。斟酌修復。凡清江福興新莊等閘。俱要以時啓閉。不得開放無度。以致泥沙灌入。有礙運道。每歲至六月初旬。運艘馬船過盡。伏水將發。即於通濟閘外暫築土壩。以遏橫流。一應

官民船隻俱暫行盤壩出入。至九月初旬開壩。復用閘啓閉。仍將題准明旨刊示各閘之上。如有勢豪人員恃強阻撓。應拿問者徑自拿問。應參奏者徑自參奏。毋得阿徇假借。庶人心知警法不廢格。而河渠有賴矣。奉聖旨。這築壩盤壩事宜俱依擬。有勢豪人等阻撓的。即便拿了問罪。完日於該地方枷號三個月發落。干礙職官參奏處治。

### 申明鮮貢船隻疏

臣潘季馴謹題爲乞恩查復舊規以利漕渠事。准南京兵部咨稱案照先准臣等咨。已經備行南京內守備廳速查。今運鮮貢等差總計幾起。已撥裝載。五月以前過淮出口者幾起。未撥差限尙遲。約在築壩之後發行者幾起。一面移文本部差撥。就令通濟閘外停泊。以待各差抵閘。盤船前進。庶免臨期誤事。隨准該廳回稱冰鮮鱗魚例在五月初旬採完。楊梅例在小暑之後採取。俱各在京裝船。先用底蓋鹽冰打築結實。然後起運。前進冰鮮船隻勢不可盤。煩爲議處到部。合咨河道漕運衙門酌量前差尙在五月之內。伏秋未至。水勢未發。姑待二起鮮船出口。方行築壩。如壩不容緩。前項冰鮮作何計處。使不誤事。希由咨報等因到臣。案照萬曆七年七月二十六日准工部咨該臣等會題前事。本部覆議。每歲至六月初旬。伏水將發。即于通濟閘

外暫築土壩。以遏橫流。一應官民船隻俱暫行盤壩出入。至九月初旬開壩。仍將題准明旨刊示各閘之上。如有勢豪人員恃強阻撓。應拿問者徑自拿問。應參奏者徑自參奏。毋得阿徇假借等因。題奏聖旨。這築壩盤壩事宜俱依擬。有勢豪人等阻撓的。即便拿了問罪。完日於該地方枷號三個月發落。干礙職官參奏處治。欽此。備咨臣等通行欽遵。今歲遇閏五月二十二日。即已入伏。相應先期築壩。誠恐鮮貢船隻所至後期。預咨該部轉行早發去後。今准前因。該臣會同漕撫右都御史江一麟議照清江裏河向因外河伏水。帶入泥沙。致堵漕渠。應照先臣陳瑄舊規。先期築壩。已經題奉嚴旨。通令遵守。今該監既謂冰鮮鱈魚在五月初旬。楊梅在小暑之後。各採完。若肯較常早發。沿途無滯。計五月二十以前。二項鮮船俱可趕到。若至入伏之日。各船愆期不至。勢難久待。隨經咨覆該部及延至入伏之日。定行築壩外。但恐各監拘泥故常。逗遛不發。延至壩成。又以盤船不便推諉。臣等不無掣肘。况所進冰鮮不多。盤壩只須頃刻。即使車盤不便。亦可預撥馬船停泊壩外。鮮到之日。對船盤剝。亦無妨礙。漕渠關係甚重。似當量從權宜。伏望皇上軫念國計。敕下該部。申飭南京守備衙門。每歲冰鮮船隻較常催償早發。務在伏前旬日抵淮。不至有礙築壩。萬一愆期。即從天妃壩車盤或預撥馬船停泊外河船剝。著爲定例。庶臨期不致妨阻。而漕渠永無沙堵矣。謹題請旨。奉聖旨。工部知道。

### 工部覆前疏

題爲乞恩查復舊規以利漕渠事。該總理河漕尙書潘季馴總督曹撫右都御史江一麟題爲前事。奉聖旨工部知道。欽此。欽遵。抄出到部。送司案呈到部。看得冰鮮船隻關係上供。而築壩護漕。關係國計。均之有不可緩者。今據河臣題稱遵旨築壩。當在伏水未發之先。其勢必不能停築。以待船據。守臣回稱。鮮船發行。常在開壩既成之後。其勢又不能車船以盤壩。似於上供國計。兩有所妨。然臣等竊以爲無傷也。查得正德嘉靖年間五月。已有鱗魚到京。且既稱鮮品。尤宜早進。既係薦廟。尤該及時。但近年以來。進鮮內臣。每以採鮮既完之後。方行措辦裝具。附載貨物。勾當稽留。動踰旬日。沿途淹頓。又致愆期。比至京師。則色味俱變。不惟有礙築壩。且於薦鮮之義。亦甚無當也。臣省吾先任南京。見守備太監喬郎。每事用心整飭。才復優於幹濟。即據今回稱鱗魚例在五月初旬採完。蓋四月二十日前後。已行採矣。若隨船器用。如冰鹽之類。預備停當。一經採完。即便發行。不過半月。即可過淮。正是伏前之期。自於築壩無礙。至於楊梅等物。又與魚鮮不同。即至壩成。不妨盤剝。但今年閏月伏早。此時議行。恐不及事。而壩又不容緩築。萬一鱗魚到遲。必須設法對船盤剝。方克有濟。此在內守備臣及河漕大臣各以上供國

計不分彼此一體籌度處置自當無誤其剝完之後自淮以北仍須嚴令地方官多方護送速進務期共濟不得應付遲緩至于以後年分鱒魚鮮船定限五月初頭發行伏前定限過淮楊梅等船定從便聽將南京馬快空船於未築壩之先預撥過淮停泊壩外以俟盤剝則上供既無後時之虞國計亦得先事之備矣又訪得南京進鮮各船每將起程之時有無籍棍徒號稱夥光設局詐騙肆意把持要得倚船覓利領差內臣萬一不從即遍遞誣狀使船不得行在京不遂復隨至沿途騷擾管河各官或有不察墮其計中即復稽留延緩是以船行不得如期非盡由發船之果遲也合無恭候命下容臣等行南京及河漕各衙門出示嚴禁如有前項棍徒仍前作梗者即便拿問從重究罪仍枷號通渠或濱河處所示警至於到淮盤剝之際在河漕大臣尤宜加意禁約使奉差者不苦於道路之難則盤剝從容僨進便利所關於築壩治漕者實非小補均乞聖明裁定敕下欽遵施行奉聖旨是

### 報黃浦築塞疏

爲恭報黃浦築塞事據管理南河郎中張譽呈稱蒙臣等牌督修築黃浦決口隨行揚州府同知韓相鳩工聚料于本年三月初三日興工官夫晝夜併力攔河北壩于本月初十日南壩于

十二日各合口斷流訖。又蒙本院部親臨工所。仍恐卑薄難恃。又於北壩之外。加築一壩。共濶十丈。足禦水患。爲照黃浦衝決。爲害已極。經營數年。勞費不貲。妨運病民。莫此爲甚。即今兩壩告成。橫流堵截。山寶興鹽一帶。生靈悉得平土而居。耕穫而食。官民船艘。往來無虞。復業編氓。歡聲載道。誠地方無窮之利也。除將舊口填土。接築老隄。通候工完另呈。合先具報。等因到臣。據此案。查先該臣等題爲河患已除。流民復業。乞恩蠲租。以廣招徠事。已將高堰隄成。黃浦見在興築緣由。于本月初一日具題。訖。臣隨督行該司。設法督築黃浦去後。今據前因。該臣會同漕撫侍郎江一麟。照得高堰據黃浦之上游。而黃浦爲興寶鹽城之門戶。高堰既築。黃浦之工自易。黃浦既塞。則興寶鹽城一帶田地。盡行乾出。自茲兩河橫流。涓滴皆由正道。千里之內。民業皆可耕穫。而海口河身。日見深刷。亦可免壅潰之患矣。除將正口填築高厚。務裨永賴。仍候大工全完。另報外。爲此具題。奉聖旨。工部知道。

### 河工告成疏

臣潘季馴謹題爲恭報兩河工成。仰慰聖衷事。萬歷七年十月初六日。據管河郎中余毅中。張譽主事陳瑛。管河兵備營田等道。參政龔大器。游季勳。副使張純。僉事朱東光。史邦直。曾呈節



奉總理河漕并總督漕撫衙門劄付。俱爲奉明旨陳愚見議治兩河經略以圖永利等事。行職等將派定工程。鳩夫辦料。刻期興舉。該職等道依督率分委府州縣等官親詣工所。照式率作。俱自萬曆六年九月十五等日興工。至今陸續通完。訖總計築過土隄長一十萬二千二百六十八丈三尺一寸。砌過石隄長三千三百七十四丈九尺。塞過大小決口共一百三十九處。建過減水石壩四座。每座長三十丈。修建過新舊閘三座。車壩三座。築過攔河順水等壩十道。建過函洞二座。減水閘四座。濬過運河淤淺長一萬一千五百六十三丈五尺。開過河渠二道。栽過低柳八十二萬二千二百株。其各隄高卑酌量地形低昂。隨宜增損。自一丈二尺以至七八尺不等。數目煩瑣。聽候勘官至日。另冊開送覈實外。照得數年以來。黃淮二河胥失故道。至以地方州縣爲壑。蓋由黃河惟恃縷隄。而縷隄逼近河濱。東水太急。每遇伏秋。輒被衝決。橫溢肆出一瀉千里。莫之底極。北岸則決崔鎮。李太等處。南岸則決龍窩。周營等處。共百餘口。而又從小河口白洋河灌入。挾永堦諸河之水。越歸仁集。直射泗州。陵寢。以至正河。流縵泥沙。停滯。河身墊高。淮水又因高家堰年久圯壞。潰決東奔。破黃浦。決八淺。而山陽高寶興鹽悉成沮洳。清口將爲平陸。黃淮分流。淤沙罔滌。雲梯關入海之路。坐此淺狹。而運道民生俱病矣。自去秋興工之後。諸決盡寒。水悉歸漕。衝剛力專。日就深廣。今遙隄告竣。自徐抵淮六百餘里。兩隄相望。

基址既遠。且皆真土膠泥。奔杵堅實。絕無往歲雜沙虛鬆之弊。蜿蜒綿亘。始如長山夾峙。而河流于其中。即使異常泛漲。縷隄不支。而溢至遙隄。勢力淺緩。容蓄寬舒。必復歸漕。不能潰出。譬之重門待暴。則暴必難侵。增縷禦寒。則寒必難入。兼以歸仁一隄。橫截于宿桃南岸要害之區。使黃水不得南決泗州。至于桃清北岸。又有減水四壩。以節宣盈溢之水。不令傷隄。故在遙隄之內。則運渠可無淺阻。在遙隄之外。則民田可免滄沒。雖不能保河水之不溢。而能保其必不奪河。固不能保縷隄之無虞。而能保其至遙即止。蓋嘗考弘治以前。張秋數塞數決。自先任都御史劉大夏將黃陵岡一帶增築太行隄一道。而張秋之患遂息。此其已試之明驗也。今職等所築之遙隄。即太行隄之別名耳。况係真正淤土。較之太行雜沙。又有不侔者。故今歲伏初驟漲。桃清一帶水爲遙隄所束。稍落即歸正漕。沙隨水刷。河身愈深。河岸愈峻。前歲桃清之河。膠不可楫。今深且不測。而兩岸迥然高矣。上流如呂梁兩崖。俱露巉石。波流湍急。漸復舊洪。徐邳一帶。年來篙探及底者。今測之皆深七八丈。兩岸居民。無復昔年蕩析播遷之苦。此黃水復其故道之效也。高家堰屹然如城。堅固足恃。今淮水涓滴盡趨清口。會黃入海。清口日深。上流日涸。故不特堰內之地可耕。而堰外湖坡。漸成赤地。蓋堰外原係民田。田之外爲湖。湖之外爲淮。向皆混爲一壑。而今始復其本體矣。其高寶一帶。因上流俱已築塞。湖水不至漲滿。且寶應石

隄新砌堅緻。故雖秋間霖潦浹旬。隄俱如故。黃浦入淺築塞之後。俱各無虞。柳浦灣一帶新隄。環抱淮城。並無齒損。不特高寶田地得以耕藝。而上自虹泗盱眙。下及山陽興鹽等處。皆成沃壤。此淮水復其故道之效也。見今淮城以西。清河以東。二澗交流。儼若涇渭。誠所謂同爲逆河。以入于海矣。海口之深測之已十餘丈。蓋借水攻水。以河治河。黃淮並注。水滌沙行。無復壅滯。非特不相爲扼。而且交相爲用。故當秋漲之日。而其景象如此。昔年沙墊河淺。水溢地上。祇見其多。今則沙刷河深。水由地中。祇見其少。地方士民。皆謂二十年來所曠見也。此蓋仰仗我皇上聖德格天。神明協相。聖心獨斷。廟算堅持。是以本院部得行初志。職等得効胼胝。向使少爲異議所搖。則此時不知更作何狀矣。今財力不多。費而功徧于兩河。時日不久。曠而效收于期月。數千里魚鱉之民。一旦登于衽席。億萬年命脈之路。一旦底于翁甯。職等幸獲遭逢。曷勝慶幸。除各用過錢糧另行冊報外。所據完過工程。擬合開坐呈報施行等因。到臣。據此案查萬歷六年五月十五日。該臣欽奉敕諭。都察院右都御史兼工部左侍郎潘季馴。近年河淮泛濫。爲害運道梗塞。民不安居。朕甚憂之。已屢有旨。責之地方官經理。奈無實心任事之臣。動以工費艱鉅爲解。又當事諸臣意見不同。事多掣肘。以致日久無功。今特命爾前去督理河漕事務。將河道都御史暫行裁革。以其事專屬於爾。其南北直隸山東河南地方有與河道相干者。就令

各該巡撫官照地分管俱聽爾提督爾宜親歷河流所經會同各巡撫官督同各部屬司道等官悉心協慮講求致害之因博采平治之策備查草灣口何爲既開復淤及今作何開通全淮水何爲南徙不復及今作何疏導徐邳河身高並州城何以疏之使平黃浦崔鎮等口久塞無功何以築之使固及查諸臣歷年建議有行奏疏逐一勘議要見老黃河故道應否開復清桃正河應否挑濬高家堰寶應隄應否修築小浮橋新衝口可否濟運應否加挑又徐邳以上地形南昂北下恐隄防一潰勢必奔流北徙將爲閘河之梗亦要審其孰爲正河孰爲支河孰爲合河或正而常厚其防或支而常殺其勢或合而當分其流一併勘議詳妥奏聞區處合用錢糧及選任司道等官俱許以便宜奏請給發委用功成之日通將効勞官員一體分別陞賞如有抗違不服及推諉誤事者文官五品以下武官四品以下徑自提問應奏請者奏請定奪其提督軍務事宜查照河道衙門原管行事爾候事甯之日奏請回京朝廷以爾諳習河道素有才望特茲重任爾尙殫忠籌慮盡力區畫俾河漕無梗塞之虞人民免昏墊之苦必有懋賞以酬爾功毋或畏難憚勞隱忠不效及苟且塞責有負委任爾其勉之故諭欽此臣遵奉綸音會同撫臣躬率司道等官沿河荒度周諮分合之勢博求平治之謀羣策畢集衆論僉同隨題爲奉明旨陳愚見議治兩河經略以圖永利事該工部覆看得都御史潘季馴侍郎江一麟

足遍口訊。僉議詳酌。爲是陸說。其所修置寢格。俱目繫利害。而非道聽之言。庶同則釋。而非弗詢之謀。蓋隄防既固。塞決又審。水無旁駛。而正流自急。沙隨水刷。而海口自復。此正以水治水。而不爲穿鑿之論。迂漫之談。頃來治河之說。未有逾於二臣之議等因。題奉聖旨。這治河事宜。既經河漕諸臣會議停當。依擬都准行。着他們悉心着實興建永利。各該經委分任人員。如有玩愒推諉。虛費財力者。許不時拿問參治。其未盡事宜。及臨時事勢。或與原議不合的。也着陸續奏聞。務求有益。應用錢糧。你部裏便會戶部上緊議來。欽此。備咨臣等欽遵。查照興舉施行。准此。又該臣等題爲勘估兩河工程。乞賜早請錢糧。以便興舉事。款議分督。徐州北岸自呂梁。洪至邳州直河止。遙隄。該海防道參政龔大器總管。自桃源古城以下。遙隄。并塞界內決口。及建減水壩一座。又先分馬廠坡遙隄。該中河郎中余毅中總管。自桃源縣界至清河縣北。遙隄。并塞界內決口。及建減水壩一座。該添註管河道副使張純總管。自徐州南岸。并靈睢界內。遙隄。及建減水壩一座。該徐州道副使林紹總管。睢寧界內。遙隄。并築歸仁集隄。該潁州道僉事朱東光總管。修復淮安運河各閘。修築裏河兩隄。并新城北一帶。幫築新舊隄。及塞黃浦口。催濬興鹽支河。該水利道僉事楊化總管。築高家堰。塞天妃閘。朱家口。開復通濟閘。修築趙家口。迤西隄岸。修復各壩。該添註管河郎中張譽總管。修築寶應一帶土石隄。并建減水閘及挑濬。

揚州至儀真一帶河道。該南河郎中施天麟總管等因。本部覆奉欽依。咨行臣等。分工間。郎中施天麟降調。將原分寶應隄工。改委管田道僉事史邦直。揚州挑淺。改委該府知府虞德燁。僉事楊化罷黜。將原分清江浦兩岸築隄。改委主事陳瑛。增修閘座。改委淮安府知府宋伯華各管理。柳浦灣築新舊隄。并添寶應八淺決工。增委今補水利道副使張純。黃浦口決工。增委今補南河郎中張譽。各兼理。副使林紹間往。原分一工。該今任參政游季勳管理。俱於上年九月十五日起土興工。臣等具本題知訖。又該臣等查得。司道續報工程。淮北有徐州三山頭起至張字舖。增築遙隄。玄黃二舖。止建順水壩一道。果字舖起至李字舖。增築遙隄。谷山匙頭灣。添建涵洞二座。三義鎮。添建減水壩一座。此皆原題未載。續議增益。淮南有通濟福興二閘。從新改遷。新莊逼近通濟閘。勢難兩存。板閘止宜仍舊。信字壩逼近黃河。不便修復。仁義壩。改建天如閘裏。興鹽等處支河。因高堰黃浦八淺。隄成無水可洩。自宜停止。寶應湖隄減水閘。止須修建四座。此原題備載。續議更易。又經具本題知訖。臣等回在催督各工去後。今據前因。除將報到工程。逐一查覈。相同外。該臣等同漕運巡撫。郎江一麟。竊照我朝建都燕冀。轉輸運道。實爲咽喉。自儀真至淮安。則資淮河之水。自清河至徐州。則資黃河之水。黃河自西而來。淮河自南而來。合流於清河縣之東。經安東達雲梯關而入於海。此自宋及今兩漕之故道也。數年以

來崔鎮諸口決而黃水遂北。高堰黃浦決而淮水遂東。桃清虹泗山陽高寶興秦田廬墳墓俱成巨浸而入海故道。幾成平陸。臣等受事之初。觸目驚心。所至之處。子遺之民。扳輿號泣。觀者皆爲隕涕。然議論紛起。有謂故道當棄者。有謂諸決當留者。有謂當開支河以殺下流者。有謂海口當另行開濬者。臣等反覆計議。棄故道則必欲乘新衝。新衝皆住址陸地。漫不成渠。淺澀難以浮舟。不可也。留諸決則正河必奪。桃清之間。僅存溝水。淮揚兩郡。一望成湖。不可也。開支河則黃河必不兩行。自古紀之。淮河泛溢。隨地沮洳。水中鑿渠。則不能別尋他道。則不得。况殺者無幾。而來者滔滔。昏墊之患。何時而止。不可也。惟有開濬海口一節。於理爲順。方在猶豫。而工部遺咨。叮嚀臣等親詣踏看。臣等乃乘輕舫。出雲梯關。至海濱。延袤四望。則見積沙成灘。中間行水之路。不及十分之一。然海口故道。則廣自二三里。以至十餘里。詢之土人。皆云往時深不可測。近因淮黃分流。止餘涓滴。入海水少而緩。故沙停而積。海口淺而隘耳。若兩河之水。仍舊全歸故道。則海口仍舊。全復原額。不必別尋開鑿。徒費無益也。臣等乃思欲疏下流。先固上源。欲遏旁支。先防正道。遂決意塞決。以挽其趨。築遙隄以防其決。建減水壩以殺其勢。而保其隄。一歲之間。兩河歸正。沙刷水深。海口大闢。田廬盡復。流移歸業。禾黍頽登。國計無阻。而民生亦有賴矣。蓋築塞似爲阻水。而不知力不專則沙不刷。阻之者乃所以疏之也。合流似爲益水。

而不知力不宏。則沙不滌。益之者乃所以殺之也。旁溢則水散而淺。返正則水束而深。水行沙面。則見其高。水行河底。則見其卑。此既治之後。與未治之先。光景大相懸絕也。每歲修防不失。即此便爲永圖。借水攻沙。以水治水。臣等蒙昧之見。如此而已。至於復開壩。嚴啓閉。疏濬揚河之淺。亦皆尋繹先臣陳瑄故業。原無奇謀秘策。駭人觀聽者。偶倖成功。殊非人力。實皆仰賴我皇上仁孝格天。中和建極。誠敬潛孚。而祇靈助順。恩威並運。而黎獻傾心。念轉輸乃足國之資。軫昏墊切儆予之慮。宵旰靡皇。絲綸屢飭。其始也。併河漕以一事權。假便宜以任展布。故臣等得效芻蕘之言。其既也。速媮墮以警冥頑。折滂言以定國是。故臣等得竟胼胝之力。俯從改折之議。國計與民困咸紓。特頒賞賚之仁。臣工與夫役競勸。致茲無兢之功。遂成一歲之內。今兩河蒸蒸日上。歌帝德而祝聖壽者。且洋溢乎寰宇矣。臣等何敢貪天功以爲己力哉。除用過錢糧。聽巡鹽衙門查覈奏繳外。謹將完過工程總數開坐。伏乞敕下該部覆議。差官勘閱明實施行。謹題請旨。

計開

淮北工程

總管官中河郎中余毅中督淮安府同知王琰兗州府同知唐文華桃源縣知縣郭顯忠濟



寧衛指揮文棟等築完原分桃源縣北岸遙隄自古城起至關王廟止長八千六百八十九丈二尺俱根闊六丈頂闊二丈高一丈至九尺不等塞完崔鎮大決口一處及劉真君廟等決口共三十六處共長四百六十一丈五寸築完古城堰口隄一道長三百六十丈造完崔鎮減水石壩一座壩身連鴈翅共長三十丈又築完續增徐州南岸三山遙隄長二千四百二十八丈三尺五寸俱根闊四丈頂濶一丈六尺高八九尺不等又督淮安府同知蔡玠築完桃源縣迤南馬廠坡遙隄長七百四十六丈根闊七丈至五丈不等頂闊二丈高一丈至八尺不等以上各隄共栽過低柳一十六萬一千六百株

總管官海防兵備道參政龔大器督廬州府通判宋守中邳州知州張延熙泰州同知王法祖等築完原分邳州北岸遙隄自呂梁山麓起至直河止長九千四百六十四丈一尺俱根濶六丈至五丈不等頂濶二丈至一丈五六尺不等高九尺至七八尺不等造完續增谷山并匙頭灣兩洞各一座又築完續增徐州南岸三山遙隄長一千三百九十一丈八尺俱根闊四丈頂闊一丈四五尺不等高八尺以上各隄共栽過低柳五萬二千株

總管官徐州兵備道參政游季勳督淮安府同知蔡玠徐州知州孫養魁靈璧縣知縣張允孚睢寧縣知縣徐密桃源縣知縣郭顯忠等築完原分靈睢南岸遙隄自竇老穀堆起至象

山止長一萬一千七百五十七丈二尺。但根闊六丈。頂闊二丈。高九尺。造完徐昇鎮減水石壩一座。壩身連鴈翅共長三十丈。又築完續增徐州三山遙隄二千六百四十七丈一尺六寸。但根闊四丈。頂闊一丈六尺。高九尺。順水壩一道。又會同南河分司改建通濟閘一座。并開外攔河壩一道。以上各隄共栽過低柳一十五萬一千六百株。

總管官水利道副使張純督兗州府同知樊克宅清河縣知縣石子璞等。築完原分桃源清河縣北岸遙隄自關王廟起至護城隄止長九千七百二十一丈。但根闊六丈。頂闊二丈。高一丈至八九尺不等。塞完張泗冲等決口一十八處。共長二百一十一丈。造完季太鎮減水石壩一座。續增三義鎮減水石壩一座。壩身連鴈翅俱長三十丈。又築完續增徐州南岸三山遙隄二千五百四十九丈。但根闊四丈。頂闊一丈五尺。高八尺。以上各隄共栽過低柳五萬三千株。

總管官潁州兵備道僉事朱東光督鳳陽府通判李光前廬州府通判查志文歸德府通判祝可立泗州守備衛鎬張大德等。築完原分睢甯南岸遙隄自象山起至果字舖止長六千九百三十六丈七尺。但根闊九丈至六丈六尺不等。頂闊二丈一尺。高一丈至八尺不等。及築完續增果字舖起至李字舖止遙隄長八百四十八丈六尺。但根闊六丈六尺。頂闊二丈。

一尺。高八九尺不等。又築完原分歸仁集遙隄長七千六百八十三丈八尺。根闊六丈至四丈五尺不等。頂闊三丈至一丈不等。高一丈二尺至八九尺不等。內填塞決口四十七處。共長三百四十九丈。以上各隄。共栽過低柳三十萬株。

### 淮南工程

總管官南河郎中張譽督揚州府同知韓栢淮安府同知鄭國彥王瑛兩淮運副曹鎮東昌府通判王一鳳中軍都司俞尙志等。修築高家堰隄六十餘里。計長一萬八百七十八丈。俱根闊十五丈至八丈六丈不等。頂闊六丈至二丈。高一丈二三尺不等。內三千四百丈。會同徐水二道。俱用椿板廂護堅固。塞完大澗漾湯恩口等決三十三處。共長一千一百一十八丈。又塞朱家決口一處。先築月壩一道。長八十丈。并築本口直隄長一十四丈。閉塞天妃閘一座。修築趙家口迤西兩岸隄共長六百七十四丈。根闊二丈至一丈。頂闊二丈至一丈。高一丈至八尺不等。又修復禮智壩各一座。添設天妃壩一座。又開出閘河口自甘羅城起至淮河長二百一十三丈。底闊四丈。面闊六丈。深一丈。兩岸築隄共長四百二十六丈。根闊十丈。頂闊二丈。高一丈。又塞完續分黃浦決口一處。先築南北攔河壩二道。共長四十五丈。根闊一十三丈。頂闊十丈。高二丈。填築正口土隄一道。長九十四丈。白水底至頂高三丈八

尺根闊一十三丈。又曾同徐州道改建通濟閘一座。并閘外築攔河壩一道。以上各隄共栽過低柳六萬株。

總管官清江廠主事陳瑛督留守司經歷屠鎰把總諸葛堯賓鎮撫王紹武等築完清江浦南北兩岸河隄共長三千三百九丈八尺。俱根闊一丈二尺。頂闊八尺五寸。高三尺五寸。塞完鄭家決口一處。長六十七丈。加隄一道。自水底至頂高一丈三四尺不等。底闊二丈五尺。頂闊九尺。

總管官水利道副使張純督淮安府帶銜同知劉順之兩淮運副曹鉞寶應縣知縣李贄修完原分淮安府新城北舊隄自清江浦起至柳浦灣止共長九千八百五十一丈。對闊二丈一丈五尺。以至一丈不等。高四尺至二三尺不等。築完新隄自柳浦灣至高嶺止長六千六百四十丈。俱根闊四丈五尺。頂闊一丈五尺。高六尺。築完西橋壩一座。長十二丈。自水底至頂高二丈。築塞八淺決口一處。長八十五丈六尺。內土隄根闊七八丈不等。頂濶二丈。自水底至頂高二丈。至一丈四五尺不等。外包砌石隄一道。長八十五丈六尺。高一丈五六尺不等。又石隄兩頭接築舊土隄共長一百五十丈。俱根闊三丈。頂闊二丈。高一丈三四尺不等。南北攔河壩二道。共長五十九丈。西隄一道。長二百四十一丈。俱根闊五六丈不等。頂闊一

丈三四尺不等。自水底至頂高一丈六七尺不等。以上各隄共栽過低柳五萬四千株。總管官營田道僉事史邦直督揚州府通判王開郭紹等修築完寶應湖土隄長四千四百九十二丈。俱根闊五丈。頂闊三丈。高一丈六七尺不等。砌完石隄長三千三百七十四丈九尺。俱根闊五尺。頂闊三尺。高一丈四五尺不等。上加土。西面三尺。東面四五尺不等。密下椿筴實土者計長一千一百一十七丈一尺。修建減水閘共四座。

總管官揚州府知府虞德燁督江都縣知縣秦應驄原任儀真縣知縣况于梧等挑完淤淺河道自高廟起至儀真縣東關止共長一萬一千五百六十三丈五尺。挑深五尺至二三尺不等。闊十四丈至八丈不等。

總管官淮安府知府宋伯華督同同知劉順之通判况于梧清河縣知縣石子璞等造完改建福興閘一座。修完清江閘一座。增砌荒細石塊共長二千二百九十二丈三尺。旁開月河一道長九十三丈。築完南北攔河壩二道共長三十五丈。閘下兩岸并月河隄共長一百二十四丈。俱用椿筴廂護。奉聖旨工部知道。

### 黃河來流艱阻疏

臣潘季馴謹題爲黃河來流艱阻。後患可虞。乞恩速賜查議。以圖治安事。臣等猥以譴忤。謬膺

重任。晝夜思惟。欲求萬全之策。以報陛下罔極之恩。食不甘味。寢不貼席者三月矣。而卒未能快於心也。竊惟今之談河患者。莫不曰徐邳河身墊高。水易溢也。崔鎮諸口未塞。桃清淺阻也。高堰黃浦淮水橫流。淮揚之民久爲魚鱉也。淮黃兩河之水。漫無歸宿。海口沙墊也。此徐州迤南之患耳。目之所徧記。運道之所必資。故人人得而言之也。臣等已於前月二十八日會本具題陛下。俯從臣請。兩年之內。或可脫淮揚昏墊之苦。免運道梗阻之虞。而臣等亦得藉以少道愆尤矣。然其大可憂者不在此也。敢敬陳之。臣等初抵淮安。即詢黃河出接運道處。所衆云出徐州小浮橋。則臣等喜。以爲此黃河故道之最順者也。又詢水深若干。衆云深四丈餘。則臣等又喜。以爲此河身之本體也。又詢小浮橋迤西則爲胡佃溝。爲梁樓溝。爲北陳。爲鴈門。集爲石城集。而石城集以上十五里。則爲崔家口。即去歲八月所決之口也。其間淺深俱不能答。臣等即行淮安府管河同知王琰前往測度去後。隨於四月二十九日親督淮北分司郎中余毅中。添註管河郎中張譽。徐州管河兵備副使林紹。添註管河副使張純。沿河踏勘。行至徐州。隨據王琰揭報。前項河水深七八尺。至二三尺不等。而梁樓溝至北陳三十里。則止深一尺六七寸。散漫湖坡。一望無際。原係民間住址陸地。非比沙淤。可刷。故河流逾年而淺阻如故也。臣等不勝驚訝。隨據徐州碭山鄉民段守金。龔泮王霜等各呈稱。老河故道。自新集歷趙家園。蕭縣蘄

門出小浮橋。一向安流。名曰銅幫鐵底。後因河南水患。另開一道。出小河口。本河漸被沙淺。至嘉靖三十七年。河遂北徙。忽東忽西。靡有定向。行水河底。即是陸地。比之故道。高出三丈有餘。停阻泛濫。妨運殃民。懇乞開復老河。上下永利等情。臣等當督前司道。并山東管河道副使。卮元哲。河南管河道副使唐汝迪。由夏鎮歷豐沛。至崔家口。復自崔家口。歷河南歸德府之虞城。夏邑。商邱諸縣。至新集閱視。則見黃河大勢。已直趨潘家口矣。隨據地方鄉老。靳廷道等稟稱。去此十二三里。自丁家道口以下。二百二十餘里。舊河形迹。見在。儘可開復。臣等即自潘家口。歷丁家道口。馬牧集。韓家道口。司家道口。牛黃坳。趙家圈。至蕭縣一帶地方。委有河形。中間淤平者四分之一。地勢高亢。南趨便利。用錐鑽探河底。俱係浮沙。見水即可衝刷。又據夏邑。虞城等縣鄉官王極。鄉民歐陽照等七百餘人。連名呈告。俱爲乞疏舊河。便民事。竊照黃河故道。自虞城迤下。蕭縣迤上。夏邑迤北。嶗山迤南。嘉靖年間。岸闊底深。水勢安流。既於運河無虞。亦於民田無害。商賈通行。貿易大途。民稱豐庶。自嘉靖三十六年以後。故道漸淤。河隨北徙。黃流泛溢。青野汪洋。居民十不存一。運道屢年阻滯。告乞早爲開通。上利下便。是誠萬世盛舉等情。臣等度其言實。爲探本之論。但道里遙遠。工費鉅艱。復又沿河荒度。更無省近可從者。而臣等猶冀崔家口一帶淺阻去處。或可疏濬成河。易爲力也。復督各官。駕小舫。至梁樓溝北。陳等處。

躬親測量。委果淺阻。河底原係陸地。委難衝刷。蕭縣地方。一望瀰漫。民無粒食。號訴之聲。令人酸楚。該縣城外。環水爲壑。城中瀦水爲池。居民逃徙。官吏嬰城難守。見今題請移縣。臣等竊思之一縣之害。此其小也。夫黃河并合汴沁諸水。萬里湍流。勢若奔馬。陡然遇淺。形如檻限。其性必怒。奔潰決裂之禍。臣等恐不在徐邳。而在河南山東也。止緣徐州以北。非運道經行之所。耳。耳之後。人不及見。止見其出自小浮橋。而不考小浮橋之所自來。遂以爲無虞耳。豈知水從上源決出。運道必傷。往年黃陵岡孫家渡。趙皮寨之故。轍可嘆乎。臣等又查得新集故道。河身深廣。自元及我朝嘉靖年間。行之甚利。後一變而爲溜溝。再變而爲濁河。又再變而爲秦溝。止因河身淺澀。隨行隨徙。然皆有丈餘之水。未若今之逾尺也。淺愈甚。則變愈速。臣等是以夙夜爲懼也。臣等又查得此河先年亦嘗建議開復。止緣工費浩繁。因而寢閣。臣等竊料先時諸臣。雖以工費爲辭。實非本心。蓋誠慮黃河之性叵測。萬一開復之後。復有他決。罪將安辭。目前既有。一河可通。姑爲苟安之計耳。而不知臣子任君父之事。惟常論可否。不當論利害。惟當計其功之必成。不當慮其後之難必。且所慮者他決也。隨決隨塞。亦非有甚難者。故河變遷之後。何處不溢。何年不決。竊獨不慮之乎。臣等與司道諸臣計之。故河之復。其利有五。河從潘家口出。小浮橋。則新集迤東一帶河道。俱爲平陸。曹單豐沛之民。永無昏墊之苦。一利也。河身深廣。受水



必多。每歲可免泛溢之患。虞夏豐沛之民。得以安居樂業。二利也。河從南行去。會通河甚遠。開渠可保無虞。三利也。來流既深。建甌之勢。導滌自易。則徐州以下。河身亦必因而深刷。四利也。小浮橋之來流。既安。則秦溝可免復衝。而茶城永無淤塞之虞。五利也。臣等以爲復之便。至於復故道難。仍新衝易。復故道勞。仍新衝逸。則臣等計之熟矣。然舍難就易。趨逸避勞。慮日後未可必之身謀。而不惜將來必致之大患。皆非臣等之所以盡忠於陛下也。臣等勘議之後。即擬具題。但因伏水將發。猶望水勢洶湧。或可衝刷成渠。近又行據同知王琰回稱。勘得北陳等處原深一尺六七寸者。今止深七八尺。臣等看得伏秋暴漲之時。水增六尺有餘。則客水消落之後。不免仍存本體矣。伏望敕下該部查議。如果臣等所言不謬。擬議上請。特差素識水性科臣一員前來。候秋深水落。與臣等會同山東河南撫臣及兼理河道巡鹽御史。躬親勘議。如果可復。即便估計錢糧。曾本題請。早賜施行。地方幸甚。臣等幸甚。謹題請旨。奉聖旨。工部知道。

### 申飭徐北要害疏

臣潘季馴謹題爲伏秋將屆。徐北來流未安。乞恩申飭地方當事。臣工嚴守要害處所。共保無虞事。先該臣于去年六月間。勘得黃河自徐州小浮橋迤北。胡佃梁樓北。陳鴈門等處。水僅逾

尺散漫不能成渠。下壅上潰。勢甚可慮。博訪輿論。僉謂開復新集舊河爲便。該臣會同漕撫侍郎江一麟題爲黃河來流艱阻。後患可虞。乞恩速賜查議。以圖治安事。請差科臣前來會勘。問該工科都給事中王道成等題爲河工艱鉅。懇乞聖明特議。次第舉行。以求萬全事。該工部議覆。咨臣及江一麟會同各該撫按督率司道等官親詣踏勘。虛心講求。料臣不必議遣。臣隨咨行河南山東兩省巡撫都御史并劄行管河道備呈巡按巡鹽御史各督行布按都三司守巡管河等道。先勘明妥通詳臣等約期會集覆議。未報。臣竊惟徐淮之間。水患相仍。錢糧正當缺乏之時。地方又值災傷之候。頻年動衆。殊有隱憂。今兩河之工。延袤千里。至艱且鉅。臣不自揣度。復以徐北爲請。誠慮夫伏秋水漲。蕭湯從中梗阻。則河南山東不無潰決之虞。而去歲伏秋已幸無恙。臣言益愧其迂矣。况大工至今未完。若復遠事開浚。強弩之末。官夫俱疲。轉眼入伏大雨時行。其勢自不能不候。南工報竣之後。方行議處也。然杞人之憂。則猶有未能釋然者。臣自去冬至今。節行郎中余毅中徐州道參政游季勳躬往踏勘。其淺阻漫散如故。見分一股衝出濁河。倒灌茶城。濁河即嘉靖年間所決之河也。伏秋之時。難保不更他徙。臣再三諮訪。咸謂開復既所未能。則隄防誠爲喫緊。查得河南則有廟王口李景文莊前于家店劉獸醫口黃陵岡陶家店馬家口銅瓦廂浣泥河煉城口榮花樹芝麻莊。山東則有楊家口梁靖口毛王寨武

家壩侯家林韋家樓單縣縷隄七舖至十一舖太行隄十五舖至二十舖等處皆爲掃灣迎溜之所。先年失事。往往由此。若能固守。或可無虞。第須各該河臣。移駐要害處所。躬親督理。乃克有濟。臣以南工方在。促成之際。東奔西馳。未遑他顧。而淮安去河南山東千有餘里。文移往返。動經月餘。伏秋之時。呼吸變態。臣坐鎮于千里之外。豈能調度之適期也。臣查得先該尙書吳桂芳准吏部咨。節奉聖旨。河道事務。着各該巡撫官照地分管。俱屬吳桂芳提督。欽此。臣奉敕諭。開載亦同。伏望敕下該部。轉行各該巡撫都御史。就近督同管河道及各該府縣等官。躬親料理。某處隄岸卑薄。相應加修。某處水勢衝突。相應捲埽。大小一心。晝夜無懈。則時水雖狂。力既不能旁決。勢必勉就原趨。而張秋迤南一帶運道。自可無虞矣。再照夫人之情。難於慮始。而天下之事。貴在廣忠。臣與江一麟具題之時。諄諄乞差科臣者。誠見新集故河淹塞已久。一旦翹爲開復之說。殊駭觀聽。且臣愚一人之見。誠不自信。而欲求協於僉謀之同耳。今該部既稱科臣不必議遣。而復行臣會同各該撫按。是又以臣爲主議之人。而以各該撫按爲附矣。諸臣縱有異同。其誰能逆觀黃河之無恙。遂決然於拂臣之請乎。亦孰肯面斥臣言之非。而昌言其不必復乎。至於心知其當復。而深畏其勞費之難。因循不敢言者。即司道之中。難保其必無也。少有依違。後言滋起。僨事之由。端在於是。且自徐州直至虞夏商邱等處。臣俱足踏而目擊之。

而臣之愚見。腐說亦盡於前疏矣。未經勘議者。在河南山東諸臣耳。伏望敕下該部。催行各該撫按。及淮揚巡鹽御史。徑自會期。躬赴淺阻。及應開復處所。逐一踏勘。如果臣言可采。不嫌於狗同。臣言乖違。不妨於互異。或俟南工報完。即行議舉。或念官夫積困。始事隄防。虛心講求。務求協一。會本具題。聽該部覆議。咨臣遵奉施行。則人心早定。而河患可弭矣。臣非敢有所推避也。正欲以諸臣之見。訂臣之得失。爲行止也。伏望皇上特賜允行。河防幸甚。臣愚幸甚。謹題請旨。奉聖旨。工部知道。

河防一覽卷之九

【奏疏】

覆議善後疏

臣潘季馴謹題爲河工告成敷陳善後事宜以圖永利事據管理中河郎中余毅中南河郎中張譽徐州兵備兼管河道按察使張純海防兵備兼管河道參政龔大器會呈奉臣劄付備仰各司道會同即將條開事宜逐一會議要見管河官員作何交代高堰石隄作何整砌清江裏河作何挑濬徐北隄防作何修守歲用錢糧作何積貯查議明妥會呈詳報以憑覆議具題奉此又奉總督漕撫右都御史江一麟劄付同前事依奉照款會議登答明白呈乞題請施行等因到臣據此案照先准工部咨前事該工科石給事中尹瑾條陳具題工部覆奉欽依備咨到臣准此除將款開定法制專責成二事應欽遵者通行濱河有司堂印管河官着實舉行外其重久任整石堰等五事應議覆者已行司道會議詳報前來該臣會同總督漕運巡撫兼管河

道兵部尙書凌雲翼逐一虛心計處覆議相同。堪爲永利。似應依擬。合照款列具陳。伏乞敕下該部。再加查議。上請行臣等遵奉施行。緣係河工告成。敷陳善後事宜。以圖永利。事理謹題請旨。

計開

一重久任以便責成。先該給事中尹瑾題該工部覆議。河道關係最重。類非可以穿鑿於聰明。勾幹於倉卒者。全在得人任久。乃可責成。及要大小官員。俱令久任。或考滿加陞。或積勞超叙。與夫就近遴補。交代親承。最爲治河先務。合咨吏部。查照隆慶六年題奉明旨。都着久任事理。凡管河部屬司道及府州縣佐貳等官。果有熟諳機宜。懋著積效者。考滿即與陞級。照舊管事。資深即與超遷。用勸異勞。有缺就近遴補。取其濡染習熟。臨行新舊交代。令其傳告精詳。至於待異等者。一如待邊臣。由道而撫。由撫而督。由督而本兵。不悛焉。合咨臣等。年終薦舉。預儲可代之才。遇缺揭咨。必求因才而代。徑咨吏部。仍知會本部。以憑會同遵行。其有才志庸劣。及不候交代。輒先離任者。聽其不時奏劾。更易究懲。毋或拘。貽誤大計等因。行據司道等官議報前來。該臣等覆議。爲照治河固難。知河不易。部科首以久任交代爲言。誠爲永賴。至計除薦舉賢能。汰黜不肖。容臣等欽遵着實奉行外。所據新舊交代一節。管河

大小官員地方有難易。職掌有緩急。再須分別明白。庶免臨時掣肘。如中南北三管河郎中。夏鎮南。汪二主事。皆係專職。俱應交代。無容別議。外至如徐州海防。潁州。天津。霸州。大名。臨清。七兵備。則有兼管河道之責。山東河南二副使。則有專管河道之責。但潁州。臨清。天津。霸州。大名。五道。或距河稍遠。或開渠晏然。雖兼河道。于係頗輕。似應俱免交代。其徐州海防二道。則爲河湖喫緊之區。山東河南二道。則爲黃河要害之地。四道憲職。并其所轄府州縣佐貳管河官。如遇陞調去任等項。與同各管河分司。俱應比照巡撫衙門事例。守候交代。仍須咨行吏部知會。凡遇各官陞調去任。即便就近推補。勒限赴任。使舊者得免久候之苦。文憑期限。明開交代之日。方行計算。使舊者得免違限之愆。如不候代。輒先離任者。容總理河漕衙門。查照工部題准事例。指名參奏。伏望敕下該部。再加查議。擬議上請。行臣等遵奉施行。則人情既便。政體畫一。而河務聿興矣。伏乞聖裁。

一。整石堰以固要衝。先該給事中尹瑾題該工部覆議。高家堰。西當淮泗衝流。東護淮揚。沃土。即今築塞已固。要將當中大澗口二十餘里。用石包砌。合咨臣等。今歲預行估計。幹辦。合用石料若干。工費若干。責成徐潁海防三道。併力分工。同心協慮。自萬曆九年興工。酌寬限期。合用錢糧。於大工餘剩銀內支用等因。行據司道等官議報前來。該臣等覆議。查得本堰

自漢陳登剏築之後。至我朝平江伯陳瑄復大築之。向不斲石者。非謂石之不堅。亦以採石之難也。去歲堰工告竣。即設官夫。畫地分守。每歲四月以前。八月以後。水及堤根者。不滿二百丈。防守甚易。惟是五月中至八月盡。最爲喫緊。如有汕刷浪窩。隨時補修。可保無恙。然歲久月深。官吏更換。首尾不知。疎虞難免。誠不如斲砌山石之爲一勞永逸。科臣所云三利。可謂委曲明盡矣。况內土既已堅厚。廂石亦易爲力。但淮安原不產石。俱於徐州取辦。而節年採伐不歇。勢必窮山遠搜。石岩既遠。則出山腳價自倍於昔。水次去工尙餘五百里。糧艘帶運。勢必病軍。民舟搭載。勢必病商。則自備官船。專人管運之費。不可惜也。採石數萬丈。聚匠必須數千名。非遠募於山東江南之間不得也。其直不多。誰肯樂就。及卸石工次。搬運至堰。遠者將十餘里。近亦五六餘里。泥塗深陷。舉趾艱難。趾之伐石出山之苦。又有甚焉。大工甫畢。民勞方休。勢難驟舉。故須濡遲歲月。事難獨任。故須分責三道。該科慮之詳矣。今該臣等公同勘得。大澗口極窪去處。自列字號至水字號止。計長三千丈。合派南河分司三百丈。徐海潁三道各九百丈。每堰長一丈。應砌高一丈。內外用石二層。該石二十丈。共該石六萬丈。約計在山採辦工價。出山腳價。并鑿砌工食。每丈該銀五錢九分。共該銀三萬五千四百兩。合用船隻。除南河分司。查有見在混江龍船免造外。每道該造船九十隻。共船二百七十隻。



每隻連篷桅什物該價銀五十兩。共銀一萬三千五百兩。每船雇募水手六名。共募一千六百二十名。每年工食銀七兩二錢。大約四年爲期。共該銀四萬六千六百五十六兩。募夫搬石上船下船及抬石到工。大約每丈費銀三錢。共銀一萬八千兩。每砌石一丈用石灰二斗。銀八厘。共該銀二百四十兩。堰基三千丈。每丈約截用長杉木二十五根。共計七萬五千根。每根價銀一錢三分。共該銀九千七百五十兩。樁手每丈三十工。該銀一兩二錢。共銀三千六百兩。管工官廩糧比照大工事例。合用府佐二員。每員每日廩給銀一錢。書辦一名。口糧銀四分。州縣佐貳官十二員。每員每日廩給銀六分。書辦一名。口糧銀三分。陰醫省祭等官三十員。每員每日銀四分。每年該銀九百七十二兩。共銀三千八百八十八兩。以上通共該銀一十三萬一千三十四兩。應於大工用剩解還戶部銀一十二萬。奏請留用。尙欠銀一萬一千三十四兩。再於原留用剩銀內動支。除南河分司見有船隻。一面行令採運外。其三道工程。今歲時月已促。止可打造船隻。置辦器具。雇募夫匠完備。明歲採運石塊。陸續細鑿備用。萬曆十年方可下樁。墊砌。隨砌隨探。定限四年以裏工完。聽總理衙門將各效勞官員分別勤惰。題請覈實賞罰。如司道等官處置得宜。能於限前早竣。工堅費省者。破格優處。其原造船隻事畢。量行變價。作正支銷。庶料理周悉。而隄防永固矣。伏乞聖裁。

一濬閘河以利運艘。先該給事中尹瑾題該工部覆議得。隄成之後。淮水悉出清口。裏河。水由地中。第恐外河日深。內河日淺。况前此兩河交注之沙。鋪墊已久。合咨臣等將清江浦河道。照南旺事例。每三年兩次。嚴限大挑。其揚儀河道。時常撻濬。應否幾年一挑。著爲定例。酌議奏請等因。行據司道等官議報前來。該臣等覆議。照得清江浦至頭二三舖一帶。裏河。先臣平江伯陳瑄議爲每歲一挑之法。蓋因河自新莊閘外入口。多納黃流。歲有積沙。勢不得不爾也。今改閘通濟。則全納清流。宜無俟於挑濬。特因往年黃流久注。淤沙久填。水溢沙上。舟因水浮。去歲頭鋪二舖。便覺淺澀。曾勞挑濬。是以該科目擊其事。議復挑濬之法。蓋見外河既已順軌。內河尤須利涉。誠運渠之首務也。然舍歲挑之法。而欲比照南旺事例。定爲三年二挑之制者。蓋知通濟閘之納清。異於天妃閘之納濁。故不必復仍歲挑之勞也。合無始自今歲冬初。查將應濬裏河并烏沙河淤淺去處。築壩斷流。多募夫役。大加挑濬。不得苟且了事。工完之日。聽南河分司覈實造冊奏繳。以後河深利涉。姑免挑濬。如有淺澀。即照南旺事例。三年兩濬。其揚儀河道。去歲挑濬之後。目前尙自深廣。以後如有淺阻。小則量濬。大則加挑。臨時酌擬施行。務求漕舟通利。不致虛費工力。伏乞聖裁。

一防徐北以固上流。先該給事中尹瑾題該工部覆議得。全河之勢。下流安則徐以南無淺。

阻之患。上流順則徐以北無改徙之虞。今南河可以無慮。獨徐北未可忘備。合咨臣等。除行縷二隄。遵照原題興工幫築外。其徐北豐沛陽山一帶。宜大修隄工。以防上流決徙。邵家等壩。宜併力厚築。以斷秦溝舊路。及縷堤有水掃根去處。俱要幫築。守隄夫役。每里補足十名。工食或於山東河南停役銀內解募。或攤派盧鳳揚三府。或將洪夫仍舊徭徵。而以徐州船稅召募夫役。議擬上請。至於量地建舖。安插各夫。召民居集。免派隄租。人自爲守。乃稱長便等因。行據司道等官議報前來。該臣等覆議。照得徐北黃河。乃運道上源。關係尤重。今河出小浮橋。固能刷洪。以深河。而徐南一帶。決塞隄成。水無旁溢。河身益深。掣水愈駛矣。但徐北新衝崔家口上下。尙非故道。萬一北決。則上而開河。不免泛溢之患。下而徐邳一帶。不免淺涸之虞。臣等是以有來流艱阻。乞恩查議之請也。今該科議將徐北隄壩加意修築。并議增夫防守。誠爲慎重上源至計。查得徐北行縷二隄。先該臣會同各撫按題准大修。已督各官夫。見在幫築。此外如華山戚山一帶。原衝沛縣故道。俱倍幫高厚。足恃無恐。先年陽山隄根水掃成河。近俱另築月隄。以爲保障。而又於碭單接界之所。勑築順水斜壩。長一千餘丈。以截流護堤。捍外衛內。見今伏水。止是漫至壩根。即順壩歸河。不復浸及縷堤。至於豐縣邵家大壩。乃遏絕秦溝舊口。最爲喫緊。今將正壩一百四十餘丈。幫厚八丈。高一丈一二尺不等。

又於壩東添築二百餘丈。壩西幫築九百餘丈。以防其旁衝。而上流蘇許二壩。亦俱次第加幫。秦溝之患。似可杜絕。但自礪山以至茶城。共堤一百五十五里有奇。而修守夫役共止七百二十名。委不敷用。合無量照徐南事例。每里派夫八名。共該夫一千二百四十名。除已有七百二十名外。仍該添夫五百二十名。每名工食銀七兩二錢。共該銀三千七百四十四兩。查得廬鳳揚三府。近年除邳堤夫已派協濟。似難再加。又蕭縣因萬曆五年黃河衝漫。災傷特甚。原編洪淺等夫。暫議停編四百餘名。今閭閻生氣初回。尙難議復。合候三二年之後。民稍殷阜。另議編徵。前項增夫工食。合於後開請積貯銀內。每歲按季支給。其畫地建舖一節。亦應比照徐南。每三里建舖一座。以便各夫棲止。仍通行各州縣示諭附近居民。及復業之人。聽其結廬隄上。俾人自爲守。不許輒派隄租。以阻心腹之念。但嚴禁牲畜作踐。務期保護隄工。庶沿隄皆夫。上源可固。而北徙之患自除矣。伏乞聖裁。

一備積貯以裕經費。先該給事中尹瑾題該工部覆議得。河道起自豐沛。至於淮揚。延袤千有餘里。以葺修則工料浩費。以防守則用度鉅艱。乃徒恃歲額不滿數百之銀。而支持千里之河道。坐視大壞極敝。而後請發內帑。似爲失計。見今估修徐北隄工。及包砌高堰石隄。所費不貲。原剩錢糧二十四萬有奇。即使盡留。尙未足用。宜多方措處。約每歲三萬兩。積貯淮

安以便支費。合咨臣等從長酌議。或應再行奏請。或徑自措處等因。行據河道等官議報前來。該臣等覆議。照得防河之法。全在固守隄岸。而隄岸止是土築。原非鎔鐵而成者。河流之汕刷。雨水之淋漓。人畜之踐踏。能保其不損乎。歲修之工。必不可缺。則工料之費。必不可少。故積貯實治河第一義也。今自徐屬以至揚州一千三百餘里。而取給於歲徵災逋數百之銀。是所謂無米而炊。空拳而搏。雖有智者。其何能濟。每歲一遇水患。袖手張目。坐視其敝。蓋由此也。近者大工肇興。仰荷皇上俯從改折之議。在公帑無虧額之虞。在閭閻無加派之苦。以不費之惠。成最繁之工。實皆廟算主持之力也。然事莫難于守成。患恆弭於有備。故臣等於告成之後。惓惓以乞留大工餘剩銀料。以備每歲修防支費。蓋誠慮及於此也。今徐北大修行縷二隄。以估用五萬一千有奇。加以議整高堰石隄。必將大工餘銀。盡數支銷。亦未足用。然則預爲後日修防之備者。容可緩乎。但臣等反復思惟。若欲派之濱河四郡之疲民。則積災子遺。力有不堪。若欲派之各省四百萬之漕糧。則所在加賦。勢又不可。欲再以餘鹽贓罰爲請。則已經工部咨議。未蒙戶部准留。似難再瀆。查得萬曆五年。該戶部題覆淮揚撫按會題爲仰體皇仁。亟處荒蕪要區。開地利以厚民生事。內稱往年凡遇挑河等役。每引帶鹽徵銀以濟工用。議將淮南北共九十萬引。每引許商人帶鹽六斤赴掣。每斤徵銀五釐。并隨

餘鹽銀兩上納。另項貯庫。計每歲帶徵銀二萬七千兩。以濟墾田之費。原議至萬曆八年住支。查得前項帶徵銀兩。往歲原供挑河之用。不係解部濟邊之數。委應徵解河工備用。隨該臣等會同巡鹽御史姜璧面議得。行鹽地方有限。若仍照原議墾田之費。每歲徵銀二萬七千兩。或有未便。合無行令兩淮運司自萬曆九年爲始。每引止帶鹽四斤。每斤徵銀五錢。計每歲止帶徵銀一萬八千兩。解淮安府貯庫。聽兩河歲修之用。俟積貯稍裕。又行停徵數年。若支用將贖。仍舊徵貯夫銀。以挑河爲名。今自儀真至邳徐一帶行鹽之河。既於河臣任之。則此項銀兩亦係應撥之數。非於分外增益也。此外別無措處。更望軫念徐淮爲運道經行之地。實爲天下襟喉。而修河大計。原爲轉運糧儲。戶工二部似屬一體。特賜破格議處。除山東歲額不多。難以協濟外。合無於河南河夫銀內。每歲量減六千兩。再將揚州淮安二鈔關并徐州倉分司所抽稅銀。每處各量留二千兩。并前帶徵鹽銀。共足三萬之數。俱解淮庫。以濟河工。若或再捐實難措手。伏望敕下該部覆議。行臣等遵奉施行。其該科原題。要令濟河要地。俱各建設料廠。每歲秋冬之交。即行預積明歲修防之具。司道置立循環。稽查收放。總理憲臣歲終奏報。夫物料既備。則臨事無縮手之患。稽查既嚴。則平時無冒破之虞。容臣等通行申飭。逐一興舉。無容別議。均乞聖裁。奉聖旨。工部知道。該工部覆議。揚州淮安徐州三

分司每年各准支稅銀一千兩。河南河夫銀六千兩之外，又加三千兩。每年共支銀九千兩。大工餘剩銀准留一半，其餘覆議相同。奉聖旨：這河工善後事宜，既已議定，着凌雲翼督率各官着實修舉，以終前功。餘剩解部銀都着留用，却要支費明白，毋容苟且冒破。其餘俱依擬。

### 覆議河工補益疏

臣潘季馴謹題爲恭覩河工垂戒，尙有可言。懇乞聖慈俯賜亟行，以少圖補益事。據管理中河郎中余毅中、南河郎中張譽、清江浦管閘主事陳瑛、徐州兵備兼管河道左參政游季勳、淮揚海防兼管河道右參政龔大器、水利道副使張純、潁州兵備兼管河道僉事朱東光、營田道僉事史邦直、會呈奉臣劄付備仰各司道會同即將條開事宜逐一會議，要見移建衙舍，作何建設。守隄官夫作何增添，工食錢糧動支何項，庶免分派小民，其宿遷遙隄踏勘地形要害，斟酌事體緩急，如應增築，即估計工費錢糧應用數目，照款查議明妥，會呈詳報，以憑覆議。具題施行。奉此。依奉遵依照款會議登答明白，呈乞題請施行等因。到臣據此案，照先准工部咨前事，該巡按直隸監察御史陳世寶條陳具題。該工部覆奉欽依，備咨到臣。准此。除乞廣賞勞之天

恩一款。先行據督工司道官郎中余毅中等議。呈各工夫役。每名賞銀五分米一斗。老人吏農。每名賞銀一錢。省祭陰義等官。每名賞銀一錢米一斗。呈詳前來。批允動支。各司道宣布天恩。唱名給賞外。所據移建衙舍等項。又經通行各司道會議詳報去後。今據前因。該臣會同漕運巡撫侍郎江一麟。巡按直隸監察御史李時成。姜璧。通將司道會議過事宜。逐一覆加詳議。欸列具陳。伏乞敕下該部。再加查議。上請行臣等遵奉施行。緣係恭覩河工垂成。尙有可言。懇乞聖慈俯賜亟行。以少圖補益事。理。謹題請旨。

計開

一移建管河官衙舍。以重責成。先該御史陳世寶題。該工部覆議咨行臣等。查將淮北淮南各管河官原分地方。擇要害去處。建立衙舍。錢糧卽於河工銀內動支。不得分派小民。及有廢壞寺廟。拆毀取用等因。行據司道等官議報前來。覆該臣等議。照淮揚徐三府州所屬河道。俱係險要之處。而管河官安坐郡邑。雖間或巡視河上。往來不常。緩急無備。今該巡漕御史陳世寶。議將各官衙舍移置河濱。晝地修守。深得專任責成之法。茲以淮北言之。查得原設管河同知二員。已經題奉欽依。一管徐靈睢甯河隄。并豐沛蕭場黃河。一管邳宿桃清河隄。并茶城迤裏閘河。除管邳宿等處者。原駐邳州。無容別議。其管徐靈等處者。原係淮安



府水利同知遙制不便。合創建衙舍於徐州。乃便管理。其各屬州判主簿等官。惟邳清桃三州縣原俱濱河。各官衙舍不必另建。至於睢靈沛滕四縣。各離河爲遠。先年已經題准。將各官衙舍創建河邊。議定睢寧縣管河主簿駐新安鎮。靈璧縣管河主簿駐雙溝鎮。沛縣管河主簿駐夏鎮。滕縣管河主簿駐戚城。徐州雖係濱河。而該州河道延袤頗遠。故上下管河二判官分駐茶城房村二處。俱已派有信地。相應照舊分駐。其宿遷縣管河主簿。查得該縣河道止南岸一而有隄。管理似有餘裕。歸仁新隄關係甚大。責成宜專。應於本隄適中處所。建葺公館一所。每歲自三月初一日起至九月中止。責令本官專駐本隄。督率新設隄夫。并袁撥洪夫。晝夜修守。多方防護。其餘月分。仍駐該縣。又以淮南言之。通濟閘至黃浦一帶河道。及高家堰柳浦灣二隄。已經題准。專責淮安府清軍同知管理。若本官仍駐淮城。則遼遠難於照應。查得通濟閘以上新莊鎮地方空闊。與隄堰閘座附近。相應建設管河同知衙舍。既可以監率官夫。修守隄堰。又便於約束軍民。催護糧船。其山陽縣管河主簿。卽應移駐黃浦鎮。揚州府河道惟有高寶二湖。隄岸最宜防守。管河通判衙舍。相應於邵伯鎮建置。寶應縣管河主簿。則常移駐瓦店。高郵州管河判官。則常移駐界首。江都縣管河主簿。則常移駐腰鋪。儀真縣管河主簿。則常移駐響水閘。其各官應建衙舍。除應駐劄本州縣。及沛滕二縣主

簿原設夏鎮賊城衙舍見在無容創建外其餘俱行各州縣逐一建設合用物料着落各掌印官即將各官原署拆赴河濱改建仍查境內圯廢寺觀及應拆書院酌量移湊其搬運夫匠之費估計呈請量於河工銀內動支湊用並不擾派小民仍嚴諭各官務要遵照議定地方常川駐劄應管隄堰不時巡視修守不許營求別差庶衙舍不爲虛設而官夫皆得實用矣伏乞聖裁

一添設新隄堰夫役以便防守先該御史陳世寶題該工部覆議咨行臣等備查舊隄新隄舊設夫役果否穀通融應用如不敷用應否添設長夫或應否隨時募夫工食支動何項銀兩方得免派小民其加派漕糧恐難輕議必於別項銀內酌處等因行據司道等官議報前來覆該臣等議照新築隄防修守爲急而編設夫役工食爲先查得淮北除宿遷以上各州縣創築遙隄既皆堅固足恃且原設縷隄人夫布置頗密堪以往來修守不必另議添設外其宿遷以下北岸自古城至清河遙隄共一百零七里原無縷隄未經設夫合另設遙隄夫役照例每三里一舖共三十六舖每舖應設夫一十二名老人一名共該夫四百三十二名內除稟撥中河分司洪夫二百名外實該新設夫二百三十二名老人三十六名聽桃源清河二縣管河官各照地督率南岸歸仁集遙隄約四十里每三里一舖共一十三舖每舖亦

設夫十二名。老人一名。共該夫一百五十六名。老人一十三名。聽宿遷縣管河官督率。前項夫老共四百三十七名。每名各工食銀七兩二錢。共該銀二千一百四十六兩四錢。及照歸仁隄最爲險要。修守頗難。仍於洪夫內抽撥一百四十四名。每歲定限三月初旬。亦付宿遷縣管河官管領赴隄。於新設夫老相兼防守。至九月中旬。時水消涸。方許撤放。其桃源縣南岸縷隄三十九里。并馬廠坡遙隄計五里。清河縣南岸縷隄一十里零八十丈。俱應一體建舖設夫。查得桃源縣原有淺夫一百六十六名。清河縣原有淺夫五十三名。堪以分派。亦免另議。其淮南山陽等處。除原額淺夫甚少。不時調發濬淺。尙有不敷。難於稟撥。查得高家堰隄并柳浦灣隄共一百六十里。應設夫五百名。俱建舖於高堰住歇。通融調撥修守。西橋徐家二壩。頗爲險要。各應設夫三十名。更浦八淺各五十名。并烏沙河起至通濟閘止共六十里。應設夫一百名。各酌量地里。建置舖舍。通共應設舖老四十名。聽該管河同知督率各管河主簿大使等官。照地分管。俱每年如式增修。積土隄上。遇有坍塌。及水勢衝激。併力守護。前項夫老共八百名。每名亦各工食銀七兩二錢。共該銀五千七百六十兩。及查稟撥洪夫二百名。工食舊額每名銀六兩。歲該銀一千二百兩。今改常川修守遙隄。較之在洪。應役頗勞。合照新設隄夫一例。每名歲給銀七兩二錢。除原數六兩。仍舊動支徐州船稅外。每名加

銀一兩二錢。歲該加銀二百四十兩。通應議處。以上淮北淮南計應添設夫老共一千二百三十七名。共該工食銀八千九百零六兩四錢。又該加添洪夫工食銀二百四十兩。通共該銀九千一百四十六兩四錢。看得漕糧既難加派。疲民又難增賦。別無堪動錢糧。查有淮安府四稅銀兩原爲修濬河工等項公費。及賠收災傷逋負支用。今水患既除。賠收可省。酌量於內歲支銀七千三百四十兩。儀真縣船稅銀內歲支一千八百六兩四錢。以上二項湊足夫食銀九千一百四十六兩四錢。遇閏月。年分每夫加銀六錢。共銀八百六十二兩二錢。聽于各夫內有曠役。扣除工食。通融補給。庶夫役增置得宜。而錢糧措處不擾矣。伏乞聖裁。

一添設管隄官部夫以保新工。先該御史陳世寶題該工部覆議。咨行臣等詳議。高家堰柳浦灣二隄。如果地屬要害。官難兼攝。奏行吏部銓選。其奸徒盜決高家堰等處水口者。卽照故決盜決山東南旺湖沛縣昭陽湖等處事例。一體問發。仍行法司衙門。增入律例。永爲遵守等因。除盜決事例。無容再議外。其增設隄官一節。行據司道等官議。報前來。覆該臣等議照。設隄以禦水患。設夫以固隄防。誠爲地方永賴之計。然無專官管理。終難責成。查得高堰柳浦。俱屬山陽縣轄。卽有管河主簿一員。各處河隄頗遙。勢不暇給。况二隄僻在荒野。向多盜決。必須專官防守。合無兩隄總設大使一員。專督前夫。往來修守。隨該臣等查得山東東

平州倉大使李時夢向委部領徭夫分築高堰工程勤慎克濟本隄要害處所修築事宜本官久已熟知似應改除管隄大使行令率領新設隄夫修守本官衙舍就于高堰建設居住專聽該府清軍同知提調如果三年修守無失效有勞績量請加陞職銜倘有墮誤究治不貸其東平倉員缺另行銓補庶專有專責而隄可無虞矣伏乞聖裁

一增築宿遷縣遙隄以順民情先該御史陳世寶題該工部覆議咨行臣等季官前去宿遷一帶地方逐一踏勘如遙隄接築果於民生漕運兩便不妨酌估具奏擇暇舉行等因行據司道等官踏勘議報前來覆該臣等看得濱河郡邑俱因築有遙隄永除昏墊之患獨宿遷傍湖無隄不免向隅之泣情委可矜但該縣北岸自直河至古城一帶從來不議築隄者正以本處爲落馬侍丘諸湖停蓄之所湖外馬陵諸山蟻蜿環抱天然遙隄水無他泄不能奪河而水發之時河湖相通縈迴展轉水勢稍得舒緩卽漢賈讓所謂使秋水得有所休息游波寬緩而不迫也且山東蒙沂諸水俱由此湖入河若一概接築遙隄則河水無所停蓄而下流難受益多潰決之虞湖水不能外出而滄浸愈廣反增胥溺之患耳今據各司道議於直河官隄頭起至王珣地頭止約二十里舊有民間自築小隄每歲三四月間水發尙小若此隄無恙則麥亦有秋如伏秋水漲至有殘缺合行該縣掌印管河官每歲冬春間督率本

地民夫或量撥徭夫協助修補。此于漕河固無損益。而于民生亦有裨補矣。伏乞聖裁。奉聖旨。工部知道。欽此。欽遵。本部覆議相同。題奉聖旨。是。

### 高堰請勘疏

臣潘季馴謹題。爲高堰石工將興。鄉官請毀甚力。乞恩速賜勘議。早定國是事。臣於十月十五日。准工部咨覆。奉欽依。行臣等遵奉題准事理。採石墊砌高家堰。臣即分行各司道。查照興舉。南河分司郎中張譽。見在下椿墊砌間。忽聞泗州鄉官欲毀高堰。投摺撫按衙門。且赴南都矣。隨覓視之。原任湖廣參議常三省者。特具一揭本官。又與原任江西副使李紀。湖州知州柳應聘。雖縣知縣高尚志聯名一揭。危詞悍語。不可殫述。而中間最所聳動人者。云祖陵松柏淹枯。護沙洗蕩二句。臣讀之不勝駭汗。先該臣於九月間。督同南河郎中張譽。潁州道副使唐鍊。親詣祖陵勘議。初乘坐船。一入陵東沙湖口。則淺澗難進。復易小舟。約行六七里。登岸陸行。至下馬牌邊半里許。又行里許。至廷堦恭謁訖。當同各官并奉祀朱宗唐。周圍闕視。得山基高阜。松柏茂鬱。湖水僅及岡脚。隄根但露乾地。當詢朱宗唐。淮水疑漲之時。水及何處。本官回稱。至下馬橋邊。堦水係是驟雨宣洩不及。隨據各司道議得。爲今之計。惟有量將舊閘。加增高濶。便洩

雨水前歲所築東南隅石隄較之內地反卑無甚關繫但已成之業亦宜修葺隨將應修隄開及泗州護隄工程咨覆工部訖及又查得陵東嘉靖二十一年所築隄開堅好如故而前歲接築石隄圯裂甚多內無托石外無釘筍必係委管隄工員役侵扣錢糧所致復行該道嚴查何官管理應參應究另行呈奪未報據其淹枯洗蕩等語則臣等恭謁之時豈皆無日者也然臣終不自安也又於十月二十二日臣復往泗州督同該州知州秘自謙盱眙縣知縣詹朝等躬閱祖陵則見河湖之水較前更澀光景頓殊松柏鬱然籠雲蔽日即地濱所栽旱柳亦皆生意勃然而塹外護沙高阜如故臣殊怪士人口吻豈宜如此誑誕回至該州面詢知州秘自謙彼云士夫何常親到陵上閱視止據小人相搆之語遂形紙筆耳竊照臣與前任漕撫都御史江一麟未至之時稱淮水爲害之大高堰當復之由者不知其幾千萬人而形之撫按之奏臆臺省之條陳者又不知其幾千萬言也然臣亦不敢輕率舉事到任之後親詣泗州會集生員里老人等備詢泗州水患在高堰未決之前抑既決之後也僉曰高堰決而泗州水患爲甚也清口塞於高堰未決之前抑既決之後也僉曰高堰決而清口塞也臣應之曰是誠然矣蓋高堰決則淮水東黃河隨蹠其後故清口塞而堰內皆住址陸地其洩不及清口之半故泗州之水聚今塞高堰乃所以通清口而洩泗州之水也遂斷然請于皇上而行之去春高堰既成即聞

泗水消落。臣未之信也。尋于五月二十二日。接到該州鄉官御史趙卿遺臣與江一麟書云。大工底績。數十年沮洳之鄉。一旦膏樞。諸名公必潰之役。修爾告成。國家幸甚。生民幸甚。古謂地平天成。萬世永賴者。更何狀哉。又遣各寮屬書曰。治河之役。古今稱難。今日之河。綠雲梯關。塞而不通。高家堰通而不塞。是以桑梓鞠爲巨浸。陵寢亦有小妨。十餘年來。當事者徒爲長嘆。茲幸神謨妙算。倏爾成功。然今論功者止云兩府貧民得免魚鼈之患。三陵樹木得免淪沒之虞而已。而不知淮黃合流爲祖陵一大合襟。所關尤重。如堰功不成。則淮奔而南矣。即此言之。其功在朝廷。豈特咽喉之樞。腹心之病云乎哉。至於吾民之沃壤極目。歡聲盈耳。又有不能盡述者。而臣猶未之信也。九月十八日。又據營田道僉事史邦直揭稱。本月初七日。職經越城等處。達淮泗間。沿途看得高堰以東地方。數年間。洪波浩蕩。非二三月不見地皮。比及四月。復如初矣。而泗城淮河。瀾漲漫衍。令人蹙焉。今也皆爲平陸。亢爽無復津涘。但布種者。即嘉禾穰穰。而泗州四外。俱成乾灘。淮由地中去。隄岸十餘丈。黃童白叟。共曰。十數年來。未見不意。今日復睹平地。而職亦待罪地方。既已三年。往來此地。歲不下數次。誠未睹有光景如今日也。至於避水子遺。棄田里。廬舍攜父母妻子遠去。望故土而泣然者。數稔矣。今皆即舊基積土爲壁。鋪蘆爲屋。子婦歡呼。鷄犬聚棲。職一經行。咸入照覽。有不圖爲樂之至於斯也。泗士若民。各亦互相駭



愕自遜見識不到。夫以士之士民。世世其中。歲歲其患。又皆縉紳名流。而所識見。僅如此。則治河者可膚淺道哉。臣睹此揭。方快然自以爲得矣。夫據二臣書揭。則高堰未築之前。與旣築之後。光景頓異。了然在目矣。陛下與廟堂諸臣。焦心勞思者數載。臣等胼手胝足者逾年。方成此工。今陛下且俯納科臣之言。用石整砌。以爲億萬年無疆之計矣。三省等遽欲毀之。忍乎哉。今歲之水。委果異常。往歲止發一次。今則再發。往歲以數尺計者。今則及丈。然五月末旬暴漲。六月俱消。七月中旬暴漲。九月俱消。即三省揭中亦謂。目今淮流少減。遂謂祖陵無恙。誠然矣。然旣稱少減。則消而復漲。漲而復消。乃水性必然之理。即徐邳間皆然。不獨泗州爲然也。即山陝河南皆然。不獨徐邳爲然也。有今歲異常之雨。則有今歲異常之水。三省等能使天之不雨乎。南都濱臨大江。蘇浙逼近滄海。五六月間街市可舟。一望巨浸。又聞承天顯陵。水深六七尺。豈亦有高堰阻之乎。臣不敢瑣瑣辯瀆。即以揭中最舛之語。爲皇上陳之。案查嘉靖十二年。前任河道都御史朱裳。請於祖陵東南西南三面。築土隄。以障泛溢。該都御史劉天和接管。勘得祖陵西北二面。土岡聯屬。永奠無虞。其南面山岡之外。即俯臨沙湖。西有陡湖之水。亦滙於此。淮河自西而來。去祖陵一十三里。但遇夏秋淮水泛漲。與前填湖河諸水。通連會合。間或滌及岡足。及下馬橋邊。今據匠役王良等量得。自淮河見流水面。至陵地共高二丈三尺一寸。百餘年。

來每歲水溢。未聞衝決。事體重大。未敢輕擬。等因。又查得泗州志載。元知州韓居仁所撰淮水泛漲記。內稱大德丁未夏五月淮水泛漲。漂沒鄉村廬舍。南門水深七尺。止有二尺二寸。未抵圈輒頂。城中居民驚懼。因致宋辛丑之水。大此二尺。丙寅小此二尺。今取高低尺寸。刊之於石。以後水漲。官民視此。勿驚懼云。又查得盱眙縣石刻。載邑人蔣仲益記。內稱正統六年五月連雨六月。水浸泗城。官民咸避盱眙山。泗州衛前水高一丈二尺。漂沒廬舍。民大驚駭。按宋淳祐咸淳元大德及我朝洪武乙丑永樂己丑皆大水焉。不可不紀。以慰後人云。各志石種種在也。漢唐無效矣。我朝正統以後無論矣。即志刻所載自宋之淳祐至我朝正統。泗州每爲水困。而揭云萬曆以前堰未築。則鮮害。果何說耶。攷之郡志。高堰爲漢陳登所築。而我朝平江伯陳瑄復大葺之。相傳千有餘年。乃云原無高堰。萬曆元年勦築。如其無也。則隆慶四年以前高堰未決。淮揚何以無水患乎。塹外護沙。原非人爲。自開闢以來有之者。即志刻所載歷朝大水較之。今歲不啻三倍。護沙固無恙也。乃今遂洗湯乎。高堰居淮水之東。中間尙隔阜陵泥墩諸湖。淮水北出清口。則直而順。出高堰則逆而難。揭云高堰橫攔直受。使淮流至此紆回曲折。而不得直下。是未知高堰安頓何處。可論水乎。又云萬曆以前。河淮於清口會合。通流入海。惟自高堰一築之後。淮益弱。河益強。蕩激泥沙。日累月積。此又不經甚矣。夫高堰通流。則淮分而弱。反謂

之強。高堰斷流。則淮全而強。反諷之弱。何其舛乎。先任漕撫衙門。特因清口沙塞。製混江龍以滾刷之。畢竟無效。臣與江一麟。率同司道府州縣官二十餘員。親往清口閱視。僅存一綫。人皆褰裳而渡。此高堰大潰時也。延至次年二月。高堰築而清口始闢。今反言之。舛甚矣。三省又云。淮人以此堰爲便。特田土耳其。孰愈。害及人民。夫高堰決後。淮揚之民。流離轉徙。陷於死亡者。不知其數。無論已。淮水東注。黃浦入淺。高寶一帶。橫潰四決。覆溺船隻。阻梗運道。三省輩獨不聞乎。况雲梯關外海口甚闊。全賴淮黃二河併力衝刷。若決高堰。清口必淤。止餘濁流一股。海口必塞。海口塞則下壅上潰。黃河必決。運道必阻。此前歲之覆轍也。三省輩未之知乎。臣前至泗州時。有以清口淤塞語臣者。臣應之曰。清口旣塞。則泗州城外之水。從何宣洩。而今乃消落歸漕。若是也。語者詞少澀。然臣猶不自信。隨率南河郎中張譽。淮安府同知莊桐。清河縣知縣袁世南。駕扁舟從諸湖中。泛至清口。直抵清河縣南。逐一探試。得河湖相連處所。漚爲巨浸。萬頃茫然。中間深淺不等。自一丈五尺。以至四五尺。一入清口。淮水方有歸束。以四丈之繩。繫石投之。未得其底。蓋水散則淺。水聚則深。其理然也。今三省輩欲加疏濬。不知從何措手。試即令彼爲之。當自見也。又云二者以徹高堰爲要。此時清口水僅三尺。近堰之外。深幾二丈。是計其水所從洩。清口難而高堰易也。此又誇張甚矣。夫清口深逾四丈。堰外見有乾灘。水勢迥異。萬日

昭彰。誰能掩乎。蓋不言祖陵之傷。無以動人。不言清口之塞。難以毀堰。而不自知其大非士人舉動矣。臣諦思之。三省輩寧無人心者。何其變亂黑白至此哉。且其搗不行於高堰初議之時。而行於高堰久成之後。不行於淮水暴漲之日。而行於淮水涓落之餘。何哉。蓋緣泗州巨商私販。北自河南。南至瓜儀。勢必假道清浦連河。而各閘不免稽留。分司不免稅權。人甚苦之。數年以來。皆從高堰直達。爲利甚大。先任漕撫都御史王宗沐於萬曆元年築堰斷流。而泗人危言四起。卑薄不加。遂致中圯。侍郎吳桂芳亦知高堰當築。幾欲興工。有泗州棍徒楊明恕者。造爲飛語。多方煽惑。因循墮誤。臣初至之時。亦常以游言力阻。臣堅執不允。繼復詣於高堰迤南五十餘里。周家橋至古溝一帶。鑿渠通湖。而淮安之民。又欲比照高堰一體加築。臣行司道查得彼處地形。亢於高堰。淮水大漲。則從此漫入白馬湖。浹旬不雨。仍爲陸地。天然減水壩也。如欲加築。則淮水暴漲。不免增溢。而高堰難守。然留此以洩異常之水。則可。如欲開鑿成河。淮水從此長流。則非特淮揚被害。而清口亦必復淤。俱不可也。任之而已。泗人無路中通。向抱悒悒。茲當臣將去之日。復襲故智。以申前說。而不知其中更有大不可者。夫祖陵風水。全賴淮黃二河會合于後。風氣完固。爲億萬年無疆之基。地方鄉乘。載吳桂芳語云。鳳泗皇陵。全以黃淮合流入海。爲水會天心。萬水朝宗。眞萬世帝王風水。與趙卿前書所云淮黃合流。爲祖陵一大合襟。

誠知言也。今若於高堰等處，從中劈畫一路分之，使抱身之水，反挑而去，萬一有誤，誰執其咎？夫三省輩偶見淮水暴漲，則動輒以陵寢爲言。至若分淮黃之流，以壞祖宗萬年根本之地，則又悍然不顧，以全淮之力出清口，則以爲寒，中分淮水之力，則清口又以爲通，公平私乎？臣誠不知其何心也。臣又念之，當兩河泛溢之時，民生昏墊，國計梗阻，則人以朝廷不遣大臣愛惜財費而嘵嘵矣。今朝廷遣大臣矣，不惜財費矣，一歲之間，兩河順軌，往來利涉矣，而泗人又欲毀成業而興新工，忘大體而行私臆，地方之私臆無窮，而朝廷之財力有限，臣不知其所終也。此議不息，則大釁猶存，必須速勘明白，方可杜絕後患，而見奉明旨，採石整砌，浚言四起，人心惶惑，何以成功？誠不可不速爲之計也。况臣管窺之見，固止於此，犬馬之力，亦盡於此，而寧敢遂謂其必無遺策乎？今臣奉旨離任，正地方人情得以攄發之時，勸議諸臣，得以虛心之日，伏望敕下該部，轉行尙書，凌雲翼毋拘成議，毋靳成功，可改圖者，即爲改圖，可增損者，即爲增損，荒度諏諮，務求全美，此固國家之幸，地方之幸，而使臣他日無遺議焉，亦臣之大幸也。如三省等之言，必不可行，亦望特降明綸，著爲令甲，使他日懷私好事之徒，不得妄生厲階，以亂國是，則公論早定，而事體畫一矣。再照人情不免顧忌，讒口尤多推委，臣若仍糜廩祿，則他日勸議者，稍拂三省等意，不曰雲翼同官相護，必曰屬寮畏臣徇臣，而不敢持公議矣。伏望將臣放歸

田里使凌雲翼等得以虛心勘議。如臣之所行者是。而三省輩所言者非。即欲用臣未晚也。况臣自治河以來。胼胝之力少。而筆舌之勞多。神銷質耗。心悸魂驚。自知不久於人世矣。前者具疏乞歸。實出懇惻。謬蒙溫旨。畚留。臣雖殞身圖報。亦所甘心。何忍求去。但揆之人情。似已未厭。臣一日不去。人言一日未息。懇乞陛下憐而允之。臣不勝感戴幸望之至。奉聖旨。高輟築後。河道安流。績效已著。豈可因一二無稽之言。又行勘議。着遵前旨。上緊修築。以終前功。常三省倡言阻壞成議。姑革去原職爲民。其餘且不查究。以後再有這等的。拏來重處。工部知道。

遵奉明旨計議河工未盡事宜疏

臣潘季馴謹題。爲遵奉明旨計議河工未盡事宜事。據中河郎中余毅中。徐州兵備兼管河道按察使張純。冒呈。蒙臣并總督漕運巡撫兼管河道兵部尚書凌雲翼憲牌前事。備仰司道。即便會同將所管河道。自清河縣起至徐北止。應議未盡事宜。逐一計議。要見某處工程。原議未及。應該續舉。某處工程。原議已及。即該舉行。某處隄岸卑薄。應該加幫。某處閘壩稀少。應該增建。某處運渠淺澀。應該挑濬。夫料作何調辦。錢糧作何動支。毋以先有成議。而憚於紛更。毋以專事節省。而致貽後悔。此係奉旨虛心計議。以終前功。務求永賴善後長策。該司道必須悉心

詳議。估計明妥。具由會呈通詳。以憑覆議施行。蒙此。該職等遵依。督同淮安府知府樊克宅管河運同王琰。徐州管知州事。運同孫養魁。并淮徐所屬各州縣掌印管河等官。查議得先年淮北一帶。惟恃縷隄。束水太迫。卑薄雜沙。每年伏秋泛漲。決口不下數十。決愈多。則水愈散。而沙愈停。沙愈停。則河愈高。而決愈甚。海口衝刷無力。遂致淺狹。以故徐呂而下。兩岸田廬。溢爲巨浸。桃清運道。僅同一溝。運道民生。敵壞極矣。幸賴廟堂堅持獨斷。部院協心經理。自萬曆六年興工以來。大小決口。悉皆築塞。自徐抵清。除中間原有高阜可恃外。餘俱創建遙隄。然又慮異常暴漲。遙隄或亦難容。故又於桃清北岸。崔鎮。徐昇。季太。三義鎮等處。建減水壩四座。使得宜洩入湖。免傷隄址。告成之後。又開復邳州北岸直河一道。而蒙沂諸水。徑出大河。開復宿遷南岸小河一道。而靈雎積水。漸已消滅。近又查得沂河毛墩各涵洞一座。應改減水壩。見在興工。若徐州以上茶城。口爲清黃接會之所。自改行新河以來。地勢中亢。泉水力弱。每歲連艘過盡之後。黃河大漲之時。或不免數日淺澀。先經題准。三年兩挑。至期本司照例請挑。無容再議。是自徐抵清五百餘里之間。所以導黃入海。爲運道民生計者。亦可謂算無遺策矣。以故水力既專。奔流迅駛。淤沙日滌。河身日深。海口一帶。今歲倍加深濶。此皆河淮合流衝刷之明效也。所據淮北河工。職等再四籌維。委的別無未盡。若欲勉強搜索。恐徒糜費無補。惟有遵照部科題

奉欽依事例。每歲責成掌印管河官。將遙隄應幫處所。歲加幫築。縷隄要害之處。隨宜量修。所謂久安長治之道。似不出此。合行會呈具報施行。又據南河郎中張譽徐州兵備兼管河道按察使張純海防兵備兼管河道參政龔大器。潁州兵備兼管河道副使唐鍊會呈。蒙臣并總督兵部尚書凌雲翼。憲牌俱爲前事。行間又蒙漕撫部院憲牌。爲講求治水事宜。以息民患事。備仰本司道即督各府州縣掌印治河等官。將淮南一帶水道。逐一詳加踏勘。妥見某處作何疏濬。某處作何築塞。其原委察其脈絡。如射陽湖月河等項。條議應否舉行。果否可爲永利。其高家堰既築之後。淮城已免墊溺。果否泛溢。猶爲下流州縣之患。及有一切未盡事宜。會議詳悉。刻限呈報。以憑施行等因。蒙此。俱經備行淮安府知府樊克宅。揚州府知府虞德燁。率同各州縣掌印管河等官。逐一躬親踏勘。查議去後。節據條議呈報前來。隨該職等會議得。淮南水患。其源在淮黃。其重在運道。而民生利病。實相關焉。往年高堰不塞。閘禁不嚴。而淮水始南。黃水又從天妃閘灌入。以至淮揚一帶。浸及城市。興鹽等處之田廬。盡成昏墊。清口遂淤。海口因塞。羣議紛紛。計將無出矣。幸賴廟謨主持。部院殫心經畫。築高家堰。改天妃閘。復三壩。嚴啓閉。而淮黃二水。並免南奔之患。塞黃浦八淺。修復寶應土石隄。而興鹽一帶。俱有可耕之田。清口因淮水衝刷。而日深。海口得淮黃合流。而大關。運計民生。殊爲永賴矣。所據未盡事宜。止有高



寶江都山陽年例歲修之隄。向緣錢糧缺乏。工力不敷。每歲止是支吾。目前未能加幫高厚。及興鹽高泰以裏洩水舊渠。向因黃浦入滬潰決。濁流浸灌。淤墊頗多。誠今日所當議者。以湖隄言之。除寶應大工隄岸。但各修砌完固。惟常率夫防守。無容別議。外其卑薄殘缺之隄。應加工樁木者。寶應土隄計長四千八百一十七丈。內量舊隄止高八尺五寸至九尺者。濶一丈五尺至二丈者。令應加幫共闊二丈五尺。于隄面上加高一尺至一尺五寸。共高一丈。計土論方。共該工銀二千五百二十五兩一錢。應添樁木銀六百九十二兩五錢六分。高郵土隄計長六千七百丈。內量得舊隄止高八尺五寸至九尺者。濶二丈不等。今應加幫共濶二丈五尺。于隄面上加高一尺至一尺五寸。共高一丈。該工銀二千八百四十四兩。應添樁木銀八百二十二兩八錢八分。江都邵伯湖隄。應加添石塊樁木者。計長三千六百丈。合用石塊工料銀一千二百兩。應添密樁。該木價板片釘銀八千一百八十兩二錢六分二釐八毫。應幫土隄八千二百八十丈。今量止高八尺五寸濶二丈不等。應該加幫共濶二丈五尺。隄面上加高一尺五寸。共高一丈。該工銀三千九百七十四兩四錢。山陽縣清江浦外河隄約一百五十餘丈。應用樁木埽料銀四百六十兩。加築隄岸夫工銀五百四十兩。以上四項。共該銀二萬一千二百三十九兩二錢二釐八毫。以減水閘言之。除高寶江都新舊增置閘座。可以宣洩者。無容別議。外高郵

南門舊橋口應改建減水壩一座。寶應子嬰溝舊閘及泰山廟後甄閘九淺石閘應改建減水壩三座。工料等項照依黃河遙隄各減水壩之費約計每座該銀五百兩。并江都邵伯湖加高閘石九座。該銀四百一十四兩三錢一分五釐。共該銀二千四百一十四兩三錢一分五釐。連前隄工通共該銀二萬三千六百五十三兩五錢一分七釐八毫。以上錢糧俱應於見請歲修積貯銀兩動支。如有不敷即於大工餘剩銀內支補者也。然減水閘僅可以洩尋常盈溢之水。至於伏秋霖潦與天長六合諸山之水陡發共注於湖。止憑瓜儀二閘宣洩不及。查得揚州灣頭原有蓮鹽官河一道。內由芒稻白塔二河直達大江。勢甚通便。年久淤淺。先年刑部侍郎王恕曾議挑濬。計長三百四十里。道里遼遠。工費不貲。且議者又謂私販船隻潛度難防。遂致中寢。殊不知洩水之期。每年止是五六月七八四個月喫緊。若從壩口密佈椿柵。就令白塔巡司防守。自可禁絕。其餘月分任從照舊築壩。實爲兩利而無害也。但慮錢糧不敷。今止議先從灣頭濬起。至泰州南門止。計長九十七里。挑深四尺。面濶四丈。底濶二丈。併打壩合用夫工銀一萬零八百兩。相應於巡鹽衙門挑河銀內動支。又查得高寶江都隄內田地及興泰山鹽州縣地方。外受各減水閘之餘瀝。而內蓄時伏連綿之積雨。皆由射陽湖經陵臚喻口出廟灣以入海。迺其故道也。渠道見存。止宜疏濬。先蒙總督兩部院據鹽城知縣楊瑞雲估勘挑濬淺處。計長

一萬二千六百丈合用夫役工費銀七千五百六十兩。已經覆勘明確。相應於原議大工扣存。巡鹽衙門挑濬支河銀內動支者也。以上數事。俱係歲修及原議未舉事宜。亟應興舉。務在明歲伏前報完。方克有濟。但道里遼隔。時日不多。必須分任責成。庶可速就。今議得高寶江都一帶湖隄及修建減水壩等工。相應俱屬南河分司管理。疏濬灣頭鹽河分屬海防兵備道管理。疏濬射陽湖諸淺及清江浦外河隄岸。分屬徐州兵備道管理。庶事有專責。而工可速成矣。再照鹽城知縣楊瑞雲寶應知縣李贄揭。內開稱寶應隄內重剋月河一節。委與高郵康濟河事體相同。節經部院題請勘議舉行。但計工費不貲。當此勞費之餘。災傷之目。恐有不堪。相應暫停。姑候時和年豐。再圖興舉者也。職等會勘無異。理合呈報等因。各緣由到臣。據此案。照先准吏部咨缺官事。該本部題節奉聖旨。河漕職任繁重。宜用重臣經理。凌雲翼改兵部尚書兼都察院左副都御史總督漕運。提督軍務。巡撫鳳陽等處地方。兼管河道。寫敕與他。着上緊赴任。與同潘季馴將河工未盡事宜。虛心計議。着實經理。以終前功。欽此。備咨到臣。欽遵外。續該總督漕運巡撫兼管河道尚書凌雲翼赴任。與臣會行司道各官。將河工未盡事宜會勘呈報去後。今據前因。該臣會同兵部尚書凌雲翼虛心講求。逐細查覈。除中河司道管轄地方。自清及徐五百餘里。黃河經行之處。委已順流入海。運道無梗。居民頗安。惟在查照部科題准事例。防

守不懈。即爲永賴之策。無容別議外。其實應巡南諸湖。聯絡清江浦外。湍溜不多。而關係內河不小。各該隄岸。雖係大工之所未及。實亦運道之所必資。循例歲修。殊屬虛應。尋常僅可支持。暴漲不爲衝塌。蓋人力固自有限。錢糧亦所不敷。無怪其然也。所據司道勘議。加幫隄岸。修改閘壩。濬灣頭河之淤淺。以殺外湖之橫流。疏射陽湖之故道。以洩內地之積潦。工費不煩於請發。分任。尤便於責成。似應依擬。以終前功。伏乞敕下工部查議。上請備行總督衙門。悉照前議。督行各司道。查照動支前項銀兩。嚴督各該掌印管河等官。務趁今冬天氣晴和。分投修理。併乞轉行兩淮巡鹽衙門。將挑河銀兩。查發濟用。定限來歲三月中。通行完竣。以備伏秋。如有惰誤。及苟且塞責。不堪永賴者。指名參奏。庶未盡之工。區畫周備。而運道民生。端有攸賴矣。奉聖旨。工部知道。

申嚴鎮口閘禁疏

臣潘季馴謹題。爲清黃交接處所。濁流倒灌。易淤。懇乞特降綸音。以嚴閘禁事。我國家建鼎燕京。歲漕四百餘萬。自徐以北。則資汶泗諸泉。自徐以南。則資黃河之水。汶泗清而弱。黃河濁而強。而二水交會之處。則茶城是也。每遇伏秋之時。黃流盛發。則必倒灌入漕。沙停而淤。勢所必

致然黃水消落。漕水隨之而出。沙隨水刷。不待濬而自通。亦勢所必致也。縱有淺阻。不過旬日。萬曆十年中。河郎中陳瑛。創建古洪內華二閘。每遇黃水暴發。即下板以遏濁流之橫。而閘內無壅阻之苦。黃水消落。則啓板以縱泉水之出。而閘外有洗滌之功。數年以來。頗稱利涉。不意去年伏水盛發。啓閉不常。任其所之。淤墊頗遠。而治者不知引水攻沙。鳩工疏濬。以致廢時失事。上廩宸衷。當事之臣。稍加更置。而人心庶幾知警矣。前月十六日。臣至宿遷。閱視河隄。據管河同知徐仰揚稱。本月十三四日。黃水陡長丈餘。漫入古洪閘內。臣即令嚴閉閘板。加高閘面。去後。至二十一日。又據管閘主事楊信報稱。十九日至二十一日。黃水消落。盡啓各閘。諸板通漕放水。衝刷成河。通行無滯等因。至閏六月十一日。又據徐州管河判官鄭簡揭稱。本月初六日。黃水復發。比前又高一尺。急下閘板。日夜固守。至初八日。午時水退。初九日。啓板通行。無滯等因。夫兩旬之間。黃水陡發二次。然前不過七日。後不過三日。隨長隨落。此即清黃二水相爲勝負。隨塞隨通之本來面目也。近又該工科都給事中常居敬題奉欽依。增建口閘一座。去河愈近。則沙淤愈少。所淤既少。則衝刷愈易。足爲漕河之永利矣。但設閘固欲其多。而啓閉猶欲其謹。閘禁不嚴。與無閘同。去歲之覆轍可鑒也。而管閘官牌。每苦於勢豪船隻。強欲啓板放行。少拂其意。輒加噴責。蓋行者赴多。其心本急。而以王程難緩。倍道疾趨者。亦或有之。但漕河關

係甚大。似不可以一人之私。而重妨國家之大計也。臣查得萬曆八年。該臣初立清江浦三閘。啓閉之法。題奉聖旨。這築壩盤壩事宜。俱依擬。有勢豪人等阻撓的。即便拿了問罪。完日於該地方枷號三個月發落。干礙職官。參奏處治。欽此。臣刻石金書。豎立各閘之上。庶幾人心少警。而行未數年。閘禁復弛。內河漸淤。又該工科都給事中常居敬題奉欽依。而臣於入淮之初。即會同漕撫都御史舒應龍。首爲申飭管閘工部主事黃曰謹。查復舊規。呈將三閘匙鑰。送赴漕撫衙門收貯。每日請發。禁例始定。然亦恃有先奉嚴旨。昭若日星。故廢之雖久。而復之不難也。今古洪等閘。並未奉有明旨。非惟人心不知警惕。而司閘者亦無所恃。以爲遵守矣。伏望皇上俯念漕務至重。敕下該部。再加查議。如果臣言可采。比照前例。特降綸音。容臣刻石金書。豎立各閘之上。其閘上匙鑰。凡遇水漲下板之時。俱送赴夏鎮分司官收掌。水落即便請發。庶一應船隻。但知畏忌。而漕渠可免淤塞之患矣。再查萬曆十五年九月。該工科都給事中常居敬等題爲河道可虞。人心易怠。仰體宸衷。敬陳末議。以勵人心。以保河漕事。內一款開報云。當時工部議將河道有無通塞。河工有無興舉。行令管河司屬各官。按季報部。覆奉欽依在卷。臣遵奉備行各管河司道官員。將更河陡長。閘座閉塞日期。逐一登記。通候季終報部。不敢瑣瀆天聽。外。謹題請旨。奉聖旨。工部知道。

## 工部覆前疏

題爲清黃交接處所濁流倒灌易淤。懇乞特降諭音。以嚴開禁事。該總理河道右都御史潘季馴題前事等因。奉聖旨。工部知道。欽此。欽遵。抄部送司。參查萬曆七年七月內。該總理河道右都御史潘季馴題爲乞恩查復舊規。以利漕渠事。內題稱。淮安開壩。每歲於六月初旬。運艘鮮貢馬船過盡。卽於通濟開外暫築土壩。以遏橫流。其官民船隻出入。俱暫行盤壩。至九月初旬開壩。復用開啓閉。仍將題准明旨。刊示各閘之上。如有勢豪人員。恃強阻撓。應拿問者。徑自拿問。應參奏者。徑自參奏。毋得阿徇假借等因。已該本部覆奉聖旨。這築壩盤壩事宜。俱依擬有勢豪人等阻撓的。卽便拿了問罪。完日於該地方枷號三箇月。發落干礙職官。參奏處治。欽此。備行總理河漕及漕運衙門。欽遵。訖。又查得十六年四月內。該查勘管理河工工科都給事中常居敬題爲酌議河道善後事宜。以裨運務。以圖水利事。內開。嚴啓閉。以杜淤淺。乞妥查照。先年平江伯陳瑄原立成規。如山陽通濟等閘。三月初運畢。卽行封鎖。惟遇鮮貢船隻。啓一閉二。官民船隻。照舊車盤等因。已該本部覆奉欽依。通行河道衙門。着實遵行。訖。今該前因。似應題請。案呈到部。看得茶城口係清黃交接之處。而開規之設。所以嚴啓閉之防。故有開無法。與無

開同行法不嚴與無法同。所從來尙矣。先是淮安開壩。奉有明旨。森嚴至今。幸賴無事。今茶城三閘。其緊要與淮安相同。而閘規未立。人有玩心。若不照例申嚴。將來淤阻之患。或有甚於前日者。所據總理河臣題。要照例請旨。刊刻遵守。相應如議。恭候命下本部。備咨總理河道都御史。轉行各該管河官員。將題准明旨。刊石金書。豎立茶城各閘之上。凡遇黃河暴漲。即便閉閘。各閘匙鑰。送夏鎮主事收掌。一應官民船隻。俱候啓閘放行。敢有阻撓。應拿問者。徑自拿問。應參治者。奏請定奪。至於鮮貢船隻。原與尋常官民不同。自難一例守候。但當黃水盛發之時。遽許啓閘以行。則沙隨水擁。急難開通。無論挑濬勞費不貲。而繼至貢船。反致耽延。甚訪得黃河水性驟長。不過二三日。倘少停楫。消落可期。再乞天語。併飭鮮貢諸船。如遇黃水盛發。亦令暫候頃刻。庶法行自近。而河渠永有賴矣。奉聖旨。各閘啓閉嚴約俱依擬。有勢豪人等阻撓的。照淮安開壩事例。即便拿問枷號。于礙職官指名參奏。



河防一覽卷之十

【奏疏】

河工分派司道疏

臣潘季馴謹題爲檢查節奉欽依河工分派司道各官以便責成以圖早竣事臣於本年六月初二日到任隨行各司道查理勘督河工工科都給事中常居敬先後具題河上事宜除申飭禁例查覈賢否等項及議應停寢者已經遵行外其應修應築工程逐一開報前來隨准漕撫戶部右侍郎舒應龍揭帖內一件爲欽奉敕諭查理河漕以保運道事內有添建鎮口閘接築塔山支河縷隄議修清江浦隄外草壩剏築寶應縣西土隄石砌邵伯湖隄疏濬裏河淤淺等事一件爲酌議河道善後事宜以裨運務以圖永利事內有添設柳浦灣料廠一事其在淮揚所應興舉者如此矣續該臣准工部咨爲查理河漕以重國計事內有查復南旺馬踏蜀山馬場四湖建築坎河滾水壩添建迪濟永迪二閘等事又准工部咨爲清復湖地以濟運道事內有查復安山湖地一事其在山東所應興舉者如此矣臣隨自淮揚歷邳徐至山東沿河一帶

地方逐一查閱前項工程。委於運道大有裨益。相應作速興舉。勒限告成。但道里寥遠。工程浩大。而中如修復五湖內皆有復斗門。築長隄。建滾水壩等工。尤爲煩瑣。若非分任責成。或易推諉。除建鎮口閘塔山支河縷隄。修清江河外隄草壩。添設柳浦灘料廠。先該漕撫右侍郎舒應龍。行委南河郎中羅用敬。中河郎中沈修。夏鎮主事楊信。徐州兵備道僉事陳文燧。督同淮安府管河同知徐仲姜。桂芳。徐州銜官鄭簡等。見在興舉。已有次第。臣照舊督行各官。上緊築砌外。其興築寶應縣西土隄二十里。石砌邵伯湖隄二十里。濬疏淮安至儀真一帶裏河淤淺。查係南河郎中羅用敬。海防道副使周夢揚地方。三工俱當以中爲界。北段屬之羅用敬。南段屬之周夢揚。查復馬踏湖。添建樑隄。集永通閘。則委之北河郎中吳之龍。而應築土隄。修復王巖口滾水石壩。俱以屬之該司矣。查復蜀山湖。建築坎河壩。則委之南旺分司主事蕭雍。而築隄東六。修復滾水大壩。俱以屬之該司矣。查復馬場湖。添建火頭灣通濟閘。則屬之濟寧管河道。按察使曹子朝。而封界子隄一道。安居斗門三座。但以屬之該道矣。查復南旺湖地。則委之東甌道左叅政郝維喬。而修復邢通等口一十二處。張住口斗門一座。封界子隄一道。中江長隄一十四里。但以屬之該道矣。查復安山湖。則委之曹濮道僉事劉弘道。而封界子隄。建八里灘似蛇溝二閘。但以屬之該道矣。至於管河同知通判及州縣掌印管河等官。隨其地之所屬。

聽各該司道徑自分委。如有不足。不妨選取別郡賢能者而用之也。至於關提夫匠。查取物料。司道有不免於互相咨藉者。又當通融幫助。以普同心共濟之義。不待臣丁寧告誡之矣。既經分派停當。恭候奉有明旨之後。各官一面鳩工庀材。水落舉事。定限明春三月內完工。以慰聖主南顧之懷。以圖運道永賴之利。毋得失時廢事。致有墮誤。中間斗門隄壩等項瑣屑事宜。或於原議稍有參差。如先遠而今宜稍近。先近而今宜稍遠。先多而今宜稍減。先無而今宜添設。大同而小異者。不妨相度地形。臨時擬議。以憑裁酌。臣同各該撫按及巡鹽御史。不時查閱。工完之日。容臣分別勤惰。疏名上請。恭候聖裁。伏望敕下該部。再加查議。如臣所言不謬。擬議覆請。行臣遵奉施行。庶事體不淆。而責成自易。人心競奮。而告竣可期。奉謹題請旨。奉聖旨。工部知道。

### 工部覆前疏

題爲檢查節奉欽依河工分派司道各官。以便責成。以圖早竣事。該總理河道右都御史潘季馴題前事等因。奉聖旨。工部知道。欽此。欽遵。抄出到部。送司案查。萬曆十六年四月內。該查勘督理河工工部都給事中常屏敬。總督漕運戶部右侍郎舒應龍。各題爲欽奉敕諭。查理河漕。

以保運道事內條議古洪開以外添建鎮口閘座并接築塔山支河縷隄等項本月內又該查勘河工都給事中常居敬題爲酌議河道善後事宜以裨運務以圖永利事內條議申飭開規并添設柳浦灣料廠五月內又該查勘河工都給事中常居敬巡撫山東右副都御史李戴各題爲欽奉敕諭查理漕河以重國計事內條議查復湖地積水濟運并建築坎河滾水壩各緣由俱經本部覆奉欽依備行各該撫按及總理河道等衙門轉行管河司道一體欽遵訖今該前因相應具題案呈到部看將山東至淮揚一帶河道應修應築處所地里寥遠工程浩大提網挈領雖在總理大臣而畫地効勞必須庶司分任所據河道都御史潘季馴題稱將各處工程量其地之遠近險易分委各該司通等官管理區處當而勞逸適均任使宜而責成尤易俱應如議題請恭候命下本部備咨總理河道并鳳陽山東各巡撫衙門一體遵照施行及行管理河道泉源閘壩郎中主事管河守巡各道查照分地督率府州縣管工官員竭力修治本部仍咨都察院轉行各該巡按巡鹽御史各照所轄地方不時稽察工程期于同心共濟倘興工前後或有事體與原議稍異者即便從宜處置或有原議未盡者不妨另行增補悉如原題定限十七年三月終通完其總河大臣仍親自查閱委果工程堅固足保無虞從實奏報於內一有推諉誤事即時參處工完之日將做過工程錢糧夫役等項造冊奏繳清冊送部備查其効

勞大小官員分別勤惰題請以俟賞罰伏候聖明裁定敕下臣等遵奉施行奉聖旨是河道工程着司道等官各照分定地方用心管理上緊完報不許疎玩

### 議留河工米銀疏

臣潘季馴謹題爲查議河工緊急工費以免臨期匱乏事據管理南河工部都水司郎中羅用敬管理中河工部都水司郎中沈修整飭淮揚海防兵備道副使胥遇整飭徐州等處兵備道僉事陳文燧會呈先蒙總督漕運提督軍務巡撫鳳陽等處地方戶部右侍郎兼都察院右僉都御史舒應龍信牌前事照得國家歲漕轉輸必資河運而河防歲修築隄疏濬工費不貲額編錢糧十無二三每每那移曲處至今匱竭已甚誠爲無米之炊夫國家治河濟運事于河南山東直隸三省直地方然山東運河甚安河南有黃河而無運河直隸則自徐至淮五百里以黃河爲運河自淮至揚四百里以重湖爲運河防守要害緩急迥不相同今在山東河南則供以全省之力在直隸則僅取足於四郡積災之民惟於工費不敷歲多修築未堅無怪其歲修歲圯而淤決之患終不免也見蒙聖上軫念河漕大計特遣工科親詣督勘必欲爲河漕久遠永利之策工費錢糧卽爲首務備仰司道會同卽查過淮漕糧三六二六輕齎銀內例復二升

河工米折銀一分。後以通惠河成。改解太倉濟邊。見今九邊款貢餉邊年例。頓減於舊。如以河工之銀。仍充河工之用。本係正徵正支。似爲經久可恃。再查萬歷元年。瓜州閘座建成。南京江北各衛軍船直達水次。省免浙江杭嘉湖直隸蘇松常鎮等府。顧覓江船七升米銀。已經前任總理河道侍郎萬恭議題。量復一升折銀。備修江南河道。其餘六升免徵於民。即今應否於內。再復數升。以充修河之費。逐一會查的確。作速呈詳。以憑酌議施行。蒙此行間。又蒙本院信牌。爲查議河道錢糧事。照得淮揚濱河一帶隄岸。係干運道。喉歲修工程。方殷。需用錢糧甚急。况兼工科都給事中常居敬。題奉欽依。應築邵伯湖石隄一道。計二十里。該銀二萬二千九十七兩。勦築寶應西隄一道。計二十里。該銀四千一百三十一兩。亟宜興舉。應用錢糧。俱合查議。仰司道會行淮安府。即查原議歲修銀三萬兩。自萬曆九年。起至十五年止。某年某處用過若干。尙存若干。有無拖欠。作何催補。各工有無足用。及近議邵伯寶應土石二工。錢糧作何區畫。俱要明白聲說。從長計議。如有別項堪動錢糧。就便酌掇停妥。會呈前來。通詳漕撫衙門。以憑覆覈。曾題等因。蒙此。當該司道會行淮安府。查勘去後。隨據該府回稱。卷查萬歷八年十一月內。蒙本院題奉欽依。歲修銀三萬兩。內該鹽運司帶徵鹽引銀一萬八千兩。河南協濟銀九千兩。淮揚兩鈔關并徐州戶部稅銀三千兩。每年徵解淮庫。專備各工支用。後因十四年鹽滯商

困該司奉文蠲免四千五百兩。三鈔關稅銀期滿，仍解戶部。隨該司道會議，將山東河夫銀四千五百兩，并撥瓜儀盤壩脚米銀，徐屬派剩麥銀，係原議解給徐屬二洪靈璧等處夫銀之數，共二千六百餘兩，抵補前額。呈蒙題奉欽依在卷。近又該山東撫按題准原議河夫銀兩，仍留彼處募夫挑濬。其在河南九十兩，除節年拖欠一萬三千餘兩外，又以去歲衝決異常，該前任總督漕撫侍郎楊一魁具題停免。議將漕糧輕齎三六二六漕米二升河工銀留准支用。該部議覆，止將十六年分數內量留九千兩抵作河南應解之數。以後年分該省照舊徵解淮庫等因。欽遵外，今查自萬曆九年起到十五年止，各處解到銀兩，盈縮不一。節經奉文支盡。除將收支細數另行冊報外，尚有借用未補，應給未支。江都高寶山陽清河等處工銀實該一萬七千九百六十四兩八錢二分零。徐呂洪夫工食額於瓜儀二壩各衛所挑盤脚米銀內扣存一千五百七十八兩。比因去年各處災傷，減存漕船數多，止扣有脚米銀六百一十三兩三錢八釐零。其餘九百六十四兩六錢九分零，尙無扣補。徐屬欠解原派剩麥銀一千五十九兩。即今高寶江都山陽清河一帶喫緊工程，俱因前銀不敷，止領一半。各該有司仰體朝廷運道爲重，東那西借，朝給暮空，終非常策。且伏秋修守之候，臨時支用不常，又不知約用幾何。查得江南雇覓江船米免徵七升，續議復一升，而六升仍蠲在民也。相應於六升之內再復二升。該糧一

萬一千三百七十七石九斗七升六合八勺八抄折銀五千六百八十八兩九錢八分八釐四毫四絲輕齋扣米二升折銀一分近雖解濟邊餉而其始乃修河故物也相應於內歸還河工一升該糧二萬七千五百石折銀一萬三千七百五十兩通共該銀一萬九千四百三十八兩九錢八分八釐四毫四絲與同舊額見該徵解實銀通收淮庫作歲修支用等因呈報前來據此又該司道會同覆覈無異况去年雨水異常今歲工程倍於往昔其所估者過其數於原額之外其所收者減其數於原額之中那借者無從查補見在者何憑支給各工遑遑誠猶捧漏卮沃焦釜莫知其所措者今據該府所議前項江南雇船米一升外再復二升并於輕齋二升米銀內歸復河道一升俱係河工正額錢糧向因邊防告急河道無虞故暫爲借處以濟邊也今胡虜款貢河道多艱原額錢糧委應歸復伏乞早爲題請以濟工程又查得近該工科都給事中常居敬題築邵伯湖石隄二十里該銀二萬二千九十七兩寶應西土隄二十里該銀四千一百三十一兩皆係欽依緊要工程向因所議錢糧原未註有定項迄今尙未興舉乞查別項堪動錢糧一併題請支給應用以便早竣等因會呈到臣據此該臣會同總督漕運提督軍務巡撫鳳陽等處地方戶部右侍郎兼都察院右僉都御史舒應龍議照運道之設專爲歲漕歲漕之遲速係運道之通阻其休戚常相關也若徒求速于歲漕而不先求通于運道徒求通



于運道而不先求務乎歲修。徒求務乎歲修而不先求裕于工費。皆非知務者矣。我國家歲漕四百餘萬。皆由瓜儀入閘。以至惠通河。綿亘三千餘里。山東濟寧州以北。原無衝溢之苦。疏濬歲有常規。額辦足資工料。姑置勿論矣。惟是淮南則多諸湖之險。淮北則有黃河之患。波濤之衝。刷隄岸之坍塌。無歲無之。故歲修之錢糧。亦無歲可缺者。先該臣已于萬曆八年十一月內。會同漕撫衙門。題請河道歲修銀三萬兩。今查數內鹽運司帶徵鹽引銀已蠲四千五百兩。復還戶部三廠稅銀三千兩。尋改山東徐呂靈璧河夫銀。未期而山東撫按復議留彼處挑濬。難以解銀。而徐呂靈璧河夫銀又多缺少。且彼處工程頗多。夫役亦似不可少者。河南歲該解銀九千兩。節年拖欠一萬三千兩。又以去歲衝決異常。十六年議停徵矣。是原題三萬之數。僅存鹽引銀一萬三千五百兩耳。及查該司道所報。今歲歲修銀已費四萬一千四百八十兩有奇。是所出之數。浮於所入之額。已三倍矣。目前似已不支。他日必至債事。誠不可不預爲之計者。又該都給事中常居敬題奉欽依。議築寶應縣西土隄二十里。東水刷沙。俾無膠淺之患。江都縣議砌邵伯隄石工二十里。捍湖衝激。俾無傾潰之虞。皆係喫緊工程。共該工料銀二萬六千二百二十八兩。原未議有動支何項錢糧。見今束手以待。是連前歲修銀三萬兩。并借用未補。應給未支銀一萬七千九百六十四兩八錢二分。共該銀七萬四千一百九十二兩八錢二分。

洗鍋待爨不可時刻緩者而帑如懸磬將何以支所據司道議將輕齋二升米銀歸復河道江南雇船停徵米六升內再復二升一節誠非得已但臣等反覆思惟蘇松常鎮并杭嘉湖等處正當大稔之後民不聊生豈可復行加派隨查得輕齋扣留二升米銀原係河工支用之數萬曆四年該漕撫都御史吳桂芳奏留一年爲挑濬草灣之用萬曆六年該漕撫都御史江一麟奏留二年爲補造缺船之用臣等今日河工較之前項支費尤爲緊要伏望皇上俯念運道至重敕下該部准將輕齋二升米銀聽留河工支用三年之後修築少閑仍以一升米銀解赴戶部餉邊餘米一升准作河上歲修銀兩庶幾歲修不廢新工可興而河道安流歲漕無阻矣臣等復又查得前項銀兩業已盡數解部必須守候明年新運方可徵解相去尙遠難救燃眉合無恭候命下容臣等先於漕庫或淮安府庫借支別項銀兩應用俟輕齋米銀解到之日照數補還則工可刻期而告竣自早矣謹題請旨奉聖旨該部知道

戶部覆前疏

題爲查議河工緊急工費以免臨期匱乏事該總理河道右都御史潘李馴漕運都御史舒應龍各題同前事俱奉聖旨該部知道欽此欽遵通抄到部送司案呈到部看得河道都御史潘

季馴漕運御史舒應龍冒題近該都給事中常居敬題奉欽依築砌寶應土隄邵伯石隄共該工料銀二萬六千二百二十八兩未議動支何項錢糧要將輕齎二升米銀留用三年之後仍以一升米銀解部餉邊一升米銀准作河上歲修應用一節臣等查得輕齎二升米銀原備修河之費嗣因通惠河成改議解部濟邊今總理督臣潘季馴等議留築砌寶應邵伯湖隄是以正項留充正用况係緊要工程相應依擬覆請恭候命下本部移咨河道都御史潘季馴漕運都御史舒應龍查將淮庫別項銀兩先借支二萬六千二百二十八兩趁此秋冬水涸作速興工築砌俟新運輕齎二升米銀解到不必拘定年限照數補完餘銀仍行解部濟邊以後凡遇有應修工程不妨照數再行奏留如無工程即以濟邊隨時通融不必各分其半以致臨時支用不敷又煩瀆請本部仍咨工部知會伏乞聖裁奉聖旨是

### 申明修守事宜疏

臣潘季馴謹題爲申明修守事宜以圖永賴事伏念臣負譴餘生甘心草莽謬蒙我皇上曲垂矜貸復賜甄收高厚洪恩實均罔極受事四月夙夜靡寧且當修防已弛之後復值河水暴漲之時東支西吾旣竭心力諏諮荒度益信歲修之工不可緩也敬陳繡縷恭候聖明裁察臣竊

淮治河之法別無奇謀秘計全在束水歸漕歸漕非他即先賢孟軻所謂水由地中行而宋臣朱熹釋之曰地中兩岸間也束水之法亦無奇謀秘計惟在堅築隄防隄防非他即禹貢所謂九澤既陂四海會同而先儒蔡沈釋之曰陂障也九州之澤已有陂障而無決潰四海之水無不會同而各有所歸也故隄固則水不泛濫而自然歸漕歸漕則水不上溢而自然下刷沙之所以滌渠之所以深河之所以導而入海皆相因而至矣然則固隄非防河之第一義乎而歲修之工舍固隄其何以乎臣於萬曆六年三月內祇承明命總理河漕急趨淮徐視之黃決崔鎮而北淮決高堰而東而淮揚高寶之水峯洞無涯漚爲巨浸觀御史陳堂疏中所謂東橫西決散爲洪流自徐邳以下至淮之南北不啻千里流離漂沒莫可勝數居無尺椽食無半穗上阻運道下墊民生而比時兩河情狀蓋可想矣臣即首擬合淮黃二流以復其本來之性築遙縷二隄以防其潰決之虞具疏上請謬荷溫綸刻期興工十月告竣年逾八載並無隻艦漂流粒米狼籍而昔日流遺之民仰戴我皇上生成之恩咸歸故土比屋而居矣不意爲日既久人情遂弛掌印管河官視兩隄爲贅旒矣歲剝月蝕殘缺頗多臣於六月初二日受事即申飭各該司道嚴督掌印管河等官分投幫築晝夜修防寢食不寧者逾三月矣然立法易而守法難守法於一時易而守法於長久難臣於萬曆七年告竣之後將善後事宜種種陳請而臺省諸

臣亦相繼題奉俞命矣。而近年以來。行者無幾。失今不爲申飭。數年之後。又當何如哉。故敢以修守事宜。摘其喫緊最關河防者。條列于後。伏望敕下該部。再加詳議。如果臣言有裨。俯賜允行。特降嚴旨。容臣刪削。簡明榜諭。分發司道。并各該掌印管河官。置之座右。庶幾常加省闕。按時修舉。而可免疎玩之虞矣。謹題請旨。

計開

一久任部臣。以精練習。臣竊謂天下之事。皆可以揣摩測度而得之。而惟治河一事。非身親經歷。足遍而目擊之。則文移調度之間。終屬影響。故以大禹之智。必十有三年而後成功。蓋其諏諮荒度。非假以歲月之久。不得也。何也。水性有順逆。河情有分合。地勢有夷險。隄形有高卑。某處迎溜。作何捲築。以當其衝。某處掃灣。作何幫護。以防其汕。至於分派官夫。皆有定額。置辦器具。各有攸宜。儲蓄物料。栽插柳株。一切瑣屑事宜。種種皆須料理。總理衙門。眇然一身。控制于數千里之間。豈能一一身親爲之哉。所恃者分司與該道而已。而該道不免有錢穀刑獄兵戎之事。撫按倚辦甚殷。豈能專心河務。故總河之所恃以幹濟者。分司官爲多也。但部臣初至地方。未知原經首尾。歲月稍久。頭緒頗知。而轉擢之報。又至矣。臣於萬曆八年。且疏題請久任。奉有成命。而數年之間。卒未有能行之者。又何怪乎河工之作輟也。伏望

敕下該部。卽加查議。如遇中南兩河郎中員缺。卽於工部主事。查有曾經分司河上及歷俸未及三年者。遴選推補。查照舊規。新舊交代。以河上事體。轉相傳告。代後克脩職業。任內並無疎虞。容其歷俸九年。方爲破格遷擢。則練習久而河防自熟。區畫當而河患可弭矣。臣又查得見任南河郎中羅用敬。中河郎中沈修才。識敏練。勤恪自將。臣受事以來。歷試諸艱。輒有成驗。但俸資俱有六年。轉擢之期將至。伏望比照原任中河郎中陳瑛事例。俟其九年考滿。方與優處。實於河道大有裨益。伏乞聖裁。

一責成長令。以一事權。夫州之有守。縣之有令。卽家之有長也。家務繁瑣。不得不分任於子弟。或司耕作。或司出納。或司交際。雖各有其人。而鳩工庀材。備物致用。未有不取裁于家長。而能成者。臣嘗以責成掌印官爲誦。而勘工給事中尹瑾兼管河道御史姜璧。皆先後具題。奉有明旨矣。官吏更換。若罔聞知。臣頃於閱視之時。見河水將發。急若燃眉。問其物料。則曰某所官承買未至也。問其夫則曰某處調用未補也。問其時日。非一月卽兩月也。問之掌印官。則曰不知也。如此而窳有不墮誤者哉。臣伏願自今伊始。調度夫役。備辦物料。則責之掌印官。趨事赴工。董率巡守。則責之管河官。如有疎虞。掌印與管河官同罪。至於郡之有守。關係尤重。瑣屑之事。固難責成。而提綱挈領。區畫督察。得守令有所受成者。郡守之責矣。伏乞

聖裁。

一禁調官夫以期專工。臣惟治河有定議，而防河無止工。工之不可止者，乃所以成其議之一定而不可撓也。何也？治河之道，惟有揀偏補弊之法，必無一勞永逸之事也。不然則禹之治水，可稱萬世永賴矣。何不數百年，至商之祖乙，而都圯於河，蕩柘離居，遂有盤庚之遷也。蓋禹法不守，而河防久弛也。故管河之官，必以河爲責，而他務俱所未遑。防河之夫，必以河爲事，而諸工有所不逮。朝于斯，暮于斯，飲食起居必于斯，功以久積，業以專成。如此而猶有傾圯頽敗之患者，臣所未解也。近該工科都給事中常居敬，將管河官查照清江造船廠官事例，凡係管河官專屬河道部司，年終攷覈，分別賢否，徑呈督撫咨部施行，不許別謀差委。題奉聖旨：近年管河佐貳等官，多有營求差委，妨廢職務，不行用心防守的。總理衙門務遵敕諭，拏問重治，不許姑息。其餘依擬行。欽此。人心或知警畏，而於夫役一節，未經申明。臣請自今伊始，凡遇差委管河大小官員，及調用各項夫役，必須中呈總理衙門批允，方許委調。如有抗違，容臣指名參究。庶幾人無廢事，而工可責成矣。伏乞聖裁。

一預定工料，以使工作。志有之，防河如防虜。虜至而後爲治兵繕甲之計，則必爲虜所乘。河漲而後爲鳩工聚材之計，則必爲河所乘。此一定之理也。臣請于秋防告竣之後，至十月中

旬各該司道即便會行各掌印管河官沿隄踏勘分爲三等以逼臨河濱當衝最急者爲第一等或改築或加幫或添築馬頭埽應委何官管理用夫若干應辦何項物料若干用銀若干次險者爲第二等又次者爲第三等官夫物料遞加減殺造冊開報司道覆核停當定限十一月初旬類報總理衙門批允查照分撥應辦物料即行各掌印官支領歲修銀兩如數買辦定限正月半以前報完隨即興工定限四月初旬告竣每歲著爲成規違誤定行參治庶事以冀立功以早成而無臨渴掘井之患矣伏乞聖裁

一立法增築以固隄防臣竊惟天下之事不日益則日損而夫人之情不日檢則日弛故自古帝王立法歲有成月有要日有攷未有不如此而能成久安長治之業者也淮徐之民十年以來所以得免魚鱉之患而運道不致梗阻者恃有遙隄也先該給事中尹瑾慮恐歲久坍塌題請每歲行令管河官率領守隄官夫務將各遙隄定限加高五寸加厚五寸年終司道官躬親覈驗開報河漕衙門造冊奏聞每三年遣官一員前去閱視分別敘錄參究等因工部覆奉聖旨隄工歲修當視其低薄處隨宜加築豈得定以五寸爲限河漕當事諸臣能嚴督地方官着實經理視國如家何事不成亦不必數數差官閱視反滋多事其餘依擬行欽此仰見我皇上體念河臣欲其事權歸一且便責成也三年差官閱視委爲煩瑣不敢瀆



陳矣。至於加幫一節。回凶漫無稽攷。未嘗有分寸帮補。雨水之霖澇。車馬之蹂躪。如蹄仁象。山磨臍溝等處。剝蝕過半矣。臣伏觀大明會典。內開各處河隄。每歲加高一尺。加厚一尺。年終管河官具數奏聞。是祖宗成法。炳若日星。大小河臣所宜世世守之者也。但河夫屢經裁減。爲數不多。欲其加幫高厚各一尺。力有未逮。臣又查得隄身兩傍。率多蔓草盤結。足堪遮護。若欲加土。必須去草。反爲不美。臣見行司道官將各隄坍塌卑薄者。以原隄丈尺爲準。先行加幫取平。至明年或可竣事。臣請自十八年爲始。每歲司道官督令管河官率領夫役。務覓真淤老土。加高五寸。不許夾雜浮沙。苟且塞責。再查護隄之法。無如栽柳爲最。而栽柳六法。無如臥柳爲佳。蓋取其枝從根起。扶蘇茂密。足抵狂瀾也。每隄一丈。栽柳十二株。每夫一名。栽隄三丈。柳椿以徑二寸爲則。離隄以三尺爲準。隄內栽完。方及隄外。如有枯死。隨時補種。年終管河官呈報各該司道。要見本隄原高若干。今加五寸。共高若干。栽過柳株若干。司道官躬親驗覈。開報總理衙門覆覈無異。造冊奏聞。其不合數及不如式者。指名參究。庶幾事有成規。而人知法守矣。伏乞聖裁。

一添設隄官。以免遙制。臣竊惟富官之事。兼攝爲難。而以最卑之官。攝最遠之事。爲尤難。臣於萬曆七年。建復高堰之隄。以捍橫流。於淮郡之東。剏築柳浦灣之隄。以遏狂瀾。於淮郡之

北十餘年間利賴於二隄者良不淺矣。弟因比時冗員之禁方嚴，不敢多求添設，故止請高堰大使一員兼攝柳浦灣一帶隄務。但查高堰之隄增築已幾百里，而柳浦灣之隄起自清江浦以至高嶺，戴百戶營延袤一百三十餘里。伏秋之時，顧此失彼，一大使豈能日奔走於二百里之間耶？縱委義民等官，不過虛應故事，豈肯在隄防守。前歲范家口之決，實由此也。臣請添設柳浦灣大使一員，住劄本隄要害去處，自清江浦起至戴百戶營一帶遙隄，付之管理。應用夫役，即於高堰八百名數內，哀出三百，再於南河隄淺夫內，哀出二百，共夫五百與之。其高堰大使專管本隄，各令晝夜巡邏，遇油即補，庶地有專轄，而功可責成矣。臣行司道會議，通詳未報，乞敕工部轉咨漕撫都御史及咨都察院轉行巡按巡鹽御史，再加查議。如果相應添設，覆請施行，不勝幸甚。伏乞聖裁。

一加幫真土，以保護隄。臣查得淮水發自河南桐柏山，挾七十二溪之水，經鳳泗東入于海。然至泗州而龜山橫截河中，即基運山圖中所云灣如牛角，勢樣非凡者是也。下沙一轉，迴瀾西顧，此於風氣實爲完美。然伏秋之時，不免湧漲，亦由此也。臣讀宋臣歐陽修先春亭記，其略有云：景佑三年，泗守張侯問民之所素病，而治其尤暴者，曰：暴莫大于淮。明年春作城之外隄，因其舊而廣之，高三十三尺，土實石堅，捍暴備災，可久而不壞。又云：泗天下之水會

也。又云。先時歲大水。州幾溺。張侯夏守是州。築隄以禦之。今所謂因其舊者是也。夫曰。尤暴者莫大于淮。則知淮之爲暴於泗舊矣。曰隄高三十三尺。則知水之高矣。先後州守惟以築隄爲事。則知禦淮之策舍隄之外無策矣。今查泗州護城隄高不及宋三之一。然幸當水一面。甃石可恃。但石內土隄。皆係浮沙。一遇霖雨。輒至坍塌。土隄一圯。石將安附。不可不慮也。臣於六月間。躬往閱視。即行潁州兵備道及該州知州浦朝柱。令其覓取真土。另加堅築。第本隄丈數頗多。工費不少。錢糧難處。延久未報。臣請敕下工部。咨行撫按衙門。多方計處。覆請施行。庶護隄可恃。而州民獲安矣。再查基連山去州一十餘里。地勢高峻。嘉靖十四年間。該先任總理河道都御史劉天和。令匠役王良等量得地形。迥高二丈三尺一寸。則又與州不同。東麓石隄。見在查修。臣故未及之也。伏乞聖裁。

一接築舊隄以防淤淺。臣竊惟清口乃黃淮交會之所。運道必經之處。稍有淺阻。便非利涉。但欲其通利。須令全淮之水盡由此出。則力能敵黃。不爲沙墊。往歲高堰潰決。淮從東行。清口遂爲平陸。高堰旣築。獨慮清河縣對岸王家口等處。淮水從此決出。則清口之力微矣。臣於萬曆八年行郎中余毅中。即於本處築隄一道。以防其溢。數年之間。清口利涉。實賴于此。不意鳳泗商販船隻。又於本隄之東。盜挖一渠。取便往來。歲久成河。已濶九十餘丈。淮水盡

由此出清口不免沙淤。臣查得此處係清河對面地方。該縣知縣出入之間。一覽在目。何致任其盜決。汪洋北注。而若罔聞。知且不以報也。其秦越肥瘠亦甚矣。除臣見在查理及行司道官。候淮水消落。接築長隄一道。務期堅久可恃外。臣請隄成之後。專責清河縣知縣管理。每歲派定官夫。時加幫補。如遇水發。率同地方人等晝夜巡邏。以防盜決。儻有疎虞。即將掌印官參治。蓋此隄即在縣治之前。較之他所不同。而掌印官常川在縣。較之管河官尙有他處奔走者又不同也。伏乞聖裁。奉聖旨。工部知道。

### 工部覆前疏

題爲申明修守事宜。以圖永賴事。該總理河道右都御史潘季馴題前事等因。奉聖旨。工部知道。欽此。欽遵。抄出到部。送司案查。萬曆七年七月內。該巡按直隸監察御史姜璧題爲河工將竣。敷陳未議。懇乞聖明俯賜采擇。以保治安事。內條議嚴責成等四事。要將河工專責府州縣掌印官督同管河官管理等因。八年四月內。該工科右給事中尹瑾題爲河工告成。敷陳善後事宜。以圖永利事。內條議重久任等七事緣由。俱經本部覆奉欽依。備行總理河漕及山東河南各撫按衙門欽遵。今該前因。似應具題。案呈到部。看得黃河自古號稱難治。我國家又以

黃河爲運道。其治之更有難者。萬曆六年黃決崔鎮。淮決高堰。運道阻絕。上廛宵旰之憂。該河臣潘季馴創築遙縷二隄。合黃淮二流。遂使八年之間。轉漕數千萬石。隻艦粒米。悉達京師。功成之日。詳陳善後事宜。其要歸于修隄束水。使之歸漕。其法甚備。乃日久人玩。迄于去年。黃河再溢。幾至不支。則隄漸圯。而歲修之法漸廢也。季馴荷蒙召用。再履茲任。乃舉舊法而重新之。又擇其中喫緊最關河防者。列爲八款。疏請嚴旨。特加申飭。蓋思保前功于不毀。杜後患于將來。不圖旦夕苟且之安。而爲國家久遠之計。通應依擬。恭候命下本部。移咨吏部及總理河道鳳陽山東河南保定各巡撫衙門。并咨都察院轉行各該巡按巡鹽巡漕御史。仍劄各管河管泉郎中主事督行各該司道府州縣一體遵行。仍聽總河衙門將題准事理。刊刻簡明榜諭。分發各該官員。置之座右。常加省閱。按時修舉。庶法守常存。而河防永賴也。

### 計開

一久任部臣以精練習。前件看得河工最巨。治河最難。其司道各官。非久于其任。精于其業。鮮克有成者。今河臣潘季馴。灼知其故。申議久任之法。特以中南兩河郎中爲請。而又舉見任郎中羅用敬。沈修賢。能令歷任九年。方行優擢。蓋兩河之地甚要。則倚辦甚殷。且見任郎中既稱得人。是誠不可數易者。合無悉如所議。今後二河郎中員缺。敕下吏部。即于工部

主事。杳有曾經分司河上。及歷俸稍淺者。遴選推補。俟後杳果職業克修。容令歷俸九年。方爲破格遷擢。其南河郎中羅用敬。中河郎中沈修。俸資已及六年。相應比照陳瑛事例。俟其九年考滿。方與優處。如有異績。即于京堂缺內推用。蓋必有超遷。然後可以行久任。此又法之相須者也。伏候聖裁。

一責成長令以一事權 前件看得萬曆八年。該總河潘季馴與科道諸臣。先後具題將河防事宜責成州縣守令。已經奉有明旨。乃數年以來。亦未見舉行。則以積習久而賞罰不信也。不知趨事赴工。雖管河佐貳之責。而催辦調度。則州縣守令之事。奇責佐貳。而緩于守令。宜事功之不集也。今總河潘季馴申明前議。要將守令與佐貳。凡有河道疎虞。一體治罪。而終復歸重于郡守。深得提綱挈領之意。相應依擬。凡河上工程不起。則坐佐貳。錢糧夫役不備。則坐守令。至于郡守有總理一郡之責。倘河道疎虞。亦當權其失事之重輕。察其平日治河之勤惰。而殿最行焉。則賞罰必信。上下相維。而人知激勸矣。伏候聖裁。

一禁調官夫以期專工 前件看得防河如防虜。沿邊將士。不得擅離信地。沿河官夫。豈容擅調別差。止緣管河各官。避難趨易。營求差委。以致河工作輟。先該科臣常居敬議題。奉有嚴旨。洞燭其弊。人心已知警惕矣。惟夫役一節。未經申明。往往有見其空閑。調撥別用者。不

思河之塞決靡常。夫之差遣無定。萬一誤事。所損更多。今後合照河臣所議。凡河上官員夫役。非經申呈總理衙門批允。不得輕委一官。妄調一夫。以致疎虞。違者參奏處治。伏候聖裁。

一 預定工料以便工作。前件看得治水之法。全在治隄。治隄之法。全在歲修。若物料不備。是無米而炊粥也。若修防不豫。是臨渴而掘井也。大約黃河泛漲。常在伏秋。然至伏秋而始爲修防之計。即無及矣。今議欲于秋防竣後。至十月中旬。即委司道督同各掌印管河官沿河踏勘。分別三等。而物料夫匠亦以次減殺。其動支錢糧。選委員役。通限十一月內計議停當。類報總河衙門批允。正月內辦完物料。隨即興工。四月初工程告竣。每年著爲定規。後期者參處。深得先事預防之意。相應依擬舉行。仍令將每年踏看計料與興工月日。備咨本部查考。伏候聖裁。

一 立法增築以固隄防。前件看得淮徐之間。河流咫尺。而其民免于昏墊者。以遙隄一綫爲之捍隔耳。自有隄以來。年復一年。風雨剝蝕。車馬蹂躪。日就卑薄。勢所必至者。先該給事中尹瑾題請加築高厚各五寸。節奉聖旨。隄工歲修。當視其低薄處。隨宜加築。豈得定以五寸爲限。欽此。臣竊思之。限以尺寸者。每年修守之常。不限以尺寸者。一時補偏之法。若低薄而止加五寸。則必無成功。若歲修而亦欲隨宜。又漫無稽考。二者原當並行。而不可偏廢。今

該河臣潘季馴復爲題請。合無查照所議。自十八年爲始。每歲修隄高厚。俱以五寸爲限。遇有低薄處所。即便隨宜加築。務令與老隄相等。不許夾雜浮沙。苟且塞責。年終各司道將修築過隄岸。親行查覈尺寸。類報總河衙門。覆覈造冊。奏聞。有不如式者。指名參究。至于栽柳護隄之法。纖悉曲當。俱應如擬。伏候聖裁。

一添設隄官。以免遙制。前件看得高堰柳浦灣二隄。綿亘二百餘里。止以一大使往來兼攝。勢卑地遠。顧此失彼。恐致疎虞。今議要將原設大使。專管高堰。而柳浦灣一帶。自清江浦起。至戴百戶營止。另設大使一員。專管應用夫役。即于高堰八百名數內。裒出三百名。及南河隄淺失內。裒出二百名。共出五百名。與之晝夜防守。遇汕即補。河臣之議已當。似應免行彼處撫按覆查。移咨吏部。徑自添設。庶官有專責。而隄防可固。伏候聖裁。

一加幫真土。以保護隄。前件看得泗州雖爲水會。而基運山崑峙其北。地形高峻。風氣完美。且東麓石隄。見在查修。似尙可無水患。惟是州城卑窪。僅有石隄一帶。捍禦暴淮。而隄內多係浮沙。雨水淋漓。輒至坍塌。土隄一圯。石將安附。可不爲之寒心邪。河臣潘季馴躬親閱視。題議幫築真土。以固石隄。委宜亟舉。但其一應錢糧夫役。與夫派委官員等項。俱未有成議。且前項工程。尤於保障地方爲切。合無咨行淮揚撫按。會同總河衙門。作速計處停當。具



題前來以憑覆請施行伏候聖裁。

一接築舊隄以防淤淺。前件看得清口乃淮黃交會而淮黃原自不敵然清口所以不至壅淤者以全淮皆從此出其勢足以敵黃也若分之則必致壅淤先年淮決高堰而清口遂成平陸可鑒矣今王家口隄被商販盜決淮流之勢已分將來清口沙淤運道阻塞患必由之此隄在清河縣對岸而該縣任其盜決罪將誰諉今議欲行司道官候淮水消落接築長隄隄成之後專責清河知縣管理無事派夫修築有事責令看守稍有疎虞即行參治庶幾責任既專而隄防可固相應依擬伏候聖裁奉聖旨河道每歲修防先年題有定規乃各該官員不行着實遵守曠職誤事這所議俱依擬行如有仍前怠玩的總河官指名參奏重治

### 議守輔郡長隄疏

臣潘季馴謹題爲議守輔郡長隄以防水患以保民生事。臣竊惟大名府爲輔郡要地關係匪輕去歲黃河決入長垣東明地方淹沒田廬漂溺人畜上廬宸衷特差工科都給事中常居敬會同撫按諸臣培築先年長隄一道兩縣之民方有更生之樂臣受事之後即行大名兵備兼管河道副使侯堯封備查水決緣由及自後修防事宜去後隨據回稱大名府所屬開州清豐

南樂滑縣並無河道。元城大名魏縣內黃濬縣境內止有漳衛二河。如遇淤淺。隨即挑濬。並未設有管河官員。去歲黃河泛漲。從荊隆口衝決大社隄。淪沒長東二縣。近蒙題加該府通判李敷榮長垣縣縣丞張九二東明縣縣丞徐衍兼管河防。原無設有人夫。如遇雨水淋衝。即撥鄰近火夫修補。歲修錢糧止行每年額徵蒿草銀三百三十六兩一錢九分三釐。並無別項銀兩。及將善後事宜開報到臣。臣以未經目擊。不敢妄議。隨於九月初七日起程前往長東二縣踏勘。行至板廠地方。有長隄一道。即係工科都給事中常居敬與同撫按諸臣去歲所督築者也。東至山東曹縣白茅集。西至河南封邱縣新豐村。共長一百三十里。隄外卽有淘北河一道。相傳卽黃河故道也。去歲之水。委由荊隆口決入挾淘北河。衝決本隄之大社口。致有昏墊之患。荊隆口雖決。而本隄堅固。則亦豈至兩邑之沮洳哉。是荊隆口隄實爲此隄之藩籬。而此隄實長東二邑之民所恃以爲命者也。但荊隆口隄係河南開封府所屬二邑。豈能兼制。所可守者。惟此長隄耳。然守隄之法。不外于官夫之專設。物料之預備。而今皆無之。是與無隄同矣。謹將該道所議善後事宜。逐一斟酌。列欸上請。伏望敕下該部。再加查議。如果臣言可採。覆請施行。庶隄防可固。而水患可弭矣。謹題請旨。

一議管河官駐劄以便修防。臣查得大名府原有管河通判一員。駐劄本隄之杜勝集。後因河道安流。革去管河通判。而以本隄俱屬長垣縣管理。業已視此隄爲贅旒矣。今議巡捕通判兼管河防。亦無不可。但該府去隄幾三百里。伏秋之時。呼吸變態。本官豈能遙制。臣請每歲自五月初一日起。至九月盡止。本官仍宜移駐杜勝集。本集原設有管河衙門。行今長東二縣再加修葺。以便棲止。督同兩縣掌印管河等官。往來巡視。晝夜隄防。其本隄原有大岡杜勝各巡檢司。亦聽本官分委哨瞭。庶防守有人。而災沴可免矣。伏乞聖裁。

一議夫役。以便工作。臣惟守隄之有夫。即守城之有兵。兵以禦寇。夫以禦河。必不可缺者也。長隄雖築。未經設有一夫。則平時之修葺。臨事之隄防。誰與爲役。且夏秋正當農忙之時。起倩鄉夫。怨咨必起。甚非長民之道。而有夫則有舖。蓋以便棲息也。查得長垣縣該隄九十七里。每五里建舖一座。該舖一十九座。每舖設舖老一名。夫九名。共應設夫老一百九十名。東明縣該隄三十三里。該舖七座。應設夫老共七十名。平時則竟取老土。加幫高厚。水至則捲築埽料。隄防汕刷。初春之時。則栽插臥柳。以護隄址。庶工多事集。而衝決可免矣。伏乞聖裁。一議處錢糧。以備工料。臣查得瀕河郡縣。俱有河道錢糧。而大名府獨無者。以久無河患。不復議處也。至如去歲河水突入。茫無所措。不免空帑藏而爲之。甚非計之得者。今查兩縣共

該建舖二十六座。每座工料銀五兩二錢。共該銀一百三十餘兩。此非每歲額銀。議於長東二縣自理紙贖銀內支建。不必別議外。其夫老二百六十名。每名該給工食銀六兩。共該銀一千五百六十兩。每年稍草繩麻等項。約費銀二百兩。通共該銀一千七百六十兩。內除每歲徵收蒿草銀三百三十六兩。尙欠銀一千四百二十四兩。行據通判李敷榮長東二縣知縣周嗣哲朱誥議稱。並無別項錢糧。合於兩縣徵收本府夏秋存糧銀內動給。其物料銀兩。有事年分。方准銷算。如此則工費有備。而修防克濟矣。伏乞聖裁。

一查復舊規。以便分任。臣惟分土分民。各有專責。長隄乃長東二縣分管之地。後因革去管河通判。遂將本隄盡屬長垣。一常有事之時。在長垣則民非所轄。難於呼集。在東明則隄非所轄。難於調度。事之掣肘。莫有甚于此者。臣請查復舊規。照地分管。屬長垣者以修守責之。長垣屬東明者以修守責之。東明無事均享其逸。有事各任其勞。庶事無推諉。而工可責成矣。伏乞聖裁。

一分別妍媸。以便委任。臣竊惟治河之官。全在得人。苟非其人。立至傾圮。臣於閱視之時。將該府縣管河官備加諮訪。及面與權議河上事體。看得通判李敷榮年力既當壯猷之時。才識亦爲敏達之質。長垣縣縣丞張九二。河上事體俱能通曉。且隄上工程。皆係兩官首尾。合

無行令久任俸滿之日加銜管事六年通考任內果無河患破格超擢其東明縣縣丞徐衍性雖醇實齒實衰頽問其隄工東西莫辨但任淺無過似應送部調用員缺乞行撫按衙門即於所轄州縣佐貳官內擇其廉能年壯者或陞或調就近銓補促令到任管事以爲來歲修防之計庶分理得人而河防允賴矣伏乞聖裁奉聖旨工部知道

### 工部覆前疏

題爲議守輔郡長隄以防水患以保民生事該總理河道右都御史潘季馴題前事奉聖旨工部知道欽此欽遵抄出到部送司案查萬曆十五年十月內該巡撫保定右僉都御史張西銘題爲查築河防并議專任責成以永奠民居事內題議築大社集隄并將大名府巡捕通判及長垣等縣佐貳加添兼管分管河防各緣由本年十二月內又該查勘督理河工工科都給事中常居敬題爲查議河防以圖永利事內題議修築長垣等縣大社等集隄岸決口深潭緣由俱經本部覆奉欽依備行保定撫按轉行管河河道各官一體欽遵訖今該前因隨將議動大名府夏秋存留銀兩移咨戶部依議前來似應具題案呈到部看得大名府爲畿輔重地其屬縣長垣東明境內原有長隄一道捍禦黃河則兩縣之民所恃以爲命而亦張秋運道所倚以

爲固者也。去年河決大社口，滄沒遠近，爲居民運道之虞。上廬宸衷，特遣工科都給事中常居敬會同撫按諸臣修築前隄。民困始蘇，然隄之既壞，修築爲先。隄之已完，防守爲要。若官夫不設，物料不備，雖有隄防，何能永固。所據總理河臣潘季馴將善後事宜，列欸上請。區畫曲當，深于河防有裨。內除分別妍媸，以便委任。一欸移咨吏部議覆外，其議管河官駐劄以便修防等四事，係隸本部職掌，相應依擬覆請。恭候

命下本部備咨戶部總理河道保定巡撫衙門及咨都察院轉行直隸巡按御史督行大名道府縣官員一體遵奉施行。

計開

一議管河官駐劄以便修防。前件看得大名府管河通判駐劄府城，距隄幾三百里。黃河衝決，呼吸變態，豈三百里之外所能遙制。今議每歲自五月初一日起，至九月終止。本官移駐杜勝集，督率東長兩縣掌印管河官及大岡杜勝二巡檢司，晝夜巡守。其駐劄處所，即將原設衙門修葺，尤爲省便。相應依議伏候聖裁。

一議夫役以便工作。前件看得禦河必以隄守，隄必以夫。此事勢相須，不可缺一者。大名久無河患，雖有故隄基址，並未設有一夫。及至伏秋水發，輒起鄉夫修守，甚屬未便。今議長

東兩縣各照地里遠近。設夫以守隄。設舖以處夫。至若培土于平時。捲埽于水至。栽柳于初春。所以用夫之法。尤爲纖悉曲當。相應依議。伏候聖裁。

一議處錢糧以備工料。前件看得舖舍夫老。旣已議設。隄守固有備矣。然修舖舍則費工料。設夫老則費工食。而稍草繩麻。皆應用物料不可缺者。今議舖舍二十六座。聽長東二縣自理。贖銀支建。其夫老工食及稍草等項物料共該銀一千七百六十兩。除每年蒿草銀三百三十六兩。尙欠一千四百二十四兩。于本府夏秋存糧銀內動支。前項物料銀兩。無事徵收貯庫。有事方准支銷。庶工費旣備。而出納亦明矣。相應依議。伏候聖裁。

一查復舊規。以便分任。前件看得長隄在長垣縣界九十七里。在東明縣界三十三里。舊規原係分轄。後因裁革管河通判。遂將本隄盡屬長垣。地分不明。易得推諉。今議查復舊規。照地分管。庶修守各有專責。而臨事不致推調。相應依議。伏候聖裁。奉聖旨。依議。着實行。

### 吏部覆前疏

題爲議守輔郡長隄以防水患。以保民生事。准工部咨。該總理河道右都御史潘季馴題前事。奉聖旨。工部知道。欽此。欽遵。咨部送司。案呈到部。看得總理河道右都御史潘季馴條議。欲將

大名府通判李敷榮長垣縣縣丞張九二俱令久任。及議將東明縣縣丞徐衍送部調用員缺。即於所轄州縣佐貳官內就近銓補各一節。除通判李敷榮縣丞張九二行令文選司停其陞轉。准留在任管理河工。俟其久任。果有成效。容臣等另行優叙外。爲照河工重大。必須委任大小官員。皆得其人。方能濟事。所據東明縣管河縣丞徐衍。雖係新任。但既稱尋常。豈足幹辦。查有真定府棗強縣縣丞鈕鎰。各院道所註致語。有強健精敏之稱。必稱管河之任。可以更調。既經河道都御史具題前來。相應酌議覆請。恭候命下。將鈕鎰改調東明縣。徐衍改調棗強縣。各縣丞本部各給文憑。令其到任管事。仍咨總理河道及撫按衙門各遵照施行。奉聖旨是。

恭誦綸音疏

臣潘季馴謹題。爲恭誦綸音。不勝感奮。敬陳治河鄙見。伏候宸斷事。伏念臣自嘉靖四十四年。至今。謬承總河之命者四矣。向來治河之法。惟是率由舊章。非兩河之故道不敢尋。非已試之成規不敢蹈。每自恨其智識凡近。器局拘攣。無能炫奇更新。以報涓埃之萬一也。茲沐我皇上非常之恩。尤當有非常之報。故自入境以來。延袤千餘里內。周諮荒度。足遍而目及之矣。而卒無可以他圖者。然猶謂河南爲黃河上流。或可別求長計。頃於九月初七日。躬率管河道副使。



陳九初開封府知府王見賓同知吳克勤歸德府知府陳禎通判陳思論及各該州縣掌印管河等官北自攷城以至武陟南自滎澤以至虞城又自河南至大名府所屬長東二縣將黃沁二河延隄踏勘大禹所治故道歲久湮沒已不可考有云自荊隆口經廣大二府地方出北海者臣謂縱使可復無論移河南徐淮之患於北直隸諸府而二洪乾涸運艘難浮不可也或云復賈魯河自滎澤而達渦河者無論二洪乾涸運艘難浮而鳳泗祖陵重地一淮尙且不支况益之以黃乎不可也或云分沁河合漳衛二水出臨清可殺水勢者沁河之濁不減黃河小灘見苦滲澀增此一河必至淤塞不可也檢括故牒諮詢父老始信治河之法惟有修防必難穿鑿方擬備陳餽縷恭候聖裁頃於十月初五日准吏工二部咨奉聖旨朕聞黃河衝決爲患不常欲一觀渾河以知水勢昨見河流洶湧因念黃河經行處所經理防禦倍宜加慎河道官員還行文與他都着用心任事務一勤永逸勿勞民傷財以爲故事自今推選委用務在得人吏工二部知道欽此欽遵焚盟踣誦不勝感服不勝悚惕仰見我皇上留心國計加意民生因渾思黃有觸即感知黃河之衝決不常即思防禦之當慎因防禦之當慎即思勞民傷財之當戒因勞傷之當戒即思委用之在得人寔翰龍章不數言而盡治河之道矣臣請以河情河性併防禦鄙見敬爲皇上陳之夫黃河由崑崙歷關陝至河南而合渭沁諸河至徐州而合泗沂

諸水至清河縣而合淮河。並入于海。其間小谿曲澗之水。又有不可勝言者。固無怪其波濤洶湧。伏秋勢若滔天。攷之書傳。自周定王五年。河徙於礫。歷漢唐宋元。以至我朝。河決不知幾千百次矣。誠有如聖諭。黃河衝決爲患不常者。而自發源以至入海處。惟見其合。不見其分。曾無兩河並行。而古今治河者。惟以塞決築隄成功。稍事穿鑿。非久即廢。何也。蓋黃河與清河迥異。黃性悍而質濁。先臣張仲義云。河水一石六斗泥。以四斗之水。載六斗之泥。非極湍悍。汎溜不可。分則勢緩。勢緩則沙停。沙停則河飽。河飽則水溢。水溢則隄決。隄決則河爲平陸。而民生之昏墊。國計之梗阻。皆由此矣。有謂隄能阻水。水高隄高。隄無窮已者。蓋不知隄能束水歸漕。水從下刷。則河深可容。故河上有岸。岸上始有隄。平時水不及岸。隄者贅旒。伏秋暴漲。始有逾岸而及隄址者。水落復歸于漕。非謂隄外即水。而旋高旋增也。昔禹導河入海。而必先之以陂。九澤者。陂非隄乎。有謂水欲其洩。決以洩水。安用築爲。蓋不知濁流易壅。洩於決則必壅於河。必無兩全者。昔瓠子之決。漢武親臨。羣臣負薪投馬。沉璧。万克有濟。亦豈好爲艱難之事。以自取勞苦哉。誠有見于此也。故治河之法。惟有慎守河隄。嚴防衝決。而聖諭經理防禦。倍宜加慎之外。更無他策矣。舍此而別興無益之工。即爲勞民。舍此而別爲無益之費。即爲傷財。然總之在於得人而已。臣自六月至今日。與司道諸臣。丁寧告戒。惟以修防爲事。今歲霖雨連綿。河水暴

漲者十餘次。仰仗我皇上聖德所格。百神效靈。聖意所鍾。百僚用命。兩河翕猶。往來無阻。臣亦庶幾藉以塞責矣。然循途守轍之事。誠不自滿於心。直至河南閱視之後。眇無他道可尋。故益信防禦之當慎矣。除申明修守事宜。已經具題該部。見在議覆。其河南應修應改隄工。應添應更官員。候管河道議呈。至日另行題請外。伏望敕下該部。再加查議。如果臣言不謬。容臣申飭各該大小官員。謹遵聖諭。毋惑滂言。一意修防。毋怠職業。如有沿襲故事。輕役大衆。虛糜錢糧。容臣指明參究。共輸忠赤。務保無虞。臣由髮及膚。自頂及踵。皆我皇上生成至恩。才識所及。殫身何辭。必不敢有一毫未盡之心。纖芥未竭之力。自干斧鉞之誅也。臣無任激切屏營之至。緣係恭誦綸音。不勝感奮。敬陳治河鄙見。伏候宸斷事。謹題請旨。奉聖旨。工部知道。

### 工部覆前疏

題爲恭誦綸音。不勝感奮。敬陳治河鄙見。伏候宸斷事。該總理河道右都御史潘季馴題前事。等因。奉聖旨。工部知道。欽此。欽遵。抄出到部。送司案查。本年九月內。該總理河道右都御史潘季馴題爲申明修守事宜。以圖永賴事。內條議久任部臣。禁調官夫等八事。緣由。已經本部覆奉聖旨。河道每歲修防。先年題有定規。乃各該官員不行着實遵守。曠職誤事。這所議俱依擬

行。如有仍前怠玩的。總河官指名參奏重治。欽此。備行總理河道鳳陽保定河南山東撫按衙門轉行管河司道及劄付管河管閘郎中主事等官一體欽遵。今該前因似應具題案呈到部。看得總理河道右都御史潘季馴題稱仰承綸音。敬陳治河專在慎守隄防一節。爲照國家財賦。仰給東南。轉運必由黃河。治河必賴隄防。所從來久矣。頃自隄防少懈。以致黃河泛溢。乃言者不知治隄。即所以治河。始議復故道。開支河。合沁衛。以殺水勢。諸說不一。則河防不專。河防不專。則河患不息。然則一議論專修防。正今日之要務也。總理河道右都御史潘季馴。久歷河防。熟知水性。且感殊異之恩。冀效非常之報。徧履省直地方。備詢今古事宜。乃題稱黃河之必不可分。與隄防之必不可廢。言皆有據。行可底績。蓋惟閱歷多而聞見真。故持論定而利害審。非但一時之謀。實爲經久之計。相應如議題請。以仰答綸音於萬一。恭候命下。容臣等備咨總理河道河南山東保定鳳陽各巡撫及咨都察院轉行各該巡按巡漕巡鹽御史。并劄付管河管閘郎中主事。督率各該道府州縣官員。務要恪遵經理。防禦倍宜加慎。聖諭及本部近日覆奉欽依。修守事宜。如有作聰明。亂舊章。勞民傷財。徒損無益。與創爲臆說。及蹈襲陳言。阻壞陳規。致誤國計者。聽部科總河衙門重行參究。然臣等又有說焉。伏讀聖諭。自今推選委用。務在得人。蓋人在斯政舉。而任法尤不如任人也。竊惟季馴治河屢試輒效。有臣如此。亦旣得人。

矣。伏願皇上重其權。久其任。假之便宜。而責以成效。必能爲皇上紓南顧之憂。建久長之策。其所屬大小管河官員。如有陞遷降調等項。俱聽本官甄別議處。移咨吏部施行。則修守無不得人。而河防益爲永固矣。奉聖旨。是近年河道官員。不行遵守修防事宜。因循廢弛。致有疎虞。却又紛紛建議。意見雜出。何裨實事。今後務遵明旨。加謹防禦。每年終總河官將所屬河道部司等官。甄別具奏。

法移陳葆初圖書

河防一覽卷之十

三〇二

上海图书馆藏书



A541 212 0005 7374B

上海圖書館



運 航

力 水

洪 防

溉 灌

水 給

